

**KATHARA  
TUINGASHIT  
ATHISHURDA SAKAHAI  
KHRISTAWUI CHURCH  
ORGANIZATION  
(Scriptural Organization of  
Churches of Christ)  
[Tangkhul]**

**BY  
JIM MASSEY**

**Funded by  
World Literature Publications  
Winona, Mississippi**

© Copyright, 1985 - WORLD EVANGELISM PUBLICATIONS

First printing - 5,000 copies - 2024 – **Tangkhul**

**InDesign Layout:** Shane Fisher

**Translated by:** Chaams Jajo

**WhatsApp number:** (+91)7578902266

**Phone number:** (+91)8486481266

**Email:** hearhim2@gmail.com

**Proofreaded by:** Ringshokmi Rino

**Websites:**

[www.worldevangelismlibrary.org](http://www.worldevangelismlibrary.org)

[www.gospelgazette.com](http://www.gospelgazette.com)

[www.worldevangelism.org](http://www.worldevangelism.org)

[www.worldevangelismmedia.com](http://www.worldevangelismmedia.com)

**Funded by:**

World Evangelism Publications

Winona, MS 38967

**MAIYAN**

Kathara tui athishurda sakahai Khristawui church organization kaji-wui pongli tamngarum khavai nathum saikorali salam sali. Hi matailak kahai kala tamngayilak kahai tuipong akhana. Bibleli hiwui pongli tamikahai ka-chungkha lei.

Katam (lesson) kachiva akhum kathum sada khaira: chia, (1) Katam chiwui tuikui (kasha eina meikhaikachithei), (2) Katam chiwui khamataiya asa wui pongli ngasankhangarum kala meikakhai, (3) kala akatangli khangahan leira. Ojana tamkhamili drill method hi shichin phalungra.

Tuikui wui kasha point bing chi avava eina meikhaichithei mira. Hi class mahaophokranglaga ojana Katam chiwui khamataiya asa (body) chi palaga bhaptahairasaakha pailak eina sapaiki kaji otna. Tuikui chi mathalak eina meikhaichithei kahaiwui thili chiwui khamataiya kala theikhui khangayiya point bing chi latlui da class kala chili zangda khalei mi kachivali sanga-sakluiki kajina. Chithada kasa eina tamkahai bing chi mamalai mara.

Akatangli zangda khalei khangahan bing chi kathada shichinrakhala kaji apong khanikathum lei: chia, (1) katamnao kachivana class mahaophokranglakha khalatta ngahankahaipai. (2) Katam (lesson) chi mathalak eina bhaptakahai wui thili ojana katamnao bingli ngahanpai. Maningakha (3) Classli tamngarum kahai wui thili ojana athumli kapita khavai kasopai. Chithada oja awui ningkachang athishurda sangasakra.

Mikahai Bible tuiza saikora palaga theikhuikhavai katamnao saikora khalattawui Bible shichinphalungra. Hi phaningunglu kaja Khristawui church saikorawui lungli Bible hi akhamang kaji pangshap kala khamungana. Tamgarumkida khalei lairik hili khangui-khalang zangpai kha Varewui tuiva mashungchinga. Lairiknao hiya Biblena church organizationwui pongli kathada tamchitheikhala kaji tamkhuikhavai ngachonme akha sada shichinkhavaina.

Lairik hi class wui vangla shichinpai kala khalattawui study kasalila shichinpai. Church member bing kala member makhaningbingwui vangla ngarumda kapikahai lairikna. Hiwui tamkachithei shikachin mipha kachivana Varewui thangmet-awor samphangkavai seiha kasa eina ngasoda shichinranu. Jishuna hanga, “Nathumna khamashung chi theikhuira kala khamashung china nathumli ningkhan ngasakra” (John 8:32)

Kapime/Khalenga

## **TUIHAO**

Jim Massey Ini theingarok da zingcum kasangkha haira, tharлак eina hangsa chiakha I Montgomery, Alabama, U.S.A li khalei Alabama Christian College li tamdaleilakha a iwui Greek ojana. Atam chitharanwui eina a hi Nigeria kala Trinidad wui missionary akha sada leihairasai. Chieina ngasoda a hi Lubock, Texas, U.S.A li khalei Lubock Christian College kala Sunset School of Preaching li tamchitheidaleisai, kala aruiruiva Alabama. U.S.A li khalei International Bible College of Florence li oja sada tamidalei.

Luiram ngatateidali ot sada kala tamikhangayiya tuipong bingwui pongli kapishok kahai, lairik makhalei kala khavat kachungkha leikahai hi theida ana lairik kha chungda kapishoka. Awui hotkhana chiwui athei sada ana kapikahai lairikbing apam kachungkhali Varewui pao hakashokli manga valak eina shichindalei. Achina Massey na kakapi lairikbingwui ngachaili Indiali lairik hina kharei sada namshokida khaleina, kha ina shitsanga kaja khangatei lairik kachungkhala namshokmamanra da. Ali ithumwui ringkapha phongshokli kaja ithumli hikatha ot samphangkhangasakwui vang kala lairik hina kapha ot kachungkha sara kachiwui shitkasang eina ngasoda chihoshokli.

Indiali khalei church bing nganuidalei haoda kala manglarin mapungphamei khavai rarsangmamanda khalei atam sahaoda lairik hi athumwui vang kachungkha kannara kaja lairik hina achinangrabingli kathara tui athishurda kathada church organize sakhala kaji tamida kala chithada sakhavai katomiya. Mikumona sakakhui ara (pattern) chiwui athishurda kapikahai maningla kha Prohowui eina khara tamkachithei athishurda kapikahaina. Ithum Khristawui church akha sada kathara tui athishurda sakahai ara kala maong chi shurphalungra. Kala chimang majila kha lairik hi ithumwui ngasotnao, manglarin khangavapbing wui vangla kachungkha kanara kaja lairik hina kathara tui athishurda organize kasa church kathada leikhala kaji kachithei mang majila kha athumwui church organization Biblena tamkhami chiwui eina kayakha ngateida zatdalei khala kaji theikhui khavai ngachonmira. Athumna akhashida ngateikhangarok chi theihaiakha mikumowui apongli langda Prohowui apongningchangmeira.

Ina lairik hi kapa mi kachivali para avava chi Bibleli ngaheolaga pakhavai katomili. Kachangkhat eina lairik hi kapimenala Varetuili chijamida china tuipong hiwui pongli kathada tamikhala kaji theikhuingasak khavai ringalaga kakapina. Nathumli khamataiya point bing phaningungkhangasak sada para kachivawui akatangli khangahan bing zangdalei. Chithada sada lairik hi Bible correspondence sada shichinpai kala Bible school wui class book sadala shichinpai.

Chithada sada lairik hi khamatha lairikna da nathumli hangsangkhami chili iwui ringkapha lei kala ina seiha sai lairik hi apam kachungkhali ngayoda shichin khavai. Chithasi kaja lairik hi athei khamathei ngasara.

J. C. Choate  
New Delhi  
Kukadzi 29, 1986

## **KAKHANIYA EDITIONWUI TUIHAO**

Ithumna lairik hi darka kasa kachungkhali shichin khavai da Indialila namshoka. Lairik hi khalattawui studyli shichinkhavai kaja class li katam thada shichinkhavai, kala Bible Correspondence course sada shichin khavai katomili. New Delhi li khalei Churchbingna lairik hi Wednesday ngayawui Bible study kasali shichinda hina kachungkha ngachonmiya da hanga. Mail einala Indiali khalei mi kachungkhali chiphun kahaina.

Lairik hi pao kapha hakashokwui otmanga kakhuilila phalak kahai kala shichinpailak kahai lairik akhana. Church organizationli khangashik khalei apong saikora vashungda kapikahai lairikna kala tuikui chili khangashik khalei khangahan saikaora lairik hina ngahankamiya. Churchwui kathanna sakhavai kapangkakali Varena kachikatha mi darka sakhala kajila chitheimiya. Kachikathana lairik hi Kadhara Tuingashit li ngaheolaga pakahaiwui thili kathara tui athishurda Prohowui Church organization hithaya da khamashung matheishingkakhui mi ina matheiranga.

Hikatha lairik hi apam kachungkhali darka sakahai chi theilaga, achina Masseywui khamaya khuilaga lairik hi apam hilila namshokda khaleina. Kala aman pailak eina apam kachivali khalei mibingli samphangasakdalei kala Varewui luiram kachungkhali khalem einala chihomidalei. Ithumna chihanna kaja lairik hi ning-wuklung kathar mangla kachungkhali churchwui pongli Varewui ningkachang khikhala kaji kachitheili ngachonmikhavai apong akha ngasara da.

Ithumna nali ngahotli kaja hili zangda khalei para bing pakhui-tamkhui khavai kala lairik hi sakapai eina tangda mi kachungkhali samphangkhanga-sakli ngachonmi khavai.

J. C. Choate  
 Winona, MS  
 January, 1985

## TUIZAN

<b>Katam 1</b>	
Churchwui Organization Lungli Ithumwui Pangshap Chi Khikhala?.....	8
<b>Katam 2</b>	
Ithum Khiwui Vang Church Organizationwui Pongli Tamngayi Khala?...	11
<b>Katam 3</b>	
Haokaphokli Khamashunga Church Organization .....	14
<b>Katam 4</b>	
Church Hi Khikhala? .....	16
<b>Katam 5</b>	
Church Katonga Kaji Hi Khikhala?.....	19
<b>Katam 6</b>	
Church Katonga Hi Kathada Organize Sakhala? .....	21
<b>Katam 7</b>	

Okathuili Church Hi Kathada Organize Sakhala?.....	23
<b>Katam 8</b>	
Paokazatbing Kala Maranbing Chi Khipalong Khala? .....	26
<b>Katam 9</b>	
Local Churchbing Kathada Organize Sakhala? .....	29
<b>Katam 10</b>	
Local Church Kachiva Kathada Ningkhan Leikhala?.....	32
<b>Katam 11</b>	
Khiwui Vang Varena Apam Ngatateidali Khalei Church Saikorali Ningkhan Eina Panngasak Khala?.....	35
<b>Katam 12</b>	
Church Eina Sarkarwui Ngateikhangarok hi Kathada Ngaheora Khala? .... .....	38
<b>Katam 13</b>	
Khiwui vang Mikumona Kathanali Shurakhala?.....	40
<b>Katam 14</b>	
Khiwui Vang Churchwui Lungli Ngayokhavai Hi Khamataiya Ngasakha- la?.....	43
<b>Katam 15</b>	
Churchwui Lungli Ngayokhavai Ngasaki Kajibing Chi Khipalong Kha- la?.....	46
<b>Katam 16</b>	
Churchwui Lungli Khalei Otpambing Chi Khimamei Khala?.....	50
<b>Katam 17</b>	
Ararbingli Mikahai Mingphobing Chi Khimamei Khala? .....	52
<b>Katam 18</b>	
Mibingna Ararbingwui Pongli Kathada Bhaptangui Khala?.....	55
<b>Katam 19</b>	
Denomination Bingna Churchwui Government Kathada Makhaongasak Khala?.....	58
<b>Katam 20</b>	
Khristawui Churchbingna Churchwui Government Khi Apong Eina Makhaongasakpai Khala?.....	61
<b>Katam 21</b>	
Church Organize Sakhavai Mapungmapharang Lakha Congregation Ayur Kayakha Leikhala?.....	65
<b>Katam 22</b>	
Ararbingwui Qualification (I).....	68

<b>Katam 23</b>	
Ararbingwui Qualification (II) .....	71
<b>Katam 24</b>	
Ararbingwui Qualification (III).....	75
<b>Katam 25</b>	
Ararbingwui Qualification (IV) .....	78
<b>Katam 26</b>	
Deaconbingwui Qualification Kala Athumwui Otngarut.....	82
<b>Katam 27</b>	
Kathada Otpam Khuiki Kajibingli Makapangmara Khala?.....	85
<b>Katam 28</b>	
Mangla Katharana Churchwui Arar Kathada Semkhala? .....	89
<b>Katam 29</b>	
Varena Ararbingli Kachishin Otngarutbing. ....	93
<b>Katam 30</b>	
Church Organizationwui Lungli Kalakashi Rashokra Kaji Theikapai Ma- chutbing. ....	98
<b>Katam 31</b>	
Khare Sada Church Government Hi Kathada Nguihaokhala.....	103
<b>Katam 32</b>	
Business Meeting Kathada Thanra Khala. ....	106

**KATAM – 1**  
**CHURCH ORGANIZATIONWUI LUNGLI ITHUMWUI**  
**PANGSHAP KHIKHLA?**

**OUTLINE**

1. Phameikap kaji thada theida khalei chi maningmana.
2. Mi khangateibingna sadakhalei chi maningmana.
3. Kadhara Tuingashit maningla katei maleiluimana.

**NGASANKHANGARUM**

1. *Phameikap kachi thada theida khalei chi maningmana.* Katam (study) kachivali saikorana khamaya tamyang khavai mashun/pangshap akha leiph-alungra. Khangahan saikora shitsangkapaiya ngahankakhami tuiwui haophok khavai leiphalongra. Hi mashunga da mi kachivana chihan kapai pangshap (authourity) akha leiphalongra. Ithumna tamdakhalei tuipong hi dharmarinwui tuipong akha ngasada ara ithumna hi ngahanra chia, church oraganizationwui pongli tamkhangarum hili ithumwui pangshap (authority) chi khikhala? Khangahanbing chi mashungrik eina ngahanka khavai khina ithumwui tamyang khavai ngasara khala? Mi kaikhana hangra kaja mi kachiva dharmarinwui lungli kachichana hi mashunga da theikakhui athishurda zatpaiya da. Chikatha mibingna hanga, “nana hi phameikappa da theida khalei chi thada salu” da. “mi kachiva kachicha khalattawui tamyangkavaina. Nana machuk kahai chi thada salu mathalak eina machukahai athishurda rashokdaleiakha”. Kha dharmarinliva mikumowui ningchuk kala kaphaning chi Varewui tamyangkavai maningmana. Biblena hithada hanga kaja mikumowui pheikar kachishong karrakhala kaji akhalattawuili maleimana da (Jeremiah 10:23). Mi akhawui vang apong khamashung akha khalei thada lei, kha chiwui akatang chi kathiwi apongna. (Chansam 14:12). Jishuna hanga kaja mikumowui tamkachitheili kashur china khokharum aremma sangasaka da (Matthew 15:9). Chithada sada dharmarinwui oti mikumowui kaphaning-ningchuk china pangshap maningmana. Church organizationwui ponglila mi kachungkhana hangra awui kaphaning china phameithuiya da. Khangatei akhana hangra awuina phameikappa da. Kha mikumowui kaphaning chiya chihankapai maningmana. Ithum khalatta khi phameithui khala da khangahan china ithumli khamashung matheikhuingasakmana.

2. *Mi khangateibingna sada khalei chi maning mana.* Kakhaniya sada dharmarinwui pangshap (authority) wui pongli mibingna shitkasang hi khikhajila mi kachungkhana sadaleiakha chi khamashungna da shitsanga. Churchwui



riyan semkahai chili shitkasangbingna hi hangra kaja riyan chi mi kayakhana shurdalei kala atam karankha sangda zatnarahaira khala kaji hikathatha hi. Kha dharmarinwui lungliva chila nguiya. Mi akhamangwui kaphaningli mi kachungkhawui kaphaningna mashungmeiya kaji maleimana. Jishuna hanga, kaja mi kachungkhana phananga athumna sada khalei chi khamashungna da, kha Ana athumli matheimana da (Matthew 7:22). Yarui kachungkhana khangui apongli zatta kha kateowana khamashungli zatta (Matthew 7:13,14). Kuikhamreili khaleiya yur khangateibing eina ngarai khavai Israelnaobingla awunga ningchangsa. Yur kateibingli ngaraikhavai kasa eina Varena Awui mibingli mungkhavai phaning kasa Awui ningkachang chili makhamaya ngasathui haowa (1 Samuel 8:5-7). Churchna awui kuikhamareili khaleibingli ngashanda athumwui thada sakhavai masapai mana. Church hiya hokhui kahaiya bingna (2 Corinthnao 6:17). Athum chiya ngakheikhang kahaiya mibingna (1 Peter 2:9). Prohowui church organization alungli khamakhao rakazang hi member khangazanbingna athumwui kuikhamareili khaleiya denomination bingwui thada sakhangaiwui vang rakashokna. Mikachungkhana zatnada khalei ayin chi athumna sangailakka. Kha mi khangatei kachungkhana sadakhalei chi Varewui khamashung tamyang khavai maningmana.

### 3. *Kadhara Tuingashit Maningla katei maleimana.*

Dharmarinwui akhamang kaji khamashunga tamyang khavai pangshap chi Kadhara Tuingashitna. Catechism, yaruina zatkhana seihawui lairik, kala mikumona sakakhui shitkasang wui lairik hikathatha bingwui dharmanwui pangshap malei mana. Kazingram eina okathuili khalei pangshap saikora Jishuwui lei (Matthew 28:18). Khamashung katongali thanmikhavai Ana Awui paokazatbingwui vang Mangla Kathara chihoramiya (John 16:13). Chithada, kapikahai kathara tui saikora Varena kasatkhami tuina, kala china ithumli Vareshi akha sada kapha ot kasali kashungasaka (2 Timothy 3:16,17). Mikumona Varewui lairikli khangarumla mangarumsangpai mana lah khuikashokla makhuishokpaimana (Phongkhami 22:18,19). Mi saikora Khristawui tamkachithe chi mayon phalungra kala chili makanda masapai mara (2 John 9, 10). Varewui paokapha mashongachei khavai masapaimana (Galatianao 1:7,8). Kachama Tuingashit hi aja Christian bingwui vang pangshap maleimana kaji hila bhaptaphalungra. Kachama Tuingashit hiya Khristawui lungli khalei shitkasang chi mararanglakha eina tangdawui lungli ithumli thankhamiya oja kathana kha ara ithum oja chiwui azingli maleithura (Galatianao 3:24, 25). Ain chi apong chiwui eina khuishoklaga khrushli shaoshan haira (Colossianao 2:14). Christianbing Proho Jishu Khristawui Kadhara

Tuingashit, kadhar kala phakhamei ningkhami azingli khaleina (Hebrewnao 8:6-13). Chithada sada, Kachama Tuingashitna ithumli mayonkhavai kaso-kahai phanitphanao hikathatha bing hi aja churchwui lungli mayonkhavai mashun mamipai mana. Church government wui pongli tamida khalei Katam (lesson) hina Kadhara Tuingashit hi akhamang kaji Varena kasatkhami pangshapna da khayashira. Lairik hili zangda khalei katam (lesson) saikora munlak eina yangda ngathing phalungra kaja hi Katharatuiwui einaka maningkhala kaji theikhavai (Otsak 17:11). Oja kala awui tamkachithei chi mashungka mamashungkhala kaji phashokhavai Varewui khamashunga tu-iwui pangshap eina chang yangphalungra (1 John 4:1). Aja ithumna Varewui sashap-pangshap (authority) mikumowuili masamphangmana kha kathara tuili samphanga. Varewui lairikna mashunga da chitheikhami mang chi Varena mayakhamina. Bibleli kazanga, akhashida ithum saikoralik mikahai shitkasang chiwui vang ithum ningtonglak eina ngarar phalungra (Jude 3). Pao hakashoka a china Varewui pao hashok phalungra (1 Peter 4:11). Vare hi pakhangapawui Vare maningmana kha chingri kahaiwuina (1 Corinthnao 14:33). Varewui pangshapli khayakashiya a china Biblena khi tamikhala chi tamchitheira, kala kathara tuili makazang chi ana matamimara. Varewui mibing Biblena khamatuipam chili matuira kala makhamtuipam chili matamui mara. Biblewui ot chi Biblewui athishurda sara kala Biblewui ot chi Bible wui aming eina hora. Dharmarinli Varewui tui hi akhamang kaji chang tamyangkhavai pangshapna da khayakashi khami eina ngasoda church organizationwui pongli kapikahai rakhanao para bing chi tamkhavai poli. Nawui Biblewui eina kathara tui saikora munlak eina machuk kazaklu. Chi Varewui tuina kala khamashunga tuina (2 Timothy 2:15).

### **Khangahan**

1. Mikumowui ningchuk kala kaphaning hi dharmarinwui lungli pangshap maleikhala? \_\_\_\_\_
2. Mikumowui kaphaning-ningkachang kasali makhamaya kathara tuiza kathum chi khimamei khala hanglu. \_\_\_\_\_
3. Mikumowui tamkachithei kala kakaso china ithumwui khokharum \_\_\_\_\_ sangasaka.
4. Yaruiwui ningkachang kala kaphaningli chihanpairala? \_\_\_\_\_
5. Mi kachungkhana zatnadaleilala kala shurdaleilala nguipaiya kajiwui pongli kapi kahai kathara tuiza khani hanglu. \_\_\_\_\_
6. Israelnabingna \_\_\_\_\_ thada awunga ningchanga.

7. Church hi mi kateibingwui eina hoshokahai kala ngakheikhang kahai-ya bingna kajiwui pongli kathara tuiza khani hanglu. \_\_\_\_\_

8. Varewui pangshap aja mikumowuili masamphangkhalala? \_\_\_\_\_

9. Ot saikora mashunga kala mamashungmana kaji hi kathara tuiwui eina chitheimi phalungra da kapikahai kathara tuiza khani hanglu.

---

10. Dharmarinwui lungli pangshap (authority) chang tamyangkhaiwai wui pongli matuihaida khalei kathara tuiza chishat hanglu. \_\_\_\_\_

---

---

## **KATAM – 2**

### **ITHUM KHIWUI VANG CHURCH ORGANIZATIONWUI PONGLI TAMNGAYI KHALA?**

#### **OUTLINE**

1. Khareli shitkasangwui eina thuikahaibing, athumla organizationwui lungli zangsai.

2. Mikumowui langsothina kathanawui pam (leadership) hi pailak eina makhaongasakpai.

3. Ashangva hi kathananapawui kapha thada phara kala awui makapha thada maphamara.

#### **NGASANKHANGARUM**

1. *Khareli shitkasangwui eina thuikahaibing, athumla organizationwui lungli zangsai.* Biblena hangmaran kahai leiya kaja kaikha shitkasangwui eina thuihaora da (1 Timothy 4:1). Kaikhana khamashunga paokapha chi mashongachei ngasakra (Galatiano 1:6-9). Ephesusli khalei churchwui ararbingli athumna homdakhalei yaonao saikaorali mathalak eina kala ngasharlak eina yangsangmi khavai kala mayonmi khavai paokazat Paulna hangmathinmiya (Otsak 20:28). Minama ojabing rara kaji theida Paulna Ararbingli yaonao-bingli phauikhavai kala tamikhavai hangmiya. Minama ojabing athumwui ngachaiwui eina shokda Khristawui ashee eina lokahai churchwui sakhangathabingli thanthui haora (Otsak 20:28-30).

Paulna hangmaran kahai tui hi zingcum atam hunakhawui thili rashoka kaji hi ithumna churchwui thotchanwui eina kathei samphanga. Mibingna shitkasangwui eina thuihaowa. Minama ojabingna kashurabingli nguuda thanthuihaowa. Churchwui kathanaobingla Varena athumli kathada mungasakngai khala chithada masala athumwui ningkachang eina mung-

phokhaowa. Athumna Roman Catholic kala denomination church bingna sada khalei organization shakhuida kathara varetui wui eina nguuda zat-phokhaowa. Khare sada churchwui kathanawui pam (leadership) hithada makhaongasak haowa.

Mikumona bible naothahailaga nguuda zatphok khare apong saikorawui ngachaili church organizationli nguuda kasa hila akhana. Churchwui arabing-na church akhali langda mungphok haowa. Kala bishopbingna arabingwui tungli khamung hikathatha hi haophokhaowa. Biblewui athishurda khalei church government chi Popeli makapangkarang laka eina tangda ngachei-rashuma. Bibleli Pope mazangmana, kha china kachitheipava mibing hi shit-kasangwui eina thuihaira kajina.

Mibingna khamashunga churchwui organizationli ngingasakda makhaongasakhai kapai apong leisachingra. Churchwui lungli kakai rakashok hi toilak eina kathana wui pam ngapaikhangarok eina rashoka. Chiwui vang eina church organizationwui pongli tamkhangarum hi matailak kahai ot akha ngasaya. Mibingna kathada kala khiwui vang khamashung naothahailaga thuihaokhala kaji theishingkakhui hina ithumli khangui khalang ot masakhavai ngachonmiya.

2. *Mikumowui langsot ning hina kathanawui pam (leadership) hi pailak eina makhaongasakpai.* Langsot kaji hi khalattali khamasot chili kahona. Kathanao akhawui vanga hi ritlak kahai kasui akhana. Kachikatha akhana kathanawui pam akha samkaphang chitharan hakkhamei pam ningchangmeiluiya. Kathanao china pangshap samkaphang chitharan ana hakkhamei pangshap ningchanga. Chiwui vang eina churchwui kathanawui pam (leadership) hi pailak eina makhaongasakda ngingasakhaikapaina.

Thot kachidawui mikumo hiya ngaraichasera. Langsot hi mi kachivawui vang kalakashina. Paokazat James kala John wui avana aniwui ngachaili akhali Jishuwui yashong kala akhali uishong da chipamngasakngaiya Jishuwui wungramli (Matthew 20:20-28). Paokazatbingla aja ithum thada mikumona. Mikumo saikora pangshap ningchangsera. Ithum khangam-khareipam ningchangsera. Mikumowui khangacha mangacheilak mara.

Chiwui vang eina Varena churchli kathada mungrakhala da sakahai awui apong chili makhaokhangasakwui kalakashi hi aruihon atamwui khanangmeithui kaji kalashat akhana. Mi kachungkhana kathanao kasa samphangra kajiwui kachihan eina ngasoda churchli razanga. Kala khangatei kaikhana kathanawui pam mira da tuingashit kasawui vang church member saya. Mibing hi church lungli malungkhanima rao sada otram khangatha china ningyangmaungrar mana. Chithada sakikaji mahutli mi kachungkhana hakkham-

ei pangshap singkhavai apong phazatta. Churchwui lungli khalattawui vang kahakka pam sakhui khavai Varewui kaphaning kala ningkachang sakhaiya. Mikumowui langsot ning hina churchwui lungli khalei kathanawui pam pailak eina makhaongasakka. Chiwui vang eina ara ithumna tamngarumda khalei hi matailak kahai akha ngasaya.

3. *Ashangva hi kathanapawui kapha thada phara kala awui makapha thada maphamara.* Paokazat Paulna Ephesuswui church ararbingli tui hangkhavai kaho chitharan ana hi phaningunga kaja ashangva hiya kathanapawui kapha thada phara kala awui makapha thada maphamara da (Otsak 20:17-30). Church kachungkachana kapha kathanaobingli shurlaga khamalinga church ngasaya kala khangazanna makapha kathanaobingli kashura churchbing makapha church ngasathuihaowa kaji hi ana theihairasai. Chiwui vang eina Mangla Kathara wui ningkachang chi khikhala jila church kachivali kapha ararbing kala kapha yaokahomabing leiphalongra kaji hina (Otsak 20:28). Pangshap khalei kathanao china khamlinga church shokngasaka.

Kha khamatha kathanao shokkhangasak hi chotta kala hotkhana ma-leikha mashokramana. Hithada khamatha kathanao kashok hi tamkhami kala sakachitheili khamataiya mida hotkhana wui atheina. Varewui mibingwui kathanaobing hi mathalak eina tamkhui kahai kala ngarankharik kahaiya mibing ngasaphalongra. Kaja okathuili mataimeikap kaji ot chi athumna sakida khalei ot china.

Paulna Timothyli awui eina tamkhui kahai kala shakhui kahai chi khangateibinglila tamchitheishapki kaje shitsangkapai mibingli chisinlu da kasatmiya (2 Timothy 2:2). Churchwui kathanawui pongli Varena ningkachang chiya shitsang-kapaiya khangatei mibinglila tamishapki kaje mibingli kasatmikhamaron hina. Maram saikora hiwui vang eina Biblewui tamkhami church organizationwui pongli tamkhangarum hi matailak kahaina.

### **Khangahan**

1. 1 Timothy 4:1 li mi kaikha naoda \_\_\_\_\_ wui eina \_\_\_\_\_ haora da hangmaran haiya.
2. Galatiano 1:7na hanga kaja mi kaikhana \_\_\_\_\_ ngasakta Khristawui \_\_\_\_\_ hi \_\_\_\_\_ khavai kasana da.
3. Otsak 20:17na chitheimiya kaja Paulna churchwui \_\_\_\_\_ ali samphang khavai \_\_\_\_\_ chihovai da.
4. Otsak 20:28na hanga, \_\_\_\_\_ saikorawui tunglila, kala \_\_\_\_\_ ngasharlak eina mayonlu da.
5. Otsak 20:29na hanga kaja sakashi \_\_\_\_\_ nathumwui

ngachaili razangda \_\_\_\_\_ haisasa majilakmara.

6. Popena Churchwui tungli khamungwui pongli Bibleli kapikahai ma-leikhala?

7. Matthew 20:20li \_\_\_\_\_ kala \_\_\_\_\_ wui avana anili Jishuwui yashong kala akhali uishong da chipam khavai poya.

8. Mikumowui lang sot hi khare atamwui thada ajala kalashikapai man-gasadalei khala?

9. 2nd Timothy 2:2na hanga kaja mikhangateibinglila \_\_\_\_\_ kaje shitsangkapaiya bingli \_\_\_\_\_.

10. Kapha kathanaona \_\_\_\_\_ church shokngasaka; makapha kathanaona \_\_\_\_\_ church shokngasaka.

### **KATAM-3**

## **HAOKAPHOKLI KHAMASHUNGA CHURCH ORGANIZATION**

### **OUTLINE**

1. Organization kachiva kathanabing leiya.
2. Organization kachiva kashura leiphalungra.
3. Kathanabing eina kashurabing katomingarok phalungra.

### **NGASANKHANGARUM**

1. *Organization kachiva kathanabing leiya.* Jishuna atam kachida ali shurzatta khalei yarui ashangva saikorali lumashanmi, khiwui vang khalajila athum chiya yaokahoma makhalei yaonaobing kathana (Matthew 9:36). Ashangva eina kazatta sayur, yao katha eina tangdala kathana leiphalungra chithada mikumola chipapama. Varena theiya kaja shimkhur thankhavai kathana darka saya da, chiwui vang ana gaharali shimkhurwui akuia sangasaka (Ephesus 5:23). Yur saikora khamunga avava leiphalungra, chithada sada Varena thao neomida awunga bing kala governor bing leingasaka (1 Peter 2:13, 14). Ot salaga langpheida khaleibing kapha kathanaona thanakha ot mathamei da sai. Hina chitheimiya kaja Varena churchwui lungli kathana leiphalungra da sakahai hi maram chaya da. Chithada sada organization kachiva kathanabing leiphalungra.

2. *Organization kachiva kashura leiphalungra.* Jishuna hanga kaja keinung nilala shimkhur nilala khalatta ngayarkazamhaiakha manganingrarmarar (Matthew 12:25). Kapha kathanabing eina ngasoda ashangva kachidali kapha kashurabingla leiphalungra. Organizationwui otmanga kakhuili kathana darka kasa thada kashurala darka sai. Kha thalala mi kaikhana kashurabing-

li khamataiya kachungkha mamingai mana. Kha kashura maleiakha kapha kathanabing chi khikhala? Kashurabingli kathada shurakhala kaje tamkhami darka sai. Varena shurda khaleibingli kapha kashura ngasaser khavai chihanna. Chithada sada athumli kathada kapha kashura sarakhala kaje tamiphalungra.

3. *Kathanabing eina kashurabing katomingarok phalungra.* Kapha kathanabing eina kapha kashurabingna thei, kathada salaga mathameida otsakrumpaira khala kaje hi. Kathanabingla kala kashurabingla kachichawui otngarut kala saran mathalak eina theiphalungra. Khanini chi kachichawui saran khikhala kala masaran khi kaje theiphalungra. Kathanabingna kashurabingwui pam chili khayashira chithada kashurabingnala kathanabingwui pam kala athumwui otngarut bing chi khayashiphalungra. Chithada kasa eina athumwui ngachaili khangashik mathalak eina leipaira.

Biblena churchwui organization hi kumowui phasali ngarai ngasaka. Phasakai kachungkha lei kala phasakai avava phasa katongawui vang kannai (1 Corinthnao 12:12). Apheina iva apang maningmada makannamana majipaimana (Vs. 15). Miknala pangli darka masamana da mahangpaimana. Teomeikap kaji phasakai eina tangdala phasawui vang kannalaka kala matailak kahai ngasaya (vss. 20-26). Hi Khristawui phasa kaja churchlila chithapapama (vs. 27), kashurabing eina kathanaobingwui lungli yuishikhangarok maleipairamara, akhana akhali phaningkhami kala machukhami hi leiphalungra. Kachichawui sakashap athishurda member saikora mathalak eina otsakrum phalungra. Kateowa lairik hi kathanna, kashura kala katomikhangarok wui pongli tamkhangarumwui lairik ngasara.

### **Khangahan**

1. Matthew 9:36na hanga kaja Jishuna yarui ahangvali kathei tharan \_\_\_\_\_ khiwui vang khalajila athum chia \_\_\_\_\_ makhalei yaobing kathana.

2. Ephesus 5:23na hanga kaja gahara hi \_\_\_\_\_ akuiana.

3. 1 Peter 2:13, 14na hanga, 'ngalei khamunga \_\_\_\_\_ kala \_\_\_\_\_ bingwui shiyanchikanli mayada hamsanglu da'

4. Matthew 12:25na hanga kaja keinung nilala, shimkhur nilala \_\_\_\_\_ manganingrarmana.

5. 1 Corinthnao 12 na church member bingli \_\_\_\_\_ phasa \_\_\_\_\_ bing eina ngarai ngasaka.

6. Ot kasabing kathana darka masakhala? \_\_\_\_\_

7. Kashurabingna mathalak eina kashur kaji hi churchwui lungli kha-

mataiya maningkhala? \_\_\_\_\_

8. Mathalak eina ot-sakhangarum kaji hi khi kakhalatkhala?

\_\_\_\_\_.

9. Phasakai kateo bing phasawui vang makanna khala? \_\_\_\_\_

\_\_\_\_\_.

10. Manglarin eina Khristawui Phasa chi khikhala? \_\_\_\_\_.

## **KATAM – 4**

### **CHURCH HI KHIKHALA?**

#### **OUTLINE**

1. Lamhangli khalei church.
2. Church katonga/Khristawui Phasa.
3. Kha/ ram akhawui lungli khalei church ahangva.
4. Yarui kazip.

#### **NGASANKHANGARUM**

1. *Lamhangli khalei church*. Church kaji tuiyar hiwui kakhalat chiya ‘hoshokahaiya yarui ahangva’ kajina. Chi sakakahai shim (building) chili kaho maningmana. Tarsus kaho apamwui Saulna mayarnaobing kala shanaobingli rekkakharek eina chi churchli rekkakharekna da thei (Otsak 8:1-3). Churchwui memberbing chi churchna. Kha mayarao kala shanao saikora chi church maningmana kaja hoshokahaibingmangli church kahona. Biblena ‘church’ da shichinda khalei hi hoshokahaiya yarui ahangva wui pongli matuida khaleina. Egyptwui eina hoshokda lamhangli kazatta Israelnaobingwui pongli Stephenna hashoka. Athum hi narhaida khalei raopamwui eina hoshokahaibingna chiwui vang athumli ana ‘Lamhangli khalei church’ da hoi (Otsak 7:38). Hina ithumli khamashung churchwui kakhalat theingasaka. Mah, hili hoshokahai athum hi Kadhara Tuingashitwui Khristawui Church china kajiva maningmana. Athum hiya muiyazingli Redsea makanda Moseswui lungli rakahikbingna (1 Corinthnao 10:1,2). Jishu Khristana sakaka church chiya ana okathuili rada kala kazingramli makaranglakha eina tangda wui lungli maleirangsai (Matthew 16:18). Kachama Tuingashitwui lungli khalei dharma chiya Jihudinaobingwui dharmana (Galatianao 1:13, 14). Chi Christianity maningmana kha chiwui amaha sada rakharei akalana (Galatianao 3:24, 25).

Langmeida, Biblena matuida khalei church chiya denomination maningmana. Kadhara Tuingashitwui church atamli denomination maleismana. Denomination bing hi Jishuna Awui church sakakahaiwui thili atam



kasangkawui thili mikumona haokaphokna. Denomination bing hiya Bibleli nathum saikora akha salu da tamchithei kahai chili makhamaya mikumona haokaphoka kaikhangarok kala ngakaingakak khangarok shitkasang akhana (John 17:20,21). Hikatha kaikhangarok rakashok hi rilak eina shitkasangbingna Khristawui tamkachithei kala awui aming mashichinla kha athumwui ojabingwui tamkachithei kala athumwui aming shikachinwui vangna (1 Corinthnao 1:10-13). Chithada sada atam kachida Bibleli church hi hoshokahaiya yarui ahangva chi chinga. Church hi sakahai shim kala denomination bing maninglaksaphalungmana. Lamhangli khalei church chiya Kachama Tuingashit wui hoshokahaiya ahangva Jihudinaobing china.

2. *Church katonga/Khristawui Phasa*. Kadhara Tuingashit kapa tharan Khristawui churchwui pongli tamkakhui samphanga. Jishuna hanga, “Ina iwui church sakara” da (Matthew 16:18). Biblena hanga church hi Khristawui ashee eina lokakhuina da (Otsak 20:28). Ana churchli leishi, chiwui vang akhalattawui mangla chikatmi (Ephesus 5:25). Huimikahai athumli Prohona Awui churchli ngarumsangmiya (Otsak 2:47). Churchli Khristawui Phasa da hoi, kala Ana chiwui akuiana (Colossiano 1:18,24). Christianbing saikora ngarumda sakakhui ahangva chi kachangkhat hoshokahaiya ahangvana (Colossiano 1:13). Athum hi okathuiwui makaphawui eina shokda athum khalatta ngateingasak kahai bingna (2 Corinthnao 6:17). Apam ngatateidali khalei hoshokahaiya yarui ahangva saikorali church katonga (whole church) da hoi kala Khristawui phasa dala hoi.

3. *Kha/ram akhawui lungli khalei church ahangva*. Kadhara Tuingashitli ‘church’ kaji tuiyar hi apong khangatei akha einala shichinna, chiya kha/ram (local) akhawui lungli khalei christianwui ahangvalila chithada ‘church’ da theiya. Hi kha akha maningakha keinung akhawui lungli khalei hokshokahai shitkasangbingwui ahangva chili kahona. Corinthli khalei ‘Varewui church’ da ithumna kapa samphanga (1 Corinthnao 1:2). Asiali khalei church shiniwui pongli ithumna kapa samphanga kala chi Asiali khalei keinung shini wui local church avavana (Phongkhami 1:11). Paulna ram akhali khalei churchwui eina shalamtui hangchiphunda hithada hanga, “Khristawui church saikora nathumli shalam mili” da (Romnao 16:16). Kachikatha apam akhali khalei, hoshok kahaiya shitkasangbingwui ahangva chili Local church da hoi.

4. *Yarui kazip*. Khamatiyali, Biblena ‘church’ kaji tuiyar hi yarui kazipwui pongli khamatui tharan shichinna. Mi saikorana kachichashi shimwui eina yarui kazipli khorumkhavai rakhangarum chitharan athumli ‘church’ da hoi. Hi phaningunglu kaja atam kachida ‘church’ kajiwui kakhalat hiya hoshokahai/hokhuikahai athumli kahona. 1st Corinthnao 14:23li Paulna church ka-

tonga kazipkhangarum kajiwui tui eina hangkahai lei. Ana hanga shanaobing churchbingwui (kazipbing) (English tuili ‘churches/assemblies’ da plural eina matuihaiya) lungli kasaikha pamranu da. Shanaona churchwui lungli (yarui kazipli) khamatui hi kakhayak otna (1 Corinthnao 14:34, 35). Yarui Kazip kaji hi Christianbing khorumkhavai rangarum kahai chili kahona.

Hithada Church kaji tui hi Biblena apong mati eina shichinhaiya. Atam kachida chiwui kakhalata hoshokahai/hokhui kahaiya mibingli kahangna. Ithumna church governmentwui pongli tamvamamankida khalei hili lumashanda Biblena church kaji tuihi apong mati hi eina shichinhaiya kaji phaningunglu. Kala Biblena khamatui apam chili ithumla matuisa kala Biblena kasaikha pamthuikahai chitharan ithumla kasaikha pamsa. Biblena Churchwui pongli kathada matuikhala chithada horzak ithumla matuisi kaji chimangnala pangapa kapai apong kachungkhawui eina kanmira. Ithumna churchwui pongli theikahai Bibleli makazang idea saikora hortahaosa.

### **Khangahan**

1. “Church” kajiwui kakhalat hi \_\_\_\_\_ kaji-na.
2. Lamhangli khalei church chi kajiwui eina hoshokahai/hokhuikahai bing khala?
3. Lamhangli khalei church chi Khristawui church hi eina mangaraicha khala?
4. Denominational church bing chi Khristana haophokhamila?
5. John 17:21na hanga, nathum saikora akha ngasalu \_\_\_\_\_ eina \_\_\_\_\_ akha khangasa thada.
6. 1st Corinthnao 1:10na hanga nathum mayangaroklu, \_\_\_\_\_ da.
7. 2nd Corinthnao 6:17li Prohona hanga, athumwui eina yamshoklu, kala athumwui eina \_\_\_\_\_ da.
8. 1st Corinthnao 1:2li \_\_\_\_\_ khalei Varewui church da kapihaiya.
9. Shanaobing churchwui lungli kasaikha pamki kajina kaji chi kachikatha churchwui lungli khala?
10. Church katonga kaji hi Khristawui \_\_\_\_\_ kajina.

## **KATAM – 5**

### **‘CHURCH KATONGA’ KAJI HI KHIKHALA?**

#### **OUTLINE**

1. Christian kachivana Akuia, Khristali hamkasang.
2. Member kachiva Khristawui azingli akhasera.
3. Athum saikorawui ngachaili leikashi, akhana akhawui kaphaning theikhami kala katomkhami khalei.

#### **NGASANGKHANGARUM**

1. *Christian kachivana Akuia, Khristali hamkasang.* Mangawui katamli ‘church katonga’ kaji hi okathuili khalei Christian saikora ngarumda sakakana da tamngarumhaira. Chi Khristawui phasana, kala chi local church kachivawui memberbing ngarumda kasemna. Jishu hi shitkasanga mi saikorana ngarumda semkahai kahaka phasa akhawui akuiana (Colossiano 1:18). Ithum mi-kumowui phasa hina akui akhamang khalei chithada Khrista akhalattawui phasawui akui chi ana, a maningla katei maleimana. Ithumwui phasa akai saikora akuiwui kahang khangana thada Christian saikora, Khrista, akuiali hamsangda awui kahang nganaphalungra. Kazingram eina okathuili khalei pangshap saikora Jishu Khristali mikahaina (Matthew 28:18). Awui tui kaja Bible hiwui manga eina awui phasali kakaso miya (Matthew 28:19). Okathuili khalei khamashunga Christian kachiva Khrista, Akuiali hamsanga kala athum Awui phasa kaja churchwui akai avava ngasaya.

2. *Member kachiva Khristawui azingli akhasera.* Khristawui phasakai avava ngasada Christian saikora ngaraichasera, kahak kateo maleimana. Athum Khrista maningla akuia katei maleimana. Athum khipakhawui pangshap azingli maleimana kha Khristawui tui chiwui pangshap azingli khaleina. Church katongawui lungli member akhana akhawui tungli pangshap, kala mungkhavai pam malei mana. Member akhana maningakha member ashangvana khangatei memberbingwui tungli pangshap singda mungkhavai mashun maleimana. Akuia, Khristawui azingli saikora akhana. Athumwui sakathei kala sakashap ngateingaroksa lapai kha china akhali akhana hakmei kahai maningmana (1st Corinthnao 12:4-6). Kachichawui sakathei sakashap athishurda churchwui otngarut ngateingaroksa lapai kha akhali akhawui tungli juimeida makhangkamana (1st Corinthnao 12:12-24). Khristawui phasa, Church katongawui lungli member saikora Khristana akuia khangasawui azingli akhana, hakhamei kala teokhamei makhaimana.

3. *Athum saikorawui ngachaili leikashe, akhana akhawui kaphaning theikhami kala katomkhami khalei.* Christian kachivana Christian saikorali chinaongarali lei-

kashi thada leishiya. Athum saikora Varewui shimkhurwui naongarasera (1 John 3:1). Member saikora khangatei member akhana churchwui lungli khuida khalei otmanga chili ningsangmi ngarokka. Kaja saikora phasa akhawui akai avavasera (1 Corinthnao 12:12,13). Khristawui phasa akhawui lungli yurzat kala shang saikora akhana, kala Varewui miktali mayarnaobingwui khaya kaka chithada shanaobingla khaya kai, kala aman sakka (Galatianao 3:26-27). Ngarai kacha phasa akha kaja Khristawui Phasakai akha ngasada Christian saikora khangatei localwui church memberbingwui vangla phaningmiya. Khristawui phasa lungli kaikhangarok maleiphalungmara (1 Corinthnao 12:25). Member saikora ngaraichada leishimingaroka. Kachitha member akhana khananghaiakha saikora khanangaruma kala kachikatha akhana khayakaakha saikora khayakangaruma kala chiwui vang ringphada mathangaruma (1 Corinthnao 12:25,26). Ithum mikumowui phasa akai akhali khama zakahai tharan phasa katongali khangashei chithada manglali ithum saikora Khristawui phasakai avavasera. Chithada sada church katon-gawui lungli member saikorawui vang leikashi, kaphaning theimikhangarok kala katomkhami hi leiphalungra.

### **Khangahan**

1. Colossianao 1:18na hanga, Khrista hi \_\_\_\_\_ kaja \_\_\_\_\_ churchwui akuiana.
2. Matthew 28:18na Jishuli \_\_\_\_\_ kala \_\_\_\_\_ pangshap saikora mikahaina da tamiya.
3. Khristawui phasali kui kayakha kakhala? \_\_\_\_\_
4. Khristawui phasawui lungli member saikora ngaraichaserla? \_\_\_\_\_
5. 1st Corinthnao 12:5na ithum saikora akhamang kaji \_\_\_\_\_ otram khangathana da hanga.
6. Member kachiva Khristawui phasa lungli kanaserla? \_\_\_\_\_
7. Yurzat akhana akhali hakmeida khuila? \_\_\_\_\_
8. Khristawui lungli shanao eina mayarao mangarai khala? \_\_\_\_\_
9. Apam ngatateidali khalei local church saikorawui member saikora phasa akhawui lungli khalei maningkhala?
10. 1st Corinthnao 12:25 li phasa akhawui lungli \_\_\_\_\_ kaikhagarok maleipaimana da hanga.

## **KATAM – 6**

### **‘CHURCH KATONGA’ HI KATHADA ORGANIZE SAKHALA?**

#### **OUTLINE**

1. Okathuili church katonga wui government maleimana.
2. Okathuili head quarter maleimana.
3. Church katonga organize sakhavai hotkhana hi moreina.

#### **NGASANKHANGARUM**

1. *Okathuili church katonga wui government maleimana.* Okathuili church katonga kaja Khristawui phasa wui government maleimana. Kaja chiwui akuia kala pangshap kazingramli lei (Matthew 28:18). Hithada, apong hieinala Kadhara Tuingashitwui church denominational church bingwui eina ngateingaroka. Denomination bingva okathuili athumwui akuia leiya, chancham sada Pope kala Archbishop hkt. Athumva mikumona semkakhui pangshap kaja athumwui sarva kala kathanabingna kapikahai Catechism kala seihawui lairik hikathatha hina churchwui riyana sada shichina. Kha Biblenava Khristali maningla mikumo khipalikha akuia masangasak mana. Khristawui phasa okathuili chiwui member saikorali mungkhavai akhavabing (officers) zangda semkakai organization maleimana. Chili district kala synods maningka division semkakai maleimana. Chiwui memberbing saikora otmanga kathada zatvara kala khi ain zatnapaira kajiwui decision khuikhavai kazip akha rungda chili rakazipser kaji chikathatha chila maleimana. Hikatha otsakbing hiya mikumona khuikhara khangachei kala khamakhao otsakbingna. Okathuishong eina member kateili khangashik leiki kaji mahutli Christian saikora Khristawui lungli akha eina akha manglawui ngarumsak leiya. Christian kachiva kala local congregation kachiva Khristawui lungli machi-hangarokmana (independent) kala ningkhan leiya. ‘Church katonga’ kaja Khristawui Phasa hi okathuili Government kala organization maleimana.

2. *Okathuili head quarter maleimana.* Headquarter kaji hiya khamunga/ akhavabing kaja akuia bing pamkhavai shim chili kahona. Jishu hi akhalat-tawui churchwui akhamang kaji akuia akha sada kazingram hi churchwui akhamang kaji headquarterna (Hebrews 12:2). Denominational churchbinga okathuili center headquarterbing leiya. Akuiana chili pamda apam saikorali khalei denomination saikora ana mungda awui ningkachang athishurda saya. Hi Prohowui church eina mikumona sakakhui churchwui ngateikhangarok chitheikhami apong katei akhana. Kahaka church compound kala school compound chi Prohowui church center maningmana. Leiha (area) akhali ha-

ophok khareiya local church akha china khangatei bingli mataimeikahai maleimana. Okathuili khalei headquarterbingli mikhavai shangashaila maleimana. Center bingwui eina kachiho pao hakashoka kala ali center bingna apam akhawui eina khangatei apam akhali hongung-hongva khangasak hikathatha hi maleimana. Church kachivawui memberbing saikora rangarumda church saikorana zatnakapai shiyan-chikan, kala ain semkhavai apamla maleimana. Kha Khristawui church saikorawui center chiya Khristana akuia sada mungda khalei apam kazingram china.

3. *Church katonga organize sakhavai hotkhana hi moreina.* Mibing kala yarui ahangva kaikhana Prohowui churchli denominational churchbingwui government thada onngasakhavai hotnai. Leiha (area) akhali khalei local church kahakbingna teokhameibingwui tungli mungkhavai hotnai. Chikatha ningai china yur akhawui lungli khalei church katongali organize sakhavai hotnakhangai ning leingasaka. Member kachungkha khareli denominational churchwui member ngasasahaoda mikumona sakakhui church government wui zatkhana hi malaikida athumwui vang saklak haowa. Athum apam ngatateidawui eina mi kachungkha kazipngarumda meeting kasa ningchaglaka. Mibingna church kachungkhali athumwui azingli leingasakngai kala athumna chiwui akhava sangai. Athumwui kuikhamareili khaleiya denominational churchbingwui thada athumna otpam kala otpam kakhuiya akhavabing (offices and officers) leingasakngaiya. Kha hikatha ot hina khamshunga church organizationli kachungkha kakai-katek shokngasaka. Athumna Bibli kazanga khamashunga church government chi makhaongasaka. Ithum Khristawui tuwui tamkachithei chili makanda mazatphalungmara (2 John 9). Ithumna paokapha chi ngacheingasakida ngacheeya (Galatiano 1:6-9). Bibleli ngarumkasangla mangarumsangpai mana kala khuikashokla makhuishokpaimana (Phongkhami 22:18, 19). Kachikathana church katonga hi kachikatha apong akha eina organize sakhavai hotnaakha chi moreina.

### **Khangahan**

1. Churchwui akuia chi kali pamdalei khala? \_\_\_\_\_
2. Khristawui church hi district eina mangayartapairakhala?  
\_\_\_\_\_
3. Ephesus 1:22na hanga, Khrista hi \_\_\_\_\_ akuiana da.
4. Hebrewnao 12:2na hanga, Khrista Varewui wungpamkhongwui \_\_\_\_\_ pamdalei da.  
\_\_\_\_\_
5. Denominationbing okathuili athumwui center malei khala? \_\_\_\_
6. 2nd John 9na hanga, Khristawui tamkachithei \_\_\_\_\_ kanda

sakazat mi chi \_\_\_\_\_ maleimana da.

7. Galatianao 1:7na hanga kaja mi kaikhana nathumli pangapangasakta Khristawui paokapha hi \_\_\_\_\_ da.

8. Phongkhami 22:18na Varetuiwui lairikli \_\_\_\_\_ hi mamayamana.

9. Phongkhami 22:19na Vareituiwui lairikwui eina \_\_\_\_\_ mamayamana.

10. Khristawui phasa kaja 'church katong' hi okathuili organize masakhala? \_\_\_\_\_.

## **KATAM – 7**

### **OKATHUILI CHURCH HI KATHADA ORGANIZE SAKHALA**

#### **OUTLINE**

1. Okathuili local churchmang organize saya.
2. Bibleli makhangachei church governmentwui pongli tamchitheikahai saikora hi Local churchwui pongli sera.
3. Okathuili local churchwui lungli maningla ayarli churchwui akhав-abingna da katei maleilui mana.

#### **NGASANKHANGARUM**

1. *Okathuili local churchmang organize saya.* Mangawui katam khanili (Previous two lessons) chitheihaira kaja okathuili church katongawui leichingki kaji organization maleimana da. Local li khalei churchmangli kathanabing lei kala chiwui organization lei. Paokazat Paulna Ephesusli khalei churchwui ararbingli hokhuida athumli Mangla Katharana mayonmebing sangasakda athumli horsangmi kahai yaonaobingli kala churchli mathalak eina yangsangmi khavai kasatmiya (Otsak 20:17, 28). Mangla katarana local churchwui alungmangli kathanabing leingasaka. Bibleli 'church katongali' yangsangmi khavai kathanabing leira da hangkahai maleimana kala mahanglakmana. 1st Peter 5:2 li Ararbingli athumwui ngachaili khalei yaonaobingli phauikhavai hanga. Athumna arar akha sada athumwui pangli horsangmi kahai local church akhawui lungli khalei yaonaobingwui tungli maningla khangateiwui tungli athumna yangsangmiran maleimana. Kathara tuibing hina chitheimiya kaja Varena Local churchwui lungli maningla ayarli kathana leingasakra kaji awui ningli maleimana da. Marakkhali mi kaikhana phaningpaiya kaja church organizationwui pongli athumna machukda khalei china phameira da Church katonga hi organize sangkhuingaiya. Kha Varewui mangkhamana

katha china mikumowui thangkameili thangmameiya (1 Corinthnao 1:25). Khiwui vang Local Churchbingmangna organization leikhala kajiwui pongli khamatha apong kachungkha leiya. Mikumo ithum hi Varewui khangaran, awui thangmet kala awui ningkachang kaja ana hithada saakha phara da machukahai chili khayashida shurkikajina. Okathuli Local churchwui organization maningla church Katonga khangarumwui organization maleimana.

2. *Bibleli makhangachei church governmentwui pongli tamchitheikahai saikora hi Local churchwui pongli sera.* Kathara tuina churchwui otpaming kala kathanabingwui (offices and officers) pongli matuidaleiakha chi local churchwui pongli matuida khaleina. Church haokaphok atamli, kathara tui saikora makapikuprang lakha, chitharan atam kashakhawui vang da Varena kapangkahai churchwui kathanabing leisaya. 1st Corinthnao 12:28 li Biblena hithada chitheimiya kaja khareyali Paokazatbing, kakhaneli maranbing, kakathumali ojabing, chiwui thili matakha kahai ot kasabing, kazat raikhami bing, khangachonnabing, sarkar, tuiyur khamatuibing, hithada Varena mathangmathang leingasakka. Kha matakha kahai mikumona masakhararra ot sangasakda khalei Mangla Katharawui lemnet chiya atam hunnakhawuivang ngasasai. 1st Corinthnao 13:8-10 li hithada tamchithe haiya kaja kakashungga Varewui phongkhami kaja Bible rara kala chitharan makakashungga chi shimanhaora da. Mangla katharawui lemnet chi ngasam kahai chitharan mangacheila leichingki kaji kathanawui paming chi (offices) leihaora. Zativakida khalei chili Varena Churchwui lungli semkahai kathanawui pam chiya matakha kahai pangshap kaja mangla katharawui lemnet chili machihanmana. Bibleli ithumna Churchwui ararbingwui qualification bingwui pongli kapa tharan arar sakikaji mi chi matakha kahai ot sakashap mi ngasara da kapi kahai maleimana. Matakha kahai ot masashaplala mayarnao saikora churchwui arar sapai.

Leichingda khalei otpaming chiya local churchmangli khaleina, kha hunnakhawui vang leikhangasak otpaming kaja Paokazatbing kala maranbing chia church katongawui tungli leikhangasakna kha chibing chi ara ngasamhaira. Kha church kachidali ararbing kapangkaya (Otsak 14:23). Crete kaho apamli Titus li kachipam hi Keinung kachidali khalei church saikorali ararbing kapangsangmi khavaina (Titus 1:5). Kathara tuizabingna chitheiya kaja ararbing hi church katongawui vang maningla kha local churchwui vangna da. Ephesuswui Ararbing hi athumli Mangla Katharana horsangmi kahai yaonaobingli yangsangmi khavaina (Otsak 20:28). Yaoshang chi Ephesusli khalei local church chili kahangna (Otsak 20:17). Ararbingli athumwui ngachaili khalei Varewui Yaoshangli homkhavai kasoi (1 Peter 5:2). Athum



church katongawui tungli pangshap maleimana. Ithumna mangacheila leichingki kaji Prohowui church organizationwui pongli tamamanda theikhuira kaja chi local churchwui lungli khalei otpangingwui pongli tamchitheida khaleina da. Chithada, makhangachei church governmentwui pongli matu-ida khalei kathara tui saikora hi local li khalei church wui otpangingwui pongli matu-ida khaleina.

3. *Okathuili local churchwui lungli maningla ayarli churchwui kathanabing malei-mana.* Jishu Khrista hi Churchwui akuia shonna. Churchli Prohowui Paokazatbing kala maranbingwui pam kahakva leichinga khiwui vang khalajila aja rashungda ithum athumna kapikahai Varena kasatkhami tui shurdalei. Kha, athum church katongawui kathanabing saikora chiya kazingramli pamdalei. Okathuili athumwui pam rakakhui kala athumwui mahut sada athumwui pamli khanganing mi maleiluimana. Aja church saikorawui kathanabing hi local churchwui lungli khaleina. Hi ithumna kathada theikhuikhalajila kathara tuina chiwui pongli mamatuila kasaikha pamkahai china theingasaka kaja Biblena local churchwui lungli khalei kathanabingwui pongli maningla hiwui pongli hangkahai maleimana. Kapha ot saikorawui vang Biblena ithumli kashungasaka, chithada Biblena hiwui pongli khikha makhamatui hi Varena kachangkhat Church katongawui tungli khamunga kathanabing maleingasak khangaiwui vangna da theikhui (2 Timothy 3:16,17). Biblena khamatuipam chili ithumla matuira kha Biblena kasaikha pamhaikha ithumla kasaikha pamra. Ithum Khristawui tamkachithei chili leichingra kala kapikahai chili makanda mazatpaimara (2 John 9).

### **Khangahan**

1. Otsak 20:17na hanga kaja Paulna \_\_\_\_\_ ararbingli ali samphang khavai pao chihovai da.
2. Otsak 20:28na hanga, “Mangla katharana nathumwui pangli \_\_\_\_\_ yaonaobingwui tungli ngasharlak eina mayonlu”.
3. 1st Peter 5:2na hanga “nathumwui pangli Varena horsangmi kahai \_\_\_\_\_ mathalak eina homlu”
4. Okathuili ‘church katonga’ hi organize sala?
5. Mangacheila leichingki kachi kathannabing hi \_\_\_\_\_ churchwui lungli khaleina.
6. Kachikatha kakashunga phongkhamina Manglawui lemnet tanga-sakhao khala?
7. Mi akhana Churchwui arar ngasakhavai a hi matakakak kahai ot sakathei mi ngasaphalungrala?

8. Otsak 14:23 li, “ \_\_\_\_\_ anina ararbing kapangsangmi” da kapihaiya.

9. Titus 1:5li “saxhangayiya \_\_\_\_\_ churchwui kathana kapangsang khavai ina nali creтели chipam kahaina” da kapihai.

10. Okathuiwui churchrinli local churchwui ayarli kathanabing malei khala?

## **KATAM – 8**

### **PAOKAZATBING KALA MARANBING CHI KHI-PALONG KHALA?**

#### **OUTLINE**

1. Church haokaphok atamli athum hi khamataiya kathanabingna.
2. Athumwui matakxhak kahai ot kasawui pangshap ara ngasamhaira.
3. Athum hi atam kashakhawui vang Varena shichinkasa kathanabingna, leichingki kaji kathanabing maningmana.

#### **NGASANKHANGARUM**

1. *Church haokaphokli athum hi khamataiya kathanabingna.* Okathuili kxalei ot saikora matakxhak kahai pangshap eina haokaphoksera. Mikumo kala okathui hi matakxhak kahai mina masakharara pangshap chiwui manga eina haokaphokna. Kha ajava mikumo kala okathui hi Varena hithada leiranu da samikahai khangachawui ain chiwui athishurda matakxhak kahai pangshap mazangla rashokmamandalei. Chi takam eina Churchla matakxhak kahai pangshapwui manga eina haophoka. Kha church chi ajava matakxhak kahai pangshap mazangla kha Varena hi phara da machuk kahai awui kaphaning ningkachang athishurda mayasangmaman da zatvashumdalei. Khareyali Varewui tui hi matakxhak kahai pangshapwui manga eina khuiramiya kha ara matakxhak kahai pangshap mazangla ithumli tammikashapa Bible ithumwui pangli leihaira.

Church haokaphok atamli paokazatbing hi matailak kahai, matakxhak kahai ot kasa churchwui kathanabingna. Varewui tui phongmi khavai kala church haokaphok atamli otramngathami khavai Varena athumli ngakheikhang kahai matakxhak kahai ot kasawui pangshap miya. Athumli Mangla katharana khamashung katongali thanmira da Jishuna athumli ngashitmihai saya (John 16:13). Paokazatbing kala maranbing hi church haokaphok atamli matailak kahaiya mibing ngasasai (Ephesus 2:20). Biblena hanga kaja paoka-

zatbing eina maranbing hi Varena khare sada churchwui kathana sakhavai kachipam bingna da (Ephesus 2:20). Athumli mikahai matakak kahai ot kasawui pangshap china athum hi Varena chihokhara paokazatbingna kaji-wui machutna (2 Corinthnao 12:12). Athumwui matakak kahai ot kasawui pangshap china athumna hashokda khalei tui saikora Varewui eina khara tuina da shakhi miya (Hebrewnao 2:3,4). Atam akhali Church haokaphok atamli hikatha otpaming kala kathanabing kanalaksai kha ajava athumwui pam kala matakak kahai ot kasawui pangshap saikora makanalui mana.

2. *Athumwui matakak kahai ot kasawui pangshap ara ngasamhaira.* Ithumna thei kaja aja okathuili churchwui lungli paokazatbing maleilui mana kaji, kaja matakak kahai ot kasawui pangshap saikora ngasamhaira. Matakak kahai ot kasa Mangla Katharawui lemnet saikora athumwui otngarut sakup kahaiwui thili ngasamhaora kaji hi Varewui khangarana. Khamaranla, tuiyur khamatuila kala lemnetwui theithangkameila shimanhaora (1 Corinthnao 13:8-10). Kakashunga Varewui phongkhami kaja Bible hi khara tharan chibing chiya shimanhaokida leiphalinga. Varena lemnet saikora hi shitkasang chi akha sada mangarumranglakha eina tangdawui vangmang khamina (Ephesus 4:8,11-13). Ara Bible hi kapida kupsanghaira chithada sada Varewui naomayarawui kakashunga awor chi ithumwui leihaira. Shitkasang chi metkhakashili katharabing saikorawui vang khuirakhamina (Jude 3). Kachangkhat Jishu hi Varewui naomayarana kaji hi matakak kahai ot kasa mangla katharawui lemnetna akhashili katangmakhavaiya shakhi mikahaina (John 20:30, 31). Ot akha hi khamashungna da akhashi shakhi mikahai chi shapkahaina, latluilatluida khamiwui kankhana maleimana. Chithada Varewui tuiwui khamashung hi akhashidali saikorawui vang mashunga da shakhi mikahaina. Akhashida mashunga da shakhi mikahai chi katang mavaila mashungchinga. Aja Kathara tui hina ithum saikoralu Varewui otramkhangathali khamatha ot sakhavai sari khanagavai thada kasahungasaka (2 Timothy 3:16,17). Matakak kahai ot kasawui pangshap china saki kaji ot saikora sakuphaida chiwui pangshap tangasak haira. Chithada Paokazatbingwui pangshap tangasak haoda aja okathuili paokazatbing maleilui mana.

3. *Athum hi atam kashakhawui vang Varena shichinkasa kathanabingna, leichingki kaji kathanabing maningmana.* Matakak kahai ot kasawui lemnet hi church haophokmi khavai khamina. Lemnet china Paokazatbing kala maranbingli pangshap khamina. Kha matakak kahai ot kasawui lemnetbing chi ngasamhaida khamaranla tangasak haira. Chithada sada aja paokazatbing kala maranbingwui pangshap maleiluimana kala athumwui pamli kadhar Paokazatbing kala maranbing kapangkasangwui kankhanala maleimana kaja athumna

saki kaji ot saikora kuphaoda ara maleiluimana. Churchwui lungli otpanging hi leiching khavai sakahai maningphalungmana. Varena Paokazatbing kala maranbingwui pam khuikhavai mi/kathana maleingasakmana churchwui lungli. Athumwui otpam chiya church haophok khavaivang maningla church mayasang ngasak khavai vang kankhana maleimana. Matakhak kahai ot sasai, kala paokazatbing kala maranbing leisai kaji ithumna shitsanga kaja ithum Bibleli shitsanghaoda. Chi takam eina hila shitsanga kaja matakhak kahai ot kasawui pangshap tangasakhaira chithada sada Paokazatbing kala maranbingla ngasamhaira kaji. Biblena tharzari eina tamiya kaja matakhak kahai ot kasawui lemnet leisai kala chi tangasak haira da. Hila Biblena tharlak eina chitheimiya kaja Varena churchwui vang paokazatbing kala maranbing miya kala khuithuilui haowa kaji. Chiwui vang eina aja churchwui lungli paokazatbing kala maranbingwui pam makhaleina. Athumwui pam hiya atam kashakhawui vang leikhangasakna, leichingki kaji pam maningmana. Chithada sada kachithana aja paokazatana kala maranna da hangakha chi kakapikna kala chi mikhanamna. Haokaphok atamlila minamma paokazatbing leisai (2 Corinthnao 11:13). Kakapika minamma matakhak kahai ot kasa mi kachungkha rashokra (2 Thesaloniano 2:8, 9). Mi kachungkhana hangra kaja athum matakhak kahai ot saya kala mina masakharara kahaka ot saya da, kha Jishuna athumli matheimana (Matthew 7:22,23). Paokazatbing kala maranbing hiya atam kashakhawui vang kapangkasang Churchwui kathanabingna, leichingki kaji churchwui kathanabing maningmana.

### **Khangahan**

1. Atam akhali matakhak kahai ot sasaya da Biblena matamchithei khalala?
2. Biblena matakhak kahai ot kasa Mangla katharawui lemnet chi leichingra da tamchitheila?
3. John 16:13na hanga kaja Paokazatbingli Mangla katharana \_\_\_\_\_ katonga chitheimira.
4. Ephesiano 2:20 wui athishurda, Paokazatbing kala maranbing church \_\_\_\_\_ atamli leisai.
5. 1st Corinthnao 12:28na hanga “Varena churchwui alungli kachichawui pam, \_\_\_\_\_ paokazata...”
6. 2nd Corinthnao 12:12 wui athishurda paokazatbing athum paokazatana kaji \_\_\_\_\_ chitheiya.
7. Hebrewnao 2:3, 4 na hanga, “Varena \_\_\_\_\_ kala \_\_\_\_\_ mangla katharawui lemnet chieina shakhi mi.

8. Jude 3 na hanga, "... katharaabingli \_\_\_\_\_  
vaikahai shitkasang chiwui vang ngarar khavai nathumli kapo hi darka sal-  
akhaowa".

9. Phongkhami 2:2li kachikatha paokazatawui pongli kapihaidalei kha-  
la?

10. Churchwui lungli Paokazatbing kala maranbing hi leichingki kaji  
kathanabing maningkhala?

## **KATAM – 9**

### **LOCAL CHURCHBING KATHADA ORGANIZE SAKHALA?**

#### **OUTLINE**

1. Apam ngatateidali khalei church kachiva ningkhan lei.
2. Kathanabingna local church akhawui tungli munga.
3. Local church kachiva khangarumwui organization maleimana.

#### **NGASANKHANGARUM**

1. *Apam akhali khalei church kachiva ningkhan lei.* Khristawui church kachi-  
va denominational churchbingwui ainwui eina ningkhana. Athum Varena  
churchwui vang chitheimikahai Awui ningkachang kaja Biblewui athishurda  
zatkhavai hotnaya. Khadhara Tuingashitli kazanga church, chikatha church  
sakakhavai athumna ngakaowa. Prohona Awui churchwui vang machuk  
kahai awui ningkachang saikora chi hanluida zatna ngasak khavai panglak  
eina athumna hotnaya. Prohona Awui churchwui vang machukahai Awui  
ningkachang saikorawui ngachaili mataimeithui kaji akha chi khikhalaji-  
la Kathara tui athishurda kasa local Church oraganization hina. Kadhara  
Tuingashitwui churchwui khamashunga, haokaphok atamli leikasa govern-  
ment ithumna tamkhui kahai tharan chi aja ithumna horzakda shurkhavai  
sasa. Mangawui Katam chili ithumna theihaira kaja kathara tui athishurda  
churchwui lungli kapangsang kahai kathana saikora hi local churchwui lung-  
li khaleina da. Local churchwui ayarli churchwui kathana maleimana kaji  
hila ithumna theikhuihaira. Local church saikora kachichana kapangkasang  
kathanabingwui azingli khaleina, chi maningla ayarwui eina hakkhamei kala  
juikhamei organization akhana athumwui tungli khamung kaho hi maleima-  
na. "Ningkhan" kaji tuiyar hi khalatali khalatana khamung kajina. Khalatana  
khalatali khanmunga church chi ningkhanwui churchna. Chikatha church-  
li ayarwui juikhamei pangshap eina khamung kaho hi maleimana. China  
khalatana khalatawui kathana kapangkai, pao hakashoka mi ngarankhui,

lansingwui ponglila khalatana yangsanga kala memberbingwui ngachaili khang makhangana mi kaikha zanglala athum khalatana kapang kahai kathanabingna hangmachinmiya. Apong saikoralik mikumowui pangshap kala chijakhawui eina ningkhan lei kaja mikumowui pangshapna khalap kahai maleimana. China Khristali hamsanga kala Bible maningla khangatei pangshap, kaja ain/shiyanchikan maleimana. Khokharum, chan ngazek khavai kakazip, otmanga kakhuiwui ranyei saikora hi khalatawui ningkhan eina saya. Kadhara Tuingashitwui church government chi restore sakhavai local church kachiva ningkhan leiphalungra.

2. *Kathanabingna local church akhamangwui tungli munga.* Kathara tui athishurda sakahai church government wui eina khare sada ngateithui kahai apong kachungkhawui ngachaili hila akhana kaja kathanabing local church akhali langda khamung kaji hina. China Bibleli zangda khalei Varewui ningkachang chi ngachei ngasakhaowa kala masangla leiha(area) akhawui lungli khalei Local church saikora khangarumwui association semkahai chiwui kathanabingwui azingli leingasaka. Hikatha otsak hina naoda Pope eina tangda vashungda leingasaka. Chithda sada, Bible athishurda sakahai church government sakaluishitsa jia kaja kathanabing church akhali langda mamungpaimara. Varewui ningkachang athishurda zatdaleisasijia china khamashung naothahailaga Roman Catholic church sakakhui hi maleisamara. Protestant church (Catholic churchli mamayala kaishokkahai churchbing) kachungkachana local kachungkhawui tungli khamunga kathana lei. Athumli mikahai mingpho kachungkha lei chiya, “agent bing” maningka “travelling agent”. Athumwui ongarut chiya khikhalajila local church kachivali kathada otmanga khaira khala kaji yangsangkhami kala chijakhami china. Athumwui apamli khalei local church akhawui eina akhali toila eina yaozatta. Kha Kathara tui athishurada kapangkahai kathanabingna Local church akhamangwui tungli munga. Khristawui church kahakka bingli kateowa kala khangani bingwui tungli mungkhagai ning leikhavai suiya. Keinung alungli khalei church kakhakbingna ruinganaili khalei kha kateo bingwui local churchbingwui tungli mungkhavai hotnai. Chithda athumna athumwui church ararbingli chihoda ngazankhamei churchbingli mungkhavai sai. Kha chikatha otsak chiya denominational churchbingwui theikakhui kala ningkachangna. Kala hikatha otsak hi khamashunga kala kashenga church organisationli makhaokhangasak wui pheikarna. Local church khangatei akhawui kathanabingna mungkhavai kala yangsangmi khavai sadaleilakha eina tangda church chili kachangkhatwui mashun ningkhan maleiramana.

3. *Local church kachiva khangarumwui organization maleimana.* Khristawui

church saikorawui member kachungkha denominational churchli zingcum atam kasangkha ngarumhaikasa leiya. Athumna atam kasangkha denominational churchbingli ngarumda otsakrumkasa china khamashunga churchwui organisation kathada leikhala kaji mathada matheishingkhui khangasakna. Khareli athumna leikasa denominational churchbingwui thada Khristawui local church kachiva ngarumda organize kasa ningchanga. Chiwui vang eina athum leiha (area) akhali khalei local church kachiva ngarumda kazip kharung hikathatha hi ningchanglaka. Ashangva saikora ngarumda, kathanabing kala lan singmibing zangda organize sangaiya. Local churchwui khokharumli sheikakhut otsak kaja local church khangateili ngarumda khokharum wui ranyei singkaka hikathatha hi sangailaka. Kha Kadhara Tuingashitwui lungli hithada local church khangatei eina ngarumda khokharumwui pongli kapi kahai maleimana. Church kachiva organizationwui lungli ningkhan leiya. Jishuna Church shiniwui vang chithi shini kapiya (Phongkhami 1:11). Church avavawui vang ngatateida chithi avava kapiya. Local churchbing chi leiha (area) akhawui lungli leidalei salala church saikora khangarumwui organization maleisamana. Chili khalei church shini wui tungli khamunga kathanabingna dala maleimana. Keinung kachivali khalei local church saikora kachichawui ningkhan lei. Church government hi Kadhara Tuingashitwui athishurda shurakha, local church saikora khangarumwui organisation malelakmara.

### **Khangahan**

1. “Khalatali khalatana khamung” kaji hi \_\_\_\_\_ kaji tuyar kakhalatna.
2. Biblena “agent” kala “travelling agent” wui pongli mamatuikhala?
3. Phongkhami 1:11 na hanga kaja \_\_\_\_\_ khalei church shiniwui vang chithi kapiya da.
4. Khareili Denominational churchli pamdaleilakha sakasa otsak china achinangarabingwui ningli \_\_\_\_\_ saikora ngarumngasak khangaiwui ning leingasaka.
5. Rarkhamei kala malingkhamei churchbingna ngazankhamei churchbingli mungpairala?
6. Church kachungkhawui tungli mungkhavai kathanabing kakapangwui pongli Biblena matui kahai maleikhala?
7. Kadhara Tuingashitwui lungli khalei church saikora khangarumwui organization maleikhala?
8. Rida haokaphok atamli leikasa chithada sakaliuishit kaji chili khi

hokhala?

9. Church saikora khangarumwui associationwui kathanabing leikhan-gasak hina naoda \_\_\_\_\_ eina tangda vashungasaka.

10. 2nd John 9 na hanga kaja Khristawui tamkachithei \_\_\_\_\_ kanda sakazat mi chi awuili \_\_\_\_\_ maleimana da.

## **KATAM - 10**

### **LOCAL CHURCH KACHIVA KATHADA NINGKHAN LEI KHALA?**

#### **OUTLINE**

1. Khalatana khalatali khamung.
2. Khalatana khalatali khangachon.
3. Khalata hakasang kala mayakasang.

#### **NGASANKHANGARUM**

1. *Khalatana khalatali khamung*. Local church kachiva ningkhan lei kajiwui khamataiya apong akha chiya khikhalajila athum khalatana khalatali khamung hina. Hiwui pongli mangali ithumna tamkakai para bingli (lessons) chitheimiser haira. Khalatana khamungwui mashun kashiman hi local church akhawui vanga ningkhan kashimanwui apong akhana. Churchna awui otmanga kakhui kala kasakhava saikoralu khalatawui ningkhan eina masarathuakha, masangla church chiwui lungli khalei ningkhan saikora shimanhaora. Local chiwui mi makhaning mi khangateibingna athumwui tungli pangshap singphokhaiakha chi local churchwui khamshunga ningkhan shimanchoo kahaina. kha ningkhan kaji hi local church akhana chiwui otmanga kala saran saikora kateili machihanla khalattana kasa chi mang maningmana. Kaja local church kachungkhana churchwui otmanga kachungkhali athum khalatawui ningkhan eina saya, kha lansing kala apong khangatei kaikhali local ayarli khalei churchbingwui khangachonli chihana. Khalatali khalatana khamung china churchli thanda khalatali ngachonkashap kala kakashunga mapungkapha ningkhan khaleiya church sangasaka. Judeali khalei churchwui ararbing atam khashakhawui vang Antiochwui eina khangachon khuisaya (Otsak 11:27-30). Paulna Corinthli pao kapha hashokdalei lakha church khangatei bingwui eina lan eina khangachon samphanga (ngalangman samphanga) (2 Corinthnao 11:8). Philippi li khalei churchna local khangateibingli khalei Paulwui darka wuivang lan eina khangachon chihomiya (Philippinao 4:15,16). Chithda Bibleli local church akhana khangatei local church akhali atam kashakhawui vang lan eina ngachonmi



ngaroka kaji kapa samphanga kha akhana akhawui tungli munga kachiwui pongli kapa masamphangmana.

2. *Khalatana khalatali khangachon*. Varena church sakorali ningkhan leingesak khangaiwui maram khangatei akhana khikhalajila khalatali khalatana khangachon kaji hina. Paokapha haokaphok (in the beginning of the gospel) atamli eina tangdala Philippi li khalei churchna Paulli lan eina ngachonkhamiwui vang Paulna ringkapha kala masotkhami tui phongshoka (Philippinao 4:15). Varewui ningkachang athishurda Local church akhana khalatali lan eina mangachonshaprang lakha eina tangda ningkhanchao kahi (kateili machihanchao kaji) maleimana (not fully independent). Marakhali atam kashakhawui vang khangachon darka kasa leisara kha kathakwui lungli khalatana khalatali ngachonshap khavai hotna phalungra. Ayarwui eina khangachon samphangdaleilakha eina tangda ayarwui eina mungkapaiwui kalashat lei. Local church kaikhava athumwui vang kangateina ngazeklaga khak tami khavai (decision) khamaya mikhavaila sai. Local church kachiva khalata nganingshapserki kajina.

Ava-avana naongarali zatthei khavai tamkhami tharan nao china akhalata ava-avali machihanla pheikar khuikhavai hotkhana darka sai, kaja nao china hotkhana maleiakha matamkhuilak mara. Machihanla kakhui pheikar avava china amang kazat tharan mathameida zatthei khavai tamkakhui ngasara. Chi takam eina local church akhana haokaphokwui eina akhalatta pheikar khuikhavai hotnaki kajina. Khangateina lan eina ngachonda thanzatdalei lakha eina tangda church china amang mazattheirlakmara. Khalatta pheikar chungmeida khuidalei lakha eina tangda khalatta zatthei kaji chungmeida theikhuira. Kala chithada khalatali khalatana khangachon kaji hi otsak eina sakhuida tamkhuira. Chi takam eina harvana anaobingli khalatana ringtheikhavai kachicha khalatali hotnangasak laga, hotkhanawui otsak manga eina tamkhuingasaka. Ana azat phakhuida anaobingli phauida-lei lakha eina tangda anaobing khalata machihanla maringtheilakmara. Kha ana anaobingli khalata phauikhavai tandi sasikaja athum khalata kathakwui lungli haksangda ningkhanhaora kala pingpangmei haora. Harnao kaikhava khareyaliva khalata maphashai mara jira, kha thalala harvana athum khalatawui azat phashai khavai yang eina ngarara. Chithada masangluila anaobingla khalatana khalatali phau kaji hina phameithuiya kaji theikhuira. Hi takam eina local church kaikhaliva athum khalatana khalatali ngachonda okthuithei khavai tandi saphalungra. Kaikhaliva kaharlaga tamkachitheila darka sai. Kha athumna kachangkhat chang khayang eina theikhuira kaja athumna machukasa chili langmeida mathameida sashapa kaji hi. Chithada

athum khamashunga ningkhan, khipakhali machihanla kala khalatali khala-tana ngachonkashapwui lungli haksangra kala mathuisangra.

3. *Khalata hakkasang kala mayakasang*. Hangda khalei tui hiwui kakhala-ta khikhalajila mangasamla khalata otmanga khuivashum kaji chili kahona. Chikatha local churchna khalatali khalatana reisangngasaka kala local church khangatei kachungkha kharshok khangasaka pao kapha ngayaova ngasaka. Varewui tui hiya wungram kaja churchwui athana (seed) (Luke 8:11). Atha kachiva alungli thingrong kharshokkhangasaka kharinga mirin zanga. Chi takam eina Biblelila church shokkhangasaka kala reisangkhangasakwui pangshap zanga. Khamatha wuklungna tui chi khuikasang apam kachivali local church kharshoka. Local church akhana khangatei local church akha shokngasak khavai ayarwui organization darka masamana. Hiwui apong eina yangakha local church hi motheirong eina ngaraingasakpai kaja ayarwui yangsanghami maleilala akhalata haksangkashap wui pangshap akha lei kala atam kashakhawui lungli arong khangatei kachungkha kharshok ngasaka. Khalata mayakasang kala hakasang kaji hi chili kahona. Biblena hanga kaja church hiya khamashungwui shimpfunga kala pakrana da (1 Timothy 3:15). Chithada sada church kachiva khamashung chili katomda ngayao ngasakki kajina. Chithada kasa eina khangatei local church kachungkha kharshokngasaka kala athumnala khamashung chili katomda apam khangateili ngayangasakra. Jerusalemwui church ngaphayanghaowa kala apam ngatateidalei yaovada Tui chi hashoka (Otsak 8:4). Prohowui church ngayangasak khavai kala mayasang ngasak khavai mission agencies kala denominational organizationwui darka maleimana. Khalatana khamung, khalata khangachon, kala khalata haksangkhangasak/mayasang khangasak hiwui manga eina Prohowui church ahangva saikora ningkhan leiya.

### **Khangahan**

1. Kathara tui athishurda Local church akhali atam kashakhawui vang ayarwui pangshap eina khamung hi mamaya khala?

2. Local church akhana atam kashakhawui vang ayarwui khangachon kakhui hi kathara tui athishurda mamayakhala?

3. 2nd Corinthnao 11:8 na hanga, kaja Paul churchbingwui eina \_\_\_\_\_ samphanga da.

4. Philippinao 4:15, 16na hanga, Philippinaobingna Paulwui darka kasali kala khavatli shichin khavai lan eina \_\_\_\_\_ chihomiya.

5. Philippinao 4:15na hanga, pao kapha \_\_\_\_\_ wui eina

thuida Phillipinaobingna Paulwui vang khangachon chihomiya da.

6. Khalatali khalatana khangachon kala kakatom kajiwui pongli tamkhuikhavai chancham khani chithei kahai chiya \_\_\_\_\_  
kala \_\_\_\_\_

7. Khalata hakasang kala mayakasang kaji hi khili kaho khala?

8. Luke 8:11 na hanga Tui chi \_\_\_\_\_ wui \_\_\_\_\_  
da.

9. 1st Timothy 3:15na hanga Church hi khamashungwui  
\_\_\_\_\_ kala \_\_\_\_\_na da.

10. Otsak 8:4na hanga sakhangathabing ngaphayanghaowa kala  
\_\_\_\_\_ kachivali vada \_\_\_\_\_ hashoka.

## **KATAM – 11**

### **KHIWUI VANG VARENA APAM NGATATEIDALI KHALEI CHURCH SAIKORALI NINGKHAN EINA PANNGASAK KHALA? OUTLINE**

1. China kathanabing kala memberbingli mataimeida reisangasaka.
2. China khami kala ot kasali reisangasaka.
3. China churchwui lungli pangapada kaikhangarok mashokngasakmana.

### **NGASANKHANGARUM**

1. *China kathanabing kala memberbingli mataimeida reisangasaka.* Khiwui vang Varena apam ngatateidali khalei local church saikorali ningkhan eina panngasak khala kaji matheishinkhuirasalala Biblena hanghaoda ithum chiwui kahang khangana darka sai. Kha Varena khiwui vang local church kachiva ningkhan eina panngasakngai khala kaji wui maram khamatha apong kachungkha ithumna theidalei. Kachungkha chiwui ngachaili akha chiya khikhalajila china church kachivawui lungli khamatha kathana kala member kachungkha shokngasaka. Ayarwui eina kathana khuizangda ana church thandalei lakha eina tangda local li leida khalei kathanabing athum khالاتa mareisangrarmara. Local chiwui memberbingna saki kaji otngarutbing chi ayarwui memberbingna samidalei lakha eina tangda chiwui memberbing thakta mareisangrarmara. Vareshirin hiya mipha kachiva kapha otwui vang kachichawui kashap khuishokngaroki kajina. Local kachivali khalei church member kachivali athumwui kashap eina tangda reisangasak khavai kala kashungasak khavai Varena churchwui organization hi kasemna. Local akhali khalei mibingna athumwui kathanabingli athumwuili chihora jilala

chi athumwui ningkachang athishurda kasana, chithada kachichawui saran sakida sakkhana maleimana. Denominationwui church organization hina local church akhawui reikasangli tarakha sheisha ngasaka. Romeli khalei achinangara bing khamatha kala theithangkhomei eina pemda leidakhaleiwui vang kala akha eina akha katomtheilak eina katomngarokda hangmachinmi ngarokda khalei theilaga Paulna Romnao 15:14 li athumli masotkhami tui hangkahai leiya. Mibing chi ningkhan eina panda khalei local churchwui lungli khalata reikasangbingna. Kha Hebrewnao 5:12-14 li memberbing mareisangkathewui vang athumli kahar kahai leiya. Hiwui mibing hi atam kasangkha church member sarashum kahaibingna kha mili matamchitheishaprang kajibingna. Athumli tamkachitheiwui ot satheikhavai hotkhana kala experience leikhavai hangmiya. Tamkachitheiwui ot kasa manga eina kathada tamchitheira kaji tamkhui ngasak/theikhui ngasaka. Churchwui kathana saki kaji mi chi kathanwui otli experience leikahai mi ngasaphalungra. Varena local church kachivali kathanaowui vang kachicha khalatali chihan ngasakngai chithada kasa eina kathakwui lungli kathanabing athumwui kashapwui lungli reisangra.

2. *China khami kala ot kasali reisangasaka.* Denomination bingwui lansin kala organizationli pheisa hi atam kachida headquarterbingli chihovaya. Kha ningkhan eina panda khalei Khristawui churchbingva okathuili headquarter maleimana. Athumna ngashaikakhui lan chi localwui lungli Prohowui ot manga khuikhavai shichinna kala lan chi athumwui ningkachang athishurda kali shichingai khala chili shichina. Ayarwui eina yangsangmi khavai kathana leikhangasak kala headquarter saikora khangarumwui organization hikathatha hi makatom phalungmara. Chithada kasa china lan chungmeida mingasaka. Member akhana ana mida khalei lan chi local church sakakali shichindalei da theisijia khiwui vang chungmeida mamingaira khala. Awui ramli khi khavat leidalei kaji anala tharлак eina theidalei, kala awui khangachon manga eina khavatbing chi mensangda mathuisangda khalei kala reisangda khalei chi ana theira. Khamili katom khavai phameithui kaji apong akha chi khikhala jila khamiyabingli churchwui otmanga hangchitheida athumwui khangachon kayakha darka sakhala kaji hangkachithei hina. Varena awui ningkachang athishurda local churchwui lungli kathada lan shichinra kajiwui pongli samikahai chi khamiyabingli henmeida mingai khavai kasatkhami kala katomkhamina. Chi takam eina Varewui khangaran china mipha saikorali Churchwui otmanga katongali sangairareo kahai ning-wuklung chi chungmeida leikhavai katomiya. Mission organizationna kachikatha akhawui vang churchwui ot masamimara kaji hi member kachivana thei. Kaja chi

awui saranna. Ot sakhavai leisaakha chi ana saphalungra. China localwui memberbingli saran otngarut leingasaka khangatei ayarwui ashangva akhana saki kaji mahutli. Varena local church saikorali ningkhan eina pankhavai sami kahai hi khami kala ot kasali reisangkhangasakwui phameithui kaji apong akhana.

3. *China churchwui lungli pangapada kaikhangarok mashokngasakmana.* Kaha-ka ngalunggui avava chi khara akha eina khalaprumhaikha, ngalungguibing chi ningkhan maningmana kaja athum saikora khangashik leiya. Ngalingbingwui ngachaili akha kongli tazanghaiakha china khangatei katongkhali ngakhunzangserhaora. Kha ngalungbing chi makhalaprumhaisaakha akha tatunghaisalala khangateibingli mangakhunzangmara. Kaja athum machihan ngarokmana. Ngaheoyangda khalei chancham khani hina chitheiya kaja khiwui vang church kachivali ningkhan leingasak khala kaji. denominational organizationbingna church saikorali khalapngaruma kala athumwui ningkhan khuithuimihaowa. Athumwui ngachaili akhana mathuihaiakha khangateibinglila nguida thanthuihaora. Athum saikorali yangsangmida khalei kathanabingna nguida tamchitheiakha church saikora chi shurthuihaora kaja athum saikora khangashik lei. Church organizationwui pongli Varena phara da samikahai china phameithuiya kaja china shitkasang naothahailaga mathuikahai kala nguida tamkachithei mashokngasak mana. Local church kachungkhana kathara tui athishurda mamayondaleisalala khangatei churchbingna shitkasang chili nganingchingpai khikhala jila athum ningkhan eina panda khaleina. Hithada Varena local church saikorali kachicha nigkhan eina pan ngasakngai khiwui vang khalajila china kathanabing kala memberbingli reisangasaka, khami kala ot kasali manga kuingasaka, kala china nguida tamkachithei kala shitkasang naothahailaga mathui kahai hikathatha mashokngasak mana.

### **Khangahan**

1. Romnao 15:14 na hanga kaja church memberbing akha eina akha \_\_\_\_\_ ngarokshapa da.
2. Hebrewnao 5:12 na hanga, nathum oja \_\_\_\_\_, kha Varetui pheisin khare chi nathumli tamchithei khavai khangatei akha phasangfarali.
3. Varena hi phara da sakahai chi shurala ana khiwui vang hithada sakahai khala kaji matheisalala?
4. Vareshirin hiya mipha kachiva kapha otwui vang kachichawui \_\_\_\_\_ khuishokngaroki kajina.
5. \_\_\_\_\_ ot kasa manga eina kathada tamchitheira kaji theikhu-

iya.

6. Khamiya china mingamei khavai churchwui \_\_\_\_\_ ali chithei phalungra.
7. Organizationna member akhana sakikaji \_\_\_\_\_ awui vang masamimara.
8. Khara akhana khalaprum kahai ngalungbing chi \_\_\_\_\_ maningmana.
9. Shitkasang naothahailaga mathuikahai local church akhana khangateili \_\_\_\_\_ mana.
10. Church kachiva ningkhanrin khaleiwui khamatha matheishap khala?

**KATAM – 12**  
**CHURCH EINA SARKARWUI**  
**NGATEIKHANGAROK HI KATHADA NGAHEORA KHALA?**

**OUTLINE**

1. Sarkar ayur ngatateida khalei chi khimamei khala?
2. Sarkarwui aphaningbing chi khimamei khala?
3. Khristawui wungram hi kathada wungpan khangasakhala?

**NGASANKHANGARUM**

1. *Sarkar ayur ngatateida khalei chi khimamei khala?* Church kathada pankhala kaji eina ngaheo khavai atam hitharan yur saikorali sarkar hi kathada pankhala kaji tamkhangarum hi phalaka. Chili matailak eina ngalei kapan ayur kathum sada leiya. Chibing chiya: (a) Anarchy (b) Democracy kala (c) Monarchy. Anarchy kajiwui kakhalata “ain makhalei” kajina. Hi kachikatha maong khala jila khanao-kharei makhalei kala kahak-kateo makhalei, khamunga makhalei mipan/rampanna. Chili sarkar maleimana kala pangshap kasinga mila mangavamana. Hikatha rampanli mikhayung, ngamakhangasao kala yarui khonkazar chungmei shoka. Hikatha apamli ain kasingbing kaja shipai kala police maleimana; kala mashun-makhui yangmi khavai pangshap kasingabingla malei mana. kachangkhat eina kahangna kaja Churchva hikatha rampan maningmana. Ngalei khamungabingwui kahang makhangana bingli Biblena khayon miya (2 Peter 2:9, 10). Vareshirin hiya Khristawui pangshap kala Awui tui chili pheisin salaga khaleina. Chithada sada churchrin hiya Anarchywui rampan katha maningmana. Democracy kaji hiya Yaruipan kaja yaruina kapanna sarkar chili kahona. Chi yaruina mayada kapangka kahai minganingbing china

khamunga sarkarna. Yaruipanli kachichawui ningkachang eina kala ningkhan eina minganing kakapang leiya. Chithada sada ruichumnao saikora khamunga ngasakapai mashun kala kachichawui ningkachang minganing kapangka kapa-iwui mashun leiya. Kha churchva yaruipan maningmana. Churchwui akuia, Khristava mangacheikapaiya khamungana. Churchwui lungli awui khangam khare pam khuikida kakashunga mi akhala maleimana. Churchwui member-na awunga katei kapangkhavai mashunla maleimana. Yaruipan hi okathuiwui sarkar pankhavai vanga mathalak kahai rampan akhana, kha churchwui van-ga maningmana. Khristawui phasa kaja church hiya wungpanna (Monarchy). Wungpan kaji hiya awungana kapanna ngalei chili kahona. Hi kachikatha sark-ar khala jila mi akhana pangshap saikora singda khamung sarkarna. Wungram chili pangshap saikora khamashunga awungawui pangli lei. Awui ningkachang athishurda khamung chili khangahan sakhavai khipalikha mashun mikahai maleimana. Hina Khristawui wungram kaja churchwui wungpan kathada leikhala kaji mathalak eina theikhavai ngachonmiya. Kazingram kala okathui-wui pangshap saikora Jishuwui lei (Matthew 28:18). A ithumwui awunga kala khamungana (John 18:37). Kala ithum Awui wungramwui ruichumnaobingna (Matthew 16:18,19). Church hiya Khristana awunga kasa wungpanna. Sashap, pangshap saikora Awuili lei.

2. *Sarkarwui aphanbing chi khimamei khala?* Sarkarwui aphan kaja akai bing chiya: (a) legislative (b) judicial (c) executive. Hibing hina. Lagislative kaji aphan hina yurwui vang ain semiya. Aphan hili ithumna House of the as-sembly dala hoya. Chithada sada legislative hi ayin semkhavai sakahai sark-arwui akai akhana. Yurwui ain athumna kapimiya. Judicial kaji aphan hina ainwui athishurda mashunmakhui yangsangmi kala ain hi athumna khalat-miya. Mibingli ainwui athishurda bichar samida khalei ngalei akhawui lungli khalei karot saikora ngarumda Judicial hi kasemna. Executive hina ain chi otsak eina sashoka. Sarkarwui akuia kaja prime ministerna minganing sada chiwui pam khuimiya. Mi chi khutlai kasinga raimibing kala policebing- wui akuiana. Yurwui ain saikora ana otsak eina sashok ngasaka. Chithada sada executive hi sarkar kachivawui ain otsak eina sashokhamiya sarkarwui akai akhana. Sarkar kachivali Legislative hina ain semma, judicialna ain khalatmi-da mashunmakhui yangmiya, kala executive hina ain chi otsak eina sashok-miya.

3. *Khristawui wungram hi kathada wungpan khangasakhala?* Khristawui wun-gram kaja church hi wungpanna kaji apong kathum eina hangpai:

(a) Ana ain semma (b) ain chi Ana phongmida khalatmiya (c) Ana ain chi otsak eina sashok ngasakda zatna ngasaka. Churchwui lungli khalei sarkarwui

aphang kathumwui pam saikora Ana khuiya. Ali sokhamiya, akhamang kaji khamunga, awungabingwui awunga kala akhavabingwui Akhava da hoyo (1 Timothy 6:15). A hi okathuiwui awungabingwui wungnaona (Phongkhami 1:5). Churchwui kathana khipanakhala Awui ain makapimana. Kha mangla katharana phongmida kala kasatmida paokazatbingna kapiya (John 16:13). Mikumo saikorali Khristawui tamkachithei china khanaowa zimiksholi bichar sara (John 12:48). Ithum saikora Khristawui bicharli kanganingser phalungra (2 Corinthnao 5:10). Jishu hi ithumwui awunga, Proho, akhava, kala khamungana. Christianbingli tangkhamangwui eina khuiungmilaga panngasak haida khalei wungram chi Khristawui churchna (Colossiano 1:13). Wungram hili kazanga mipha saikorana wungram hi kachikatha wungram khala kaji theikazak rano. Khipakhala churchli mungkhavai mazangmana. Khipakha churchwui ain semkhavai chili mazangmana. Prohona awui churchli ngarumsangkahai mi saikora malung khanima Awunga Jishuli hamkasanga mibingna.

### **Khangahan**

1. "Ain makhalei" kaji hi khi tuiyarwui kakhalat khala?
2. "Khalata khamung" kaji hi khi tuiyarwui kakhalat khala?
3. "Awungana khamung" kaji hi khi tuiyarwui kakhalat khala?
4. Ain otsak eina sashok khami sarkarwui aphanng chi kachipa khala?
5. Ain khalatkhamiya sarkarwui aphanng chi kachipa khala?
6. Sarkarwui aphanng kachipana ain semkhala?
7. 1st Timothy 6:15 na hanga kaja Jishu hi \_\_\_\_\_ wui \_\_\_\_\_ kala \_\_\_\_\_ wui \_\_\_\_\_.
8. John 12:48 li Jshuna hithada hanga kaja awui \_\_\_\_\_ khanaowa zimiksholi bichar sara da.
9. Colossiano 1:13na hanga kaja ithumli \_\_\_\_\_ khuizangmi haira da?
10. Khristawui wungram hi yaruipan eina kapanna wungram maning khala?

### **KATAM – 13**

### **KHISADA MIKUMONA KATHANALI SHURKHALA?**

### **OUTLINE**

1. Pangshapli khangachee.
2. Saman ningkachang (otpam /khamakhao lan ningkachang).
3. Ngayokhavai chili kashur (miwui kasa thada kasa/miwui shakhui-



laga kasa).

## NGASANKHANGARUM

1. *Pangshapli khangachee*. Sarkar ayur kachivali mibingna khiwuiwang kathanali shurkhala kaji maram leisera. Maram akha chiya khikhalajila pangshapli khangachee hina. Awunga katha kathana akhana pangshap khalei chitharan awui kashurabingli ali shurkhavai tandi akha ngasapai. Chikatha kashurabing kathanali ngacheelaga kala khangacheewui vang shura. Kha Vareshirinliva kathanabingli shurkhavai memberbingli pangshap shichinlaga tandi masamana. Varena mikumoli awui kahang nganakhavai tandi masalak mana. Pangshap saikora Jishuwuili leisalala Ana khipakhali Awui kahang nganakhavai tandi masamana. Awui kashurabingna Ali ningkhan eina shura. Churchwui lungli kathanabingna chithada kasa chi khamashungna. Kashurabingli kahang nganakhavai tandi kasawui mashun kala pangshap athumwuili maleimana. Mi akhana okathuili pangshap khaleiya, khangam-kharei ngasalala ana member khipalikha ali shurkhavai tandi masapaimana. Churchwui kathana khipakha memberbingna ali ngacheeda khayashihaowa kajiwui vang ana thanra majipaimana. Christianbing makapha chili ngacheephalingra, kha mikumoli mangacheepaimana. Jishuna hanga “Phasali sathatshaplaga manglali masathatkharar athumli mangacheelu” (Matthew 10:28). Ngalei khamungabingna athumwui pangshap shichinlaga mungdaleilapai kha Khristawui wungramli chithada masamana. Biblena hanga, “Leikashili khangachee maleimana. Kakashung leikashina khangachee shiman ngasaka” (1 John 4:18). Khangam-kharei nagasahaowada kala mibingna awui pangshapli ngacheedaleira da ana churchwui kathana sara da maphaningpaimana.

2. *Saman ningkachang (otpam/khamakhao lanli ningkachang)*. Mikumowui ningli kathanabingli shurkhangaiwui ningai leikhangasak kakhaniya maram chiya saman ningkachang hina. Otpamli ot kasabingna akhavawui kahang athishurda sadakhalei hi chiwui vangna. Ana awui akhavana mikida khalei ngalangman mang chili yanga. Hina maram sada mibing kaikhali kachikatha akhana awui kahang ngana khavai lan eina suikhuipai. Chikatha mibingna khamakhao lan samphangaiya. Ningkatharwui otpam hiya khayakalaka. Leih khalonli ngalangman samkaphang chilli khangui maleimana. . Kha dharmarinliva ithumna kathanabingli kashurwui marama hi chi maningmana. Ning makathar kashura kaikhana awui ningli khalem eina Bible samphangakha kala kachikatha kankhana ot akha samphangakha kajiwui kachihan eina shurdaleilapai. Mi kaikhana pheisa kala lan tongkhuikhavai dharmarinwui kathana sadaleilapai. Kha hikatha ningphun-ningrin hi Vareshirinliva khamatha

ningphun-ningrin maningmana. Churchwui ararbingli kasoda yaonaobingli amanwui vang maningla kha ningkachang eina mayonmi khavai hanga (1 Peter 5:2). Marakhaliva kashanga member akhana phaningsalapai kaja a lan kachungkha leihaoda church chi ana mungpaira da. Kala awui ningkachang kala kaphaning saikora chi member kachivana khayashiphalungra da kaja ana churchli lan kachungkha ngachonhaoda. Kha churchwui lungli khayashi khangasak hi china maningmana. Pheisali leukashi kaho hi churchwui alungli maleingasak phalungmara. Kaja chi makapha ot saikorawui angayungna (1 Timothy 6:10). China kathanabing kala kashurabingli makhaongasaka. China makakashunga alila churchwui lungli kathanawui pam samphangasaka. Churchwui lungli mi khipakhali pheisawui vang kathana masangsaklu.

3. *Ngayokhavai chili kashur (miwui kasa thada kasa/miwui shakhuilaga kasa)*. Churchwui lungli khathanawui pongli khamashunga chiya khikhalajila ngayokhavai sachitheihaimi kahai chili ngayolaga kasa china. Vareshirinliya kashurabingna kathanabingli khiwui vang shurkhala jila athumwui kasasa sada athum thangaihaida kashurna. Hi khangatei saikorali hakkhamei kala khayakameithui kaji kashura akhawui ningphun-ningrina. Hikatha leadership hina phameithui kaje kathana shokngasaka. China kachikatha akhawui leadership chi awui kasakhava athishurda leingasaka. Langmeida kathana akhana otsak eina ringchitheida ngayokhavai khangasa hina kashurabingli henmeida kasatmiya. Mikumowui vanga ngayokhavai chili ngashanlaga khashurna paimeiya. Chithada sada churchwui wungpanliwa kathana akhana yaruina ngayokhavai akha sada ringkachithe chi china khamataiyana. Bibleli leadershipwui pongli kapikahai tamkachithe saikora kathana akhana yaruwui vang ngayokhavai khangasa kaji chili pheisin salaga tamchitheihaiya. Kathana akhana ngayokhavai khangasa kaji hi Vareshirinwui leadershipwui pongli theishinghui khavaiwui khamataiya tuikui akhana. Okathuina kathei wui ngachaili Jishu hi hakmeithui kaji ngayokhavaina. Biblena hanga kaja Jishuna otsak eina ngarumda tamchitheiphoka da (Otsak 1:1). Awui tamkachithe chi shurkhavai Ana ithumli tandi masamana kala Ana ithumli okathuili saman mira da ngashit kahaila maleimana. Kha thot kachidali Ana hakmeithui kaji kathana ngasaya. Mi chungkhameina kathana kateili langda Ali hamsanga kala chigatchaowa. Hi khiwui vang khala jila Ana mibingli a thada okthui khangaiwui ning sangmiya. Kathana akha sada ana ithumli ngayokhavai akha ngasada otsak eina sachitheida kathanwui pangshap chitheimiya. Khiwui vang mibingna kathanabingli shurakhala kaji hi Ngayokhavai chili ngashanlaga kashur kaji hina juimeikap kaji kala phameikap kaji maram akha ngasaya.

## **Khangahan**

1. Khristana Ali shurkhavai mibingli tandi masakhala?
2. Matthew 10:28 li hithada kapihaiya "... kha \_\_\_\_\_ phasa eina mangla khanini shimanmi kashapa Vareli ngacheelu".
3. 1st John 4:18 na hanga "\_\_\_\_\_ leikashina \_\_\_\_\_ shiman ngasaka".
4. 1st Peter 5:2 na pheisali \_\_\_\_\_ da hoi.
5. 1st Timothy 6:10 na hanga "\_\_\_\_\_ \_\_\_\_\_ leikashi hi \_\_\_\_\_ saikorawui angayungna".
6. Kathana thakhavai hotkhana kaji hi kachikatha tuiyarwui kakhalat khala?
7. Otsak 1:1na hanga kaja Jishuna \_\_\_\_\_ eina ngasoda \_\_\_\_\_ da.
8. Okathuili hakmeithui kaji kathana chi khipa khala?
9. Churchwui leadershipmangli maningla kaja phasarinwui otpam kakhuilila ning-wuklung kathar hi khaya maka khala?
10. Khiwui vang kathanabingli shurkhala kajiwui phameikap kaji maram chi khikhala?

## **KATAM – 14**

### **KHIWUI VANG CHURCHWUI LUNGLI NGAYOKHAVAI HI KHAMATAIYA NGASAKHALA?**

#### **OUTLINE**

1. Khiwui vang khalajila ngayo khavai kajiwui kakhalat chiwui vang einana.
2. Ngayokhavai darka kasawui vangna.
3. Ngayokhavaiwui pangshap khalei chiwui vangna.

#### **NGASANKHANGARUM**

1. *Khiwui vang khalajila ngayo khavai kajiwui kakhalat chiwui vang einana.* Ngayo khavai kaji/ khangayo kaji hiya otsak eina sakachithei chili kahona. China tuieina mahangla otsak eina chitheiya. Chiya mi kachivana theilaga chiwui athishurda shurkhavai haimikahai maong/ara (Pattern) akhana. Biblena hanga kaja Jishuna ithumwui vang ngayokhavai otsak khamatha sachitheimi chithada sada ithum Awui pheikar chili shurkhavai da (1 Peter 2:21). Ithum saikorawui mangali Jishuna mirinwui shongza khangakhui kathada zatkhalakaji chitheimi chithada ithumla zatthei khavai. Ithumna zatkida khalei shongza chi pailak eina theishingkhuipai khiwui vang khala

jila Ana ithumwui vang chiwui maong (pattern) tharzari eina chitheimihaira. Ngayokhavai kaji hi chili kahona. Mibingli chithei khavai kachikatha otyur akhawui eina akai kateokha khuikashok chili “sample” da hoya. Shakhui kapai maong akha chili “ensample” da hoya. Chithada tuiyar khani hiwui kakhalat apong kachungkhali ngaraichaya da hangpai. Mi saikora ‘sample’ hi khikhala kaji theiphalungra. Leih khalon mi china ot khayor chitharan mibingli awui otyurbingwui sample chitheiya khalobingna awui ot ningchang khavai ana sample khamathatha chitheiya. Ana mibingli awui ot lomikhavai tandi masamana kha sample khamathatha chitheida china mibingli lokhangai ning leingasaka. Christianwui mirinwui ngayokhavai khangasala chi eina ngaraichai kala chi khamashungna. Chithada ithumla Khristawui vang mi kachungkha yuikhui kashapa, mina ningchang kapaiya sample ngasaphalungra. Ngayokhavai hi khamathala ngasapai kala zakashila ngasapai. Biblena hanga kaja makapha keinung Sodom eina Gomorrah hi ithumna tamkhuikhavai vang ngayokhavai akha sada haimi kahaina da (Jude 7). Varena makaphabingli kathada sashiman khala kaji tamkhui khavai haimikahai ngayokhavai akhana. Lamhangli zatdalei lakha Israenaobingwui mashitkasang otsak chi aja ithumwui vang ngayokhavaina (1 Corinthnao 10:6, 11). Chithada sada ngayokhavai kaji hi Varena ithumli khi sangasakngai khala kala khi masangasakngai khala kaji tamkhui khavai chitheikhami chili kahona. Christian kachiva khamatha maningakha zakashiwui ngayokhavai ngasapai khikhala jila awui kharinkharak kala kasakhava otsak china mili khamatha maningakha zakkashi acham chitheishonda khaleina. Khamatha sakachithei kala ngayokhavai hi churchwui lungli darka salaka, khiwui vang khalajila khamatha ngayokhavai hiya pailak eina theishingkhuida shurpaiya.

2. *Ngayokhavai darka kasawui vangna.* Khamtha ngayo khavai hi churchwui lungli khamataiyana kaja churchwui lungli chi darka salakhaowa. Okathuili kakashunga ngayo khavai darka salak haoda Varena awui akhamang kaji naomayara chi chihorakhamina. Varena mikumoli zingcum shashali langda ngayurahaira kha mikumona Vareli Khrista kharawui thili tharlak eina theinaowa kala bhaptanaowa. Okathuina kahakka oja kala kathana kachungkha theihaira kha Jishu katha khalatawui tamkachithei horzak tazak eina chitheimikashap kakashunga kathana maleimana. Atam kachida okathuina tamkhuingai kala tamkachithei chili nganangailakga. Tamkhami kala tamkachithei hi darka salakdalei aja rashungda. Jishuna ali kashurabingli tamchitheida athumwui mirinli Ana sada khalei saikora mibingna theingailaka. Aja okathuili tamkachithei ayur ngatateida tamkachithei ojabingna pemkahaina. Kha khalatawui tamkachithei athishurda ringchitheida khalei oja tanglakka.

Pao hakashoka Timothyli hithada hangkahai lei, kaja akhalatala kala awui tamkachitheilila ngashar khavai, chithada kasa eina awui tui khangana bingla huikhuira da (1 Timothy 4:16). Churchwui lungli kathana sakhangai mi sorngasaida lei kha ngayokhavai sakhangai mi teolakga. Churchwui alungli kala ayarlila ngayokhavai sakhangaiya mi darka salakdalei. 1st Timothy 4:12 li Timothy hi shitkasangbingwui ngayokhavai ngasaki kajina da kapihaidalei. Kathanabing Churchwui alunglila kala ayarlila ngayokhavai akha khangasa hi darka salakdalei. Okathuina khamatha ngayokhavai darka sai kala churchna shurkhavai khamatha ngayokhavai darka sai. Ngayokhavai hi matailak kahai akha ngasai khiwui vang khalajila chi darka salakhaowa.

3. *Ngayokhavaiwui pangshap khalei chiwui vangna.* Ngayokhavai hi darka salak haowa khiwui vang khalajila chi pangshap leilaka. Paulna hanga kaja awui tamkachithei kala awui hakashok tui hi mikumowui thangmetwui kasuiwui tui eina maningla kha mangla katharawui chitheikhami kala chiwui pangshap einana da (1 Corinthnao 2:4). Paulwui ot manga valakga, khiwui vang khalajila a hi ngayokhavai kahakka mi akha khangasawui vangna. Mikumo akhana tui apa akhala mamatuila kapha pao hashokpai. Bibleli “Abelna hithada hanga” da kapi kahai malei mana, kha a thihaisalala ana sakahai khamatha ot china ngayo khavai akha ngasada aja rashungda ithumli matuichingdalei (Hebrewnao 11:4). Enoch, Abraham kala Joshua athum hi tui matuithelak kahai mibing maningmana kha athum hi otsakwui mibing kaja hangkahai athishurda kasa mibingna. Yanglu athumna ngayokhavai akha kasawui pangshap. Aja Prohowui church alungli matuikathei mi sorngasaida lei kha otsak kazang mi maleimana. Chikatha kathana hi ngazanlak kahai kathanana. Kha pangshap khalei kathanao china mibingwui eina khayakashi kachungkha samphanga. Awui khamatha otsakwui vang mibingna ali shangaiya. Awui khamathawui vang a pangshap leilakga kala ana mi kachungkhali ngacheingasak shapa. Church alungli kala ayarli awui mirin hi pangshap leilakga. Jishu Khristawui mirinna okathui kathada ngacheingasak khala kaji machukyangu. Zingkum thingkha shachikoli langdawui lungli Ali kashura mi thingkha katha thingkhana A thakhavai (a takam eina shokhavai) hotkhana, aruila mangasamla mi kachungkhana A thakhavai hotnachingdalei. Okathui Ana ngacheingasakga. Kahakga kala pangshap khaleiya raimibing, ngalei, kala wungram kachungkha kongluida shimanhaowa kala athumwui khararchan malaihaowa kha Khristana sakahai otmang chi haksangmamana. Jishuna moreipam, okathui hili ngacheingasaki kaji chili khipakha pangshap maleimana. Chithada, ngayokhavai hi churchwui lungli juilak eina darka saya khiwui vang khalajila chi pangshap leilakga.

## **Khangahan**

1. 1st Peter 2:21na hanga kaja Jishuna ithumwui vang \_\_\_\_\_ khavai haimi da.
2. Ngayokhavai ayur khani chi khikhala?
3. 1st Timothy 4:16na hanga “\_\_\_\_\_ ngasharlu kala nawui tamkachithei chili”.
4. Ngayo khavai eina lupa kachipa pangshap leimei khala?
5. 1st Corinthnao 2:4na hanga Paulwui tamkachithei hi mangla katha-rawui \_\_\_\_\_ kala pangshap einana.
6. Hebrewnao 11:4 na \_\_\_\_\_ hanga kaja Abel thihaisalala \_\_\_\_\_ dalei.
7. Okathuili hakmeithui kaji ngayokhavai chi khipa khala?
8. Ngayo khavai kaji tuiyar eina kakhalat khangarai tuiyar khani chi hanglu.
9. Hebrewnao 11:4na khipawui ngayokhavaiwui pongli hangkhala?
10. Lamhangli zatkasa Israelnaobingwui mirin ithumwui vang ngayokhavai mangasakhala?

## **KATAM – 15**

### **CHURCHWUI LUNGLI NGAYOKHAVAI NGASAKI KAJIBING CHI KHIPALONG KHALA?**

#### **OUTLINE**

1. Khrista.
2. Churchwui ararbing kala Deaconbing.
3. Pao hakashoka.
4. Ava-ava ngara.
5. Church ahangva.
6. Mipha kachiva.

#### **NGASANKHANGARUM**

1. *Khrista*. Kathana kachiva kala mipha kachiva kathada ngayokhavai ngasara khala kaji Biblena kachithei eina ngasoda ngayokhavaiwui matailak kahai khikhala kaji chitheimi. Christianbingna okathuili kala akha eina akha tandi eina kala lupa, lan eina suilaga ngachei ngasak da yuikhui khavai mahotna mana. Kha athum khalata ngayokhavai akha ngasada chieina hangsangarok khavai hotnai. Vareshi akhana sakhangayi ot saikora Khrista akhalatana rida sachitaiser kahaina. Ana otsak eina ngasoda tamchitheiphok haowa

(Otsak 1:1). Awui pheikar yunlaka shurkhavai Ana ithumwui vang ngayokhavai haimi kahaina (1 Peter 2:21). Ava ithumwui khangazanli malukhamashana pangmong khare katha maning mana. Lakhashong phaningakha, ithumwui thada alila suhaira, kha Ava morei masalakmana (Hebrewnao 4:15). Jishu hi Yaobingwui tungli akhava kasa maningla kha athumli thankhamiya yaokahoma akhavana (1 Peter 5:4). Jishuwui atamli yao kahomabing yaobingli nganailak eina thanpama, chithada athum yaonao avavali machutta. Yaokahomana yaobingli leishi chithada yaonaobingnala ali leishi kala ali shurngailakga. Atam kachida yaokahomana mangali zatta yaobingli thanmiya kala apong chitheimiya. Ana yaobingli zatkhavai tandi masamana kala kashaola mashaomana. Yaobingna shurngaiki kaji apong eina nimlak eina thanmiya. Khristala chikatha yaokahomana kala Vareshi saikoralala chikatha kathanao saserphalungra.

2. *Churchwui ararbing kala deaconbing*. Ararbing kala deaconbing hi Ashangva akhawui yangsangmebing kala raobing sada yaonaobingwui vang athumna ngayokhavai ngasaphalungra. Ephesusli khalei churchwui ararbingli athum khalata ngashar khavai kala athumli horsangmi kahai yaobingli mathalak eina mayonmi khavai hanga (Otsak 20:28). 1st Peter 5:3na hanga, “Nathumli mikahai athumwui tungli akhava masaalu kha yaobingna shakhui khavai acham sachitheilu”. Ararbingwui qualification bing chiya memberbingna kala okathuina shakhui kapai mi akha khangasa china. Deacon sakharebingli khiwui vang deacon sakhavai kapangka khalajila athum chi ningkatharwui vang kala mangla katharawui thangmetna pemting kahaiwui vangna (Otsak 6:3). Rida athumli chang yanglaga chukhara maleimana kaji theikhui kahaiwui thili kapangkanao phalungra (1 Timothy 3:10). Ngayokhavai akha ngasakida matik kachawui vang athumli arabing kala deaconbing sakhavai kapangkakana, maram chi maningla kateiwui vang athumli makapangkapaimana kala mashurpaimana. Churchna athumli shurngailakga khiwui vang khala-jila athum hi mibingna khamatha shakhui kapaiya ngayokhavai mi avava ngasaya. Prohowui churchwui government hi ngayokhavaili pheisin salaga sakahai governmentna. Ararbing kala deaconbingna kachikatha member akhali kakahar chitharan athum khalatawui mirin mina shakhui kapai mirin ngasaphalungra. Biblena hanga kaja mi akhana akhalatawui shimkhurli mathalak eina mangakuitheiakha Varewui shimkhurlila mayangsangrarmara da (1 Timothy 3:4, 5). Khangatei mibing kaja churchwui ayarwui mibingnala khayakashiya mi ngasaphalungra (1 Timothy 3:7). Chithada sada arar kala deacon saikora mibingwui vang ngayokhavai ngasaphalungra.

3. *Paokapha hakashoka*. Church ashangvana ngayokhavai matailak ka-

hai khangatei akha china khipakhalajila paokapha hakashokana. Athumli hithada kasohaiya, chiya, “Mibingna ngayokhavai ngasalu” (1 Timothy 4:12). Athum hi katharli, shitkasangli, leikashili, kasakhavali kala tuimatuili shitkasangabingna ngayokhavai ngasaphalungra. Paulna Timothyli hanga, “nakhalatali kala nawui tamkachitheili ngasharlu” da (1 Timothy 4:16). Khalata kala tamkachitheilila ngayokhavai khangasa chitharan ala kala awui tamkachithei khangabingla kahui samphangra. Kha khamatha mirin ringkachithei kala khamatha tamkachithei mazangakha akhalatali kala awui tui nganada khaleibinglila mahuikhui mara. Paulna Thessalonica wui Christianbingli hithada hanga, “Ithumna kasa takam eina nathumla saphalungra kaji nathumna thatheihaira. Nathumli ngasopamdalei lakha ithum ngachang makaka ot masalakmana” (2 Thessalonica 3:7). Paulna meikhaichitheida hanga kaja akhalatawui otsak kala kasakhava saikora mibingna गयाokhavai ngasangsaka da (vs.9). Pao hakashokana Khristawui acham shakhui phalungra kaja chithada kasa eina akhalata churchwui vang khamatha shakhui kapaiya ngayokhavai ngasara.

4. *Ava-ava ngarabing*. Vareshi ava-ava ngarabing naongarabingna khamatha shakhuikapaiya ngayokhavai ngasaphalungra. Timothyva akhalatawui vang ngayokhavai shitkasang kathuka ashava kala ashayi lei (2 Timothy 1:5). Naongarabingna khamatha shakhuikapai ngayokhavai ava-avali langda katei maleimana. Naongarana mathalak eina thei kaja ava-avana shimli khi sakhala kaji. Athumli mathanngui ngasakhaipaimana. Hina Bible mapakathe kala matamchitheikhara shanaobingli otsak eina khamatha sachitheingsaka ngayokhavai akha sada. Chithada ava-ava ngarabing hi churchwui lungli matailakahaiya ngayokhavai akhana.

5. *Church ahangva saikora*. Church ahangva saikorana khangateib- ingli sachitheida khalei otsak saikora hi khamathala kala zakashila lei. Thessalonicawui church hi chiwui leihali (area) alungli leidakhalei shitkasanga mi saikorawui vang khamatha shakhui kapaiya ngayokhavai akha khangasawui vang Paulna masotkhami tui hanga (1 Thessalonica 1:7). Khangazana local church bingli church kahakbingwui khamatha acham kala otsak china katomiya. Denomination bing kala Vareli makatheibingna local church kachivawui kasakhava kala otsak ngashanda khaleina. Jishuna hanga kaja Awui mibing mangathumhaikapai kaphungli sakakahai keinung kathana da (Matthew 5:14). Ana hanga kaja Vareshi akha hi kahorna kala Vareshi saikora khangarum chitharan katavawui eina ngashanlala theikapai kahora keinung akha kathana. Chithada sada church ahangva saikora khamatha गयाokhavai ngasaphalungra.



6. *Mipha kachiva*. Mipha avavana mahorakha church ahangvana mahorramana. Jishuna churchwui mipha avavali hanga, “Nathumwui kahor chi mibingwui mangali horngasaklu...” (Matthew 5:16). Christian kachivawui mirin hiya mibingna palaka bhapta kapaiya chithi kathana (2 Corinthnao 3:3). Chithada sada Prohowui church member kachiva Khrista katha mi akha ngasada ngayokhavai ngasaphalungra.

### **Khangahan**

1. Hebrewnao 4:15na hanga Khrista hi ithumwui kahakka \_\_\_\_\_ kharena.
2. 1st Peter 4:4na Khristali \_\_\_\_\_ da hoyo.
3. Otsak 20:28na ararbingli rilak eina khalata \_\_\_\_\_ khavai hangchitheimiya.
4. 1st Peter 5:3na ararbingli Yaonaobingwui vang \_\_\_\_\_ khavai ngasangasakngaiya.
5. Deaconbing ngayokhavai ngasaphalungra kajiwui pongli chitheikhavai kathara tuiza akha hanglu.
6. 1st Timothy 3:7na hanga kaja ararbing hi kateibingnala \_\_\_\_\_ mi ngasaphalungra da.
7. 1st Timothy 4:12na paokapha hakashokabingli hanga, “mibingna \_\_\_\_\_ salu”.
8. 1st Timothy 4:16na Paokapha hakashokabingli khi ot khanili ngashar khavai hangkhala?
9. 2nd Timothy 1:5li Timothy shavawui aming \_\_\_\_\_ kala ashayiwui amingna \_\_\_\_\_ da kapihaidalei.
10. Church ahangva saikora ngayokhavai ngasaphalungra kajiwui pongli chithei khavai kathara tuiza khani milu.

**KATAM – 16**  
**CHURCHWUI LUNGLI KHALEI OTPAM CHI**  
**KHIMAMEI KHALA?**

**OUTLINE**

1. Ararbing
2. Deaconbing
3. Paokapha hakashoka bing

**NGASANKHANGARUM**

1. *Ararbing*. Ara ithum churchwui kathanbingwui vang yarmi kahai otngarut kala athumwui otpam bingwui pongli tamngarum khavai ngarankahaina. Lumashanda rilak eina “otpm” kaji tui hiwui kakhalat theikhuilu. 1 Timothy 3:1na hanga, “kachikatha mina bishopwui otpam ningchangakha, ana kapha otl i ningkachangna”. Hina chitheimidalei kaja ‘churchwui otpam’ kajiwui kakhalata ot kasali kahona da. Churchwui lungli khalei otpam hiya saran kala otngarut khuikhavai wui pamna. Mi kachungkhana phaniga kaja Prohowui churchwui kathanabing eina government wui akhavabing ngaraichai da. Athumna phaniga kaja table khangsanghailaga kaa akhali pamlaga mi kateili “hithada salu” kala “chithada salu” da kasolaga pamdaleira da. Kha churchwui lungli leida khalei otpam chiya otsak eina ot kasa chilakga. Yur kachungkhawui lungli khalei otpam saikora leih kasa rano kala sarkarwui otpam rano makhaoser haowa. Otpam kasingbingna lupa misang hailaga pailak eina pheisa razangkhavai apong sakhuiya. Athumwui pam chi athumli ot masakhangasakwui apong akha katha ngasaya. Athumna phaniga kaja athumwui otpam chi khaya kalak kahai kala juilak kahai kha ot makachunga otpamna da. Prohowui churchwui kathanabing hiya palm oil li ot kasa mibing eina ngaman ngasakpai. Mayarnao akhana arongli atheibing khuikhavai yakkaya kala shanaona atheibing chi kharuikhuilaga phungzangra thao shireikhavai pamli kala khangatei mayarnao akhana atheibing chi thao eina shireishoka kala mei eina hanga. Mi kachiva kachichali kapang kahai otpam chili lungsanlak eina ot saphalungra. Chi takam eina ararbing, deaconbing kala paokapha hakashokbing athum saikorawui otngarut ngatateida lei. Mi kachiva ot sakhavai kachichawui pam leisera. Kala mi kachiva kachichawui saran sakhavai leisera. Kachichawui otpam kajiwui kakhalat chi hina. Khamayon kala yangsangkhame hi churchwui ararbingwui otngarutna (1 Peter 5:2). Athum hi mayonme bingna (Otsak 20:28). Athumna memberbingwui mangla saikoral i yangsangmiya (Hebrewnao 13:17). Athum hi manglawui

yaokahoma bingna. (Otsak 20:28).

2. *Deaconbing*. Deaconbing hi churchwui lungli khaleiya raobingna. Deacon kajiwui kakhalata otramkhangathaya kajina. Mah, Vareshi saikora khanima raosera kha deaconbing hiya churchwui darka kasali otramngathami khavai matik kacha mi avava sada kapang kahai khamataiya mibingna. Prohowui phakachizat wui ranyei singkami khavai kala church memberbingwui ngachaili kachamnao bingli phauikhavai Jerusalemwui churchli mayarnaobingli darka sasai. Otngarutbing hi khareya sada deaconbingli chishinna (Otsak 6:1-6). Kachikatha mibingna deacon saran khala kajiwui pongli kapi kahai chili chitheimiya kaja athum hi khaya kaka, shitsangkapai kala kapha ot katongkhali sangairareo kahai mi ngasaphalungra da. Athum hiya churchwui lungli khaya khalei mibingna, khiwui vang khala jila athumwui mirin kala athumna churchwui vang otramngathamida khalei chiwui vangna (1 Timothy 3:8-13). Ararbingna churchwui lungli athumwui otngarut khalei thada deaconbingla athumwui otngarut ngateida leiya. Hi deaconbingwui otpam kajiwui kakhalatna (1 Timothy 3:13). Biblewui athishurda churchwui lungli ararbing eina deaconbingwui otpam maningla katei maleilui mana. Denominational churchbingwui lungli kachungkha leida khalei kathana mingpho kala athumwui otpambing chiya kathara tuili makazang mikumona sakakhui sera. Bishopbing (ararbing) eina deaconbingli ngarumda khaleiya Philippili khalei churchli Paulna chithi kapiya da Philippinao 1:1 li zangdalei. China chitheiya kaja ararbing eina deaconbing hi churchwui kathanabing da.

3. *Paokapha hakashokabing*. Paokapha hakashoka hiya churchwui lungli otpam kasinga mi maningmana. Kha ana saki kaji ot akha lei. Paulna Timothyli pao kapha hakashoka akha wui ot salu da hanga (2 Timothy 4:5). Pao hakashoka kajiwui kakhalata pao hashokda khaleiya mi chili kahona. Awui khamataiya otngarut chiya hakashok eina tamkachithei hina. Philippili khalei churchli ararbing kala deaconbing leidaleisalala (vs. 1) Paulna Timothyli paokapha hakashoka akhana saran otngarut chi sakhavai Philippili chihovai (Philippinao 2:19). Paokapha hakashoka bingla member kateibingwui thada ararbingwui yangsangkhami kala mayonkhami azingli khaleina. Ararbingwui azingli paokapha hakashoka akha sada otramngathada khalibing saikora ararbingli juilak eina khayashiphalungra (1 Timothy 5:17). Kha pao hakashokali mungda khalei panshap chiya Ararbingwui maningla kha Varewui tuiwui pangshapna. Makhangayi ot saakha ararbingli eina tangdala machinlu chithada sada mi khangateinala ngachee khavai da Biblena hanga (1 Timothy 5:19, 20). Churchwui lungli Varena Pao hakashokabing, ararbing kala deaconbingli pam ngatateida mihaiya. Athum avava saikora

kachichawui saran otwui vang matik kacha kala ngarankharik kahai ngasaphalungra. Varena athumli sangasak khangai athishurda kachichawui otngarut theiphalungra. Chi takam eina athumna sada khalei ot chi khikhala kaji church ashangvanala theimiphalungra. Arabing eina deaconbing maningla churchwui lungli otpam kala otpam khuimi khavai katei maleimana kala maleingasakpai mana. Pao hakashoka khipakhanala churchwui lungli ararbingwui otngarut ngapaida athumwui tungli mungkhavai masarano. Kha mi kachiva Varewui ot athishurda churchwui lungli pam mikahai chi theirano kala bhaptarano. Kala mikachiva churchwui lungli kachichawui kashap athishurda kala ana sakida matik kacha otngarut chi sarano.

### **Khangahan**

1. 1st Timothy 3:1na hanga, kachikathana bishopwui otpam ningc-hangakha ana kapha oti \_\_\_\_\_.
2. Churchwui lungli kathana ayur khani khalei chi khimamei khala? (Philippinao 1:1) \_\_\_\_\_ kala \_\_\_\_\_.
3. Hebrewnao 13:17na hanga ararbingna member kachivawui man-gla \_\_\_\_\_ da.
4. Deacon kajiwui kakhalat hi \_\_\_\_\_ kajina.
5. 2nd Timothy 4:5 na hanga Timothy \_\_\_\_\_ akhana saki kaji ot \_\_\_\_\_ da.
6. Churchli yangsangkhame bing chi khipalong khala?
7. Churchwui kathanabing hiya palm thao kashireibing kathana. Athum kachichawui \_\_\_\_\_ leisera.
8. 1st Timothy 3:13 na hanga Deacon sada mathalak eina otram khangathabing china \_\_\_\_\_.
9. Khare sada deacon kakapangwui pongli khi lairikli kapihai khala?
10. Pao hakashoka hi ararbingwui yangsangkhami azingli malei khala?

### **KATAM – 17**

### **ARARBINGLI MIKAHAI MINGPHOBING CHI KHIM- AMEI KHALA?**

### **OUTLINE**

1. Ararbing
2. Presbyter bing
3. Bishop bing
4. Overseer bing (yangsangme bing)

5. Pastor bing
6. Yao kahomabing

## **NGASANKHANGARUM**

1. *Ararbing*. Prohowui churchwui ararbingli mingpho tharuk mihaiya. Kala mingpho avava saikora chiwui matailak kahai kakhalat leisera. Aming avava chiwui kakhalat khikhala kaji theikakhui china kathanabingwui pongli chungmeida theikhui ngasakra. Mingpho bingwui ngachaili yarui-na shichinmeithui kaji chiya, 'Ararbing' kaji hina. 'Arar' kaji tui hiwui kakhalata rarkahai mi kaja khararnaoli kahona. Hi shitkasangli kala zingkum eina rarkhamei mibingli kahangna. Churchwui lungli khalei vareshibingwui ngachaili athum hi shitkasangli mapungphameithui kaji kala kashungmeithui kaji mibingna da theiya. Athum hi sadhardhara vareshi maningphalungmara (1 Timothy 3:6). Kachikatha mi akhana aramli khawui khararna sahaowa kajiwui vang churchwui arar akha ngasakhavai matik chahaira kaji maningmana. Church memberbingwui ngachaili rarmeithui kaji mi ngasalaga manglawui kathana sakhavai vanga matik makacha mila leikappa. Kachikatha akhana church memberbingwui ngachaili Vareshi sarimeithui kaji member ngasalala china ali ararwui pam khuikhavai mashun mamimana. Biblena hanga kaja Paulna Ephesusli khalei churchwui ararbingli ali samphangkavai hoyda (Otsak 20:17). Keinung kaikhali churchwui ararbing kapangsang haiya (Otsak 14:23). Keinung kachivali churchwui ararbing kapangsang kavai Titusli Creteli chipama (Titus 1:5). "Ararbing" kaji tuiyar hina chitheiya kaja athum hi shitkasangli rarkhameibing kala kashungkhamei bingna kaji. Athumna zingkum atam kasangkha ningtongda shitsangda okthuirahai china athumli khayakashi leingasaka.

2. *Presbyter bing*. Ararbing kaji mingpho hieina kakhalat ngaraicha kaji khangatei mingpho akha chi khikhajila "presbyter" kaji hina. Chiwui kakhalata "rarkhamei" kajina. Tuiyar hi Bibleli akhashimang samphanga (1 Timothy 4:14). Atungli meikhaichithei kahai thada ithumna theiphalungra kaja arabing kaji eina Presbyterbing kajiwui kakhalat ngaraichaya kaji.

3. *Bishop bing*. Ararbingwui mingpho khangatei akha chiya khikhajila "Bishop bing" kaji hina. Chiwui kakhalata "mayonkhame bing". Hiwui pongli 1st Timothy 3:1, 2, Titus 1:7 kala Philippinao 1:1li kapa samphanga. Kathara tuipam akhali mingpho hi Jishuli mida shichina, kaja A hi ithumwui manglali Mayonkhame akhana da. Kala Judas Iscariotna masamphangrathu kaji otpam, mayonkhame da kapi kahai leiya (Otsak 1:20). Ararbingli mikahai mingpho hina athumna saphalungki kaji mayonkhamewui ot chitheimiya. 1

Peter 5:2 na hanga, ararbingna yangsangkhamiwui ot saphalungra da. Hangdakhalei hina khi chitheikhalajila tamkachithei kala thankhamiwui ot saikora ararbingna saserphalungra kaji maleimana kaji chitheimiya. Kha chikatha ot saikorali yangsangkhami wui ot athumna saya. Local churchwui ot saikora athumna yangsangmi phalungra. Organization kachiva yangsankhame bing leiphalong kaji thada Prohowui churchla Bishop kala overseerbing leiya.

4. *Mayonkhame/yangsangkhame bing*. Atungli ithumna theikahai chithada mingpho hi Bishop kajiwui kakhalat eina ngaraichai. Mayonkhamena churchwui tungli yangsangmiya. A hiya local churchwui ot saikorali yangsangkhameya/mayonkhameyana. Otsak 20:28na hanga kaja Mangla Katharana Ephesuswui ararbingli yaonaobingli mayonkhamebing sangasaka da. Athumna athum khalatawui tungli kala yaonao saikorawui tungli ngasharphalungra. Minama ojabing marazang khavai yangsangkhami hi athumwui otngarutna (vs. 29, 30). “yangsangkhame” kaji mingpho hina Prohowui church alungli mayonkhamiwui ot kayakha matailakhao khala kaji hangchitheimiya.

5. *Pastor bing*. Ararbingli mikahai mingpho “pastor bing” kaji hi Kadhara Tuingashitwui lairikli akhashimang kapikahai samphanga (Ephesianao 4:11). Aming hi “yaokahoma” kajiwui kakhalat eina ngaraicha kaji khangatei tuiyar akhana. Israelnaobingwui manglarinwui kathanabingli “pastor bing” hoyo (Jeremiah 2:8). Yaonaobingli kashamkakhayang kala sakakhayanga yaokahoma bingli kakhanang ngasarano da khonshi haiya (Jeremiah 23:1-7). “Pastor” kaji tuiyar eina “Pasture” kaji tuiyar hi kha ngaraiya (Pasture kaji hi khawo khaleipamli kahona). China yaokahoma eina yaonaowui kakhalat langmeida chitheiya. Denominational churchwui pastor bing hi kathara tuiwui pastorbing eina ngateiya. Bibleli ararbing da kapihaida khalei chi Pastorbingli kahona kala athum atam kachida church kachivali akhali langda leisera.

6. *Yaokahomabing*. Paokazat Peterna ararbingli chithi kakapi chitharan athumwui ngachaili khaleiya yaonaobingli phauilu da hanga. Kala ana hanga kaja yaokahoma akhava (Khrista) khara tharan athumna makashimana kuihon samphangra da (1 Peter 5:1-4). Hina chitheiya kaja Khrista, Yaokahoma akhava wui azingli ararbing hi local churchwui yaokahoma bingna kaji. Ararbing eina yaokahomabingli ngaheoda khalei hi kakhalat leilakga. Bibleli kazanga yurbing kala ngaleibingwui yaokahomabing athumwui yaonaobingli leishilakga. Athumna yaonaobingli leishida phauiya (Laa 23 li yanglu). Athumna yaonaobingwui khunuk zatta mahomlakmana kha mangali zatta thanmiya. Yaonao avavawui kakhanang theimiya kala saikorali ngaraichada leishi. Athumna yaobingli ngakmiya (protect), phauiya, kala tara mimanga. Shiman kahai yaonaobingli samphang khavai kaphali kala

athumli kalashikapai apongwui eina ngakmi khavai kasali kachot kala kasak kachungkha samphanga. Hikatha kathanabingli Prohona ararbing sangasakngai. “Yaokaoma” kaji aming hi kala churchwui ararbingli mikahai aming khangateibing saikora china ithumli athumwui pongli mathameida theikhu-ingasaka. Presbyter bing, bishop bing, mayonkhame bing, pastor bing kala yaokahoma bing saikora hi churchwui ararbingli mikahai mingpho sera.

### **Khangahan**

1. Ararbingwui vang mikahai mingpho kayakha leikhala?
2. “Arar” kaji tuiyarwui kakhalata \_\_\_\_\_ kajina.
3. Otsak 20:28na hanga kaja Paulna Ephesusli khaleiya \_\_\_\_\_  
hoya da.
4. Otsak 14:23na hanga kaja, \_\_\_\_\_ kachivali anina \_\_\_\_\_  
kapangsangmi.
5. 1st Timothy 4:14na ararbingli \_\_\_\_\_ da hoya.
6. 1st Timothy 3:1na hanga, kachikatha mina \_\_\_\_\_ san-  
gaiakha ana \_\_\_\_\_ oti ningkachangna.
7. “Bishop” eina “mayonkhame/yangsangkame” kaji mipho khani hi  
mangaraicha khala?
8. “Mayonkhame/yangsangkame” kajiwui kakhalat khikhala?  
\_\_\_\_\_.
9. Ephesiano 4:11na ararbingli \_\_\_\_\_ da hoi.
10. Local church akhawui lungli Pastor kayakha leiphalungra khala?

### **KATAM – 18**

### **MIBINGNA ARARBINGWUI PONGLI KATHADA BHAPTANGUI KHALA?**

#### **OUTLINE**

1. Mingpho tharuk saikora hi ngaraikacha mi akhamangli khamina.
2. Church kachivali atam kachida arar akhali langda leiphalungra.
3. Church akhawui lungli leida khalei ararbing saikora athumwui  
mashun kala pangshap ngaraichaya.

#### **NGASANKHANGARUM**

1. *Mingpho tharuk saikora hi ngaraikacha mi akhamangli khamina.* Kachungkha bhaptakhangui china ararbingwui pongli pangapakhangasakna. Mingpho tharuk saikora hi ararbingli khami mingphobingna da theishingkakhui chi-

na pakhangapa saikora shiman ngasaka. Denominational churchbingwui lungliva ararbingli pastorbingwui eina ngateingasaka. Kala bishopbing hina khangtei churchwui kathana ayur akha ngasaluiya. Kha Katam – 17 li ithumna tamkhai mingpho tharuk chiya mingpho khanini eina akhum kathum sada khaishok kapai mingphobingna. Ararbing kala Presbyter bing kajiwui kakhalata “rarkhamei/khararnaobing”. Kajina. Yangsangkhame/mayonkhame bing kala bishopbing kajiwui kakhalata ot saikoralis yangsangkhmiya (superintendents) kajina. Kala yaokahomabing eina pastorbing kajiwui kakhalata yaonaobingli homkhamiyabingli kahona. Ara hi yanglu kaja akhum kathum khaikahai mingphobing hina kathada ngarumserlaga mi akhamangli mikahai mingpho ngasakhala kaji. Otsak 20:17li hithada hanghaiya kaja, Ephesusli khalei churchwui kathanabingli ararbing da hoi, kha verse 28liva ngaraikacha mibing chili mayonkhamebing da hoi. Kala hithada hangluia kaja athum hi yaonaobingwui tungli yangsangkhame bingna da, china athumli yaokahomabing kala pastorbing ngasakhangasakna. Chithada sada ararbingli (Presbyter bingli) mayonkhamebing (bishop bing) kala yaokahomabing (pastorbing) da hoyo. Saikora hi otpam akhamangwui amingna kha kakhalat ngatateida eina phokkhamina. Ararbingli phoksangmi kahai mingpho tharuk saikora hi ngaraikacha mibingli mikahai amingbingna kaji chitheikhami kathara tupam chiya 1st Peter 5na. verse 1 li ararbingli matuikahai zanga, verse 2 li hithada kapihaiya kaja ararbingna Varewui yaonaobingli phauiphalungra da, china athumli yaokahoma ngasangasaka. Kala ngaraikacha verse 2 china ararbingli yaonaobingli mayonmikhavai hanga, china athumli mayonkhame sangasaka. Ararbing, presbyter bing, mayonkhamebing, bishop bing, yaokahoma bing, kala pastorbing hi ngateikhangarok kathanabing maningmana. Mingphobing chiya Prohowui church organization lungli khalei ngaraikacha otpam akha kuingarumda khalei mibingli khami amingbingna.

2. *Church kachivali atam kachida arar akhali langda leiphalungra.* Denominational churchbingwui lungli nguichingda khalei khangatei akha chiya khikhajila local church kachivali pastor maningakha bishop akhamang leikhangasak hina. Kadhara Tuingashitliva church kachivali pastor (arar) akhali langda leisera. Bibleli “churchwui pastor” da kapa masamphanglak mana, kha church kachivali arabing kapangsanga kaji wui pongli kapa samphanga (Otsak 14:23). Hili “arar” majimana kha “ararbing” kajina. Apam kachivali ararbing kapangsanga (Titus 1:5). Paulna Ephesusli khalei ararbingli ali samphang khavai hoyo (Otsak 20:17, 28). Ana Philippili khalei churchwui Bishopbingli chithi kapiya (Philippinao 1:1). Hi Khristana Awui ningkachang athishurda samikahai churchwui organizationna. Ana sakahai chili thangkhami



zanga. Local church kachiva mi avava mangna mungsi kaja khalatali akhava thada pailak eina phaningkhuipai. Khalata kahakpa sangai khavai kasui rara. Awui mashunmakhui bicharli miwui vang mamachukmi mara, kaja a khalata hi ainwui tungli khalei thada khaira. Kha Khristawui ningkachangva mi kh- ipalikha khalatali “kahaka mi” masangasakngaimana. Biblewui ningkachan- ga arar akhamangna maningla kha church kachivali ararbingna khamung hina. Churchwui lungli arar sakhavai matik kacha khani maleiranglakha eina tangda ararbing makapangla ngaraiki kajina. Oraganizationwui lungli arar akhamang leiakha chi kathara tui athishurda nguikahaina. Kalikhada khani- wui ngachaili akha thihaiakha maningakha khalang ot kasawui vang matik machathuakha arar akhapala awui pam chihophalunghaora kala khangatei akha makapangranglakha eina tangda awui pam makhuipai mara. Chithada sada Church kachivali ararbing akhali langda leiphalungra.

3. *Church akhawui lungli leida khalei ararbing saikora athumwui mashun kala pangshap ngaraichaya.* Kakathumali ithumna nguichingda khalei khangatei akha chi- ya khikhalajila, arar akhana akhalata khangateibing saikorawui tungli akhava kasa hina. Hi kharewui church organizationwui eina ngapakthui kahaiwui khareya maram akhana. Naoda hina Roman Catholicwui tamkachithei athi- shurda “bishop bingna” local church kachungkhawui tungli akhava kasa hi rashokhangasakna. 1st Peter 5:4na Khrista hi Yaokahoma Akhavana da hanga. Bibleli ichacham kahai arar kala “ararbingwui akhava” hikathatha hi maleimana. Biblena Khrista hi yaokahoma Akhavana jihaoda china ithumli yaokahoma akhava hi A maningla katei maleimana kaji shitsangasaka. 1st Peter 2:25na Jishuli “nathumwui manglawui Yaokahoma kala Bishop” da hoya. Mi akhana church akha maningakha church kachungkhawui Bishopna da kathara tuili kapa masamphangmana. Local church kachivali “arar” kala “pastor” maningla kha “arabing” kala “pastorbing” leiya. Langmeida, arar akha sada atam kasangkha churchli otram ngatharakahai china arar sadhad- har bingli mahakmeimana kala pangshap masingmeimana. Local church ka- hakbingwui ararbingna church teokhameibingwui ararbingli pangshap hak- meiya kajila maleimana. Paokatzat Peterna local kateiwui church ararbingli khamatui chitharan hithada hanga, “Ila churchwui arar akha sada” (chiwui kakhalata arar kateibingli a mahakmeimana kajina) (1 Peter 5:1). Khalatali masotlaga kala khayaning naganinglaga chipeewui pangli matazang khavai ararbingli hangmachin haiya (1 Timothy 3:6). Arar akhali langso khangasak hi chipeewui vanga ringkaphana. Mikumowui langsot hina kathanali makha- ongasakpai. Churchwui lungli arar saikorawui mashun kala pangshap nga- raichaya, kaja athumwui ngachaili kahak kateo makhaimana.

## **Khangahan**

1. Mingpho tharuk chi otpam kayakhali mikahai mingpho khala?
2. Mingpho tharuk chi aming \_\_\_\_\_ eina akhum \_\_\_\_\_ khaipaiya.
3. Amingbing chi ngarum khangasaka kathara tuipam khani hanglu.
4. Otsak 14:23na hanga kaja church kachivali \_\_\_\_\_ kapangsanga da.
5. Titus 1:5na hanga, apam kachivali \_\_\_\_\_ kapangsanga da.
6. Philippi 1:1li Paulna Philippili khalei \_\_\_\_\_ chithi kapiya da hanga.
7. Mi akhamangna arar akha sada churchwui otram mangathapai khala?
8. 1st Peter 2:25na Jishu Khristali \_\_\_\_\_ kala \_\_\_\_\_ da hoya.
9. Biblena church akhawui lungli bishop akhamang leikapai thada kapikahai malei khala?
10. 1st Timothy 3:6li arabingli \_\_\_\_\_ manganing khavai machinhaiya.

## **KATAM – 19**

### **DENOMINATION BINGNA CHURCHWUI GOVERNMENT KATHADA MAKHAONGASAK KHALA?**

#### **OUTLINE**

1. Biblewui pangshapli shurkikaji mahutli mikumowui pangshapli kashur.
2. Ningkhan eina kapanna local churchli makanlaga thuikahai.
3. Kathara tuili makazanga otpam kala kathanabing leikhangasak.
4. Kathara tuili kazanga otpam ngacheikhangasak.

#### **NGASANKHANGARUM**

1. *Biblewui pangshapli shurkikaji pamli mikumowui pangshapli kashur.* Para hili kala rakhanao parali churchwui government hi kathada toilak eina makhaongasak khala kajiwiwi pongli tamngarumngai. Arui tamdakhalei hili denominational churchbingna church organization hi kathada makhaongasak khala kajiwiwi pongli machukngarumra. Hiwui thikazang paraliva church organization hi kathada Prohowui churchnala makhaongasak khala kajiwiwi pongli tamra. Denominational church government lungli makathar, khamakhao

rakazangwui khamataiya maram chiya Biblewui pangshapli mashurla mikumowui pangshapli kashurwui vangna. Athumwui hakmeithui kaji khangui-khalang chiya athumwui catechismli shurda khalei china. Denomination bingwui catechisms china Biblewui athishurda sakahai church organizationli khangachei kachungkha leingasaka. Catechismwui tamkachitheili shurkaphok eina ngasoda mashokhangachei hi ramamana kajina. Mikumona sakakhui catechismwui tamkachitheili khayashida shurdalei lakha eina tangda mibingli Biblewui khamashunga church organization chili latra khavai kasa hi masakapai otna. Dharma wui lungliwa kathara tui hi akhamang kaji pangshapna da khayashiki kajina. Kathara tuina vareshi akhali Vareli otram khangatha chili khamatha ot sakhavai, sari khangavai thada kashungasaka (2 Timothy 3:17). Church government mangli maningla kha dharmarinwui ot ayayava saikorali Kathara tuiwui pangshapli khayashiphalungra.

2. *Ningghan eina kapana local churchli makanlaga thuikahai.* Denominational churchbingna church governmentli mashongachei khangasak apong khangatei akha chiya khikhaljila Local church kachivali ningghan maleikhangasak china. Prohowui ningkachang athishurda church government kasemli khamataiya kharin chiya khikhalajila local church kachivali ningghan leikhangasak china. Denominational church kachiva chungkhameina khalata khamunga local church maleimana. Athumwui organization hiya kathara tuiwui eina ngakheikhanghaiya. Kha ithumli Khristawui Tamkachitheili makanda masakhavai machinmihaiya (2 John. 9, 10). Churchwui khangatei ot saikorali Prohona kathada sangasakngai khala chithada kasa chi takam eina church organizationwui ponglila Awui tamkachithei athishurda saphalungra. Biblewui tamkachithei athishurda church organize saakha local church kachiva ningghan leira. Mikumona chili makanda Local church kachiva khangarumwui asa akha kasem tharan athum chi Khristawui tamkachitheili makanda kasana. Chithada denominational churchbingna local churchwui ningghanli makanda kasa otsak china Prohowui ningkachang kala Awui kaphaning mashongachei ngasaka.

3. *Kathara tuili makazanga otpam kala kathanabing leikhangasak.* 1st Peter 4:11 na hanga, “Pao hakashoka china Varewui pao hashokphalungra”. Chiwui kakhalata Biblewui otli Biblewui athishurda kasa, kala Biblewui aming eina kaho kajina. Phongkhami 22:18, 19na machinmida hanga, ‘Varewui tuili mangarumsanglu kala khuikashokla makhuishoklu’ da. China maram sada Prohowui churchwui mipha kachiva Bible horzakda mayonphalungra. Churchwui kathanabing saikora Bibleli kazang kathanabing eina ngaraic-haphalungra. Kha denominational church chungkhameiva churchwui

kathanabing kala athumwui otpam kathara tuiwui athishurda maleimana. Hikatha mikumona sakakhui otpaming hi Bibleli mazangmana, chibing chiya “catechist”, “agent,” “archbishop,” “pope,” hikathatha hina, khangatei kachungkhala leifaya. Biblewui athishurda kasa kaji hi chikatha chili kaho maningmana. Hi Varewui tuili ngarumkasangna. Kadhara Tuingashitli makazang kathanabing kala otpaming saikora makhuishokrang lakha eina tangda Prohowui church restore masaramara.

4. *Kathara tuili kazanga otpam ngacheikhangasak.* Khamatiya sada denominational churchbingna Bibleli kazanga otpamingli ngacheingasakda khamashunga church governmentli makhaongasaka. Kathakhalajila, Bibleli kazanga otpamwui amingva shichina kha aming chiwui kakhalat athishurda mashurmana. Denomination wui bishopbingla chithaya, Bishopbing hi Bibleli zanga kha denomination bingwui bishop eina Kadhara Tuingashitli kazanga bishopbing mangaraichamana. Denomination bingwui Pastorbingla chithapapama. Bibleli pastorbing hi local church ahangvali khamunga ararbing china. Aruihonwui churchbingli pao hakashokali pastor da hoya. Amingva ngaraichai kha otpam ngateihaowa. Khangatei chancham akha china khikhalajila Pangmon wui pamna. Biblewui athishurda vareshi saikora pangmon serra (1 Peter 2:5,9). Kha sectarian churchbingli pangmonbing hi church ahangvawui khamataiya kathanabing ngasaya. Chithada sada hilila amingva kathara tui athishurda shichindalei kha chiwui kakhalatva kathara tuiwui eina ngateihaowa. Chithada sada, denominational churchbingna mikumowui pangshapli kashur, local churchwui ningkhanrinli makhamaya, bibleli makazang otpaming sakasang, kala Bibleli zangda khalei otpamingwui kakhalat ngacheikhangasak, hikathatha otsak hibingwui manga eina khamashunga churchwui government makhaongasaka.

### **Khangahan**

1. Mikumona sakakhui denomination bingwui lairikwui aming chi khikhala?
2. 2nd Timothy 3:17na hanga, kathara tuina ithumli kapha ot sakhavai, sari khangavai thada \_\_\_\_\_ ngasaka.
3. 2nd John 9na Khristawui \_\_\_\_\_ da hanga.
4. Bibleli kachikatha local church samphang khala?
5. 1st Peter 4:11na hanga, “Pao hakashoka china \_\_\_\_\_ hashokphalungra”.
6. Phongkhami 22:18, 19na Varewui tuili khangarumla\_\_\_\_\_

kala khuikashokla \_\_\_\_\_ da hanga.

7. Bibleli makazang otpam matiwui aming hanglu.

8. Denomination churchbingna nguida shichinda khalei Bibleli kaza-  
ga churchwui otpam kathumwui aming hanglu.

9. 1st Peter 2:9 na hanga kaja, Vareshi saikora \_\_\_\_\_.

10. Otpaming chi restore masala khamashunga church chi restore sa-  
pairala?

## **KATAM – 20**

### **KHRISTAWUI CHURCHBINGNA CHURCHWUI GOVERNMENT**

### **KHI APONG EINA MAKHAONGASAKPAI KHALA?**

#### **OUTLINE**

1. Matik makacha mili kathana sakhavai kakapang.
2. Ararbingwui pamli athumwui mahut sada otram ngatha khavai mi kapangkasang.
3. Ot kasali otpam onkhangasak.
4. Churchwui committee bing.

#### **NGASANKHANGARUM**

1. *Matik makacha mili kathana sakhavai kakapang.* Church goverment makha-  
okhangasak kaji hi denomination churchbingwui lungli rakashok thada Pro-  
howui church alunglila rashokpaiya. Khristawui church kaikha Biblewui  
athishurda ngasharlak eina mashurmana. Chancham sada, kachikatha mina  
churchwui arar kala deacon sarakhala kajiwui pongli Biblena tharlak eina  
athumwui qualification chitheimi haira. Biblena hanga kaja kathana sakikaji  
a china qualification chi kashung phalungra da (1 Timothy 3:2). “Phalungra”  
kaji tui hiwui kakhalata khalap kahai kaja matheithuihai kapai saphalung-  
ki kaji chili kahona. Tui hi arar akha sakikaji mina chitheikahai qualifica-  
tion bing chi darka saphalunga kaji chitheikhami kala pangshap leilak ka-  
hai tuina. Jishuna hanga, “Nathum pharaluishitphalungra” da (John 3:7).  
Varewui wungram zangkhavai pharaluishit kaji darka saya. Chi maningla  
apong katei maleilui mana. Kachikatha mina arar sarakhala kajiwui pongli-  
la chipapama. Awui otsak kala kasakhava saikora chitheimi kahai qualifi-  
cation saikora chi kashungphalungra, maningakha mi china arar sakhavai  
matik machamana. “phalungra” kaji tui hi kachikatha mina arar sarakhala  
kajiwui pongli chitheimikahai qualification bing avavali hangda khaleina kaji  
theiphalungra. Mi akhana qualification bing kaikhali kashunglala khangatei

kaikhali makashungrarakha mi chi arar sakhavai matik machamana. Arar akha sakhavai darka kasa qualification saikora makashungkhararra mi akhali arar sakhavai kapangkaakha chi Biblewui tamkachitheili makhaokhangasakna. China Prohowui churchwui governmentli makhaongasakra.

2. *Ararbingwui pamli athumwui mahut sada otram ngatha khavai mi kapangkasang.* Khristawui churchbingwui lungli mibingna khangui-khalang sachingda khalei khangatei akha chi khikhala jila ararbingwui pamli athumwui mahut eina awui pamli otram ngathakhavai mi kapangkasang hina. Arar akha sakhavai qualificationva makashungla kha arar sangailak kaji mi kachungkha leiya. Athum ararbing sakhavai matik machamana kha ararbing thada athumwui pamli otram ngathangaiya. Hi Varewui tuili makhamaya otsakna. Kachikatha mina churchwui ararbing sarakhala da Khristana machukkahai chi ngayokhavai chili pheisin salaga sakahaina. (ararbing saikora memberbingwui vang kala kateibingwui vangla ngayokhavai avava ngasaphalungra kaji hi Varewui ningkachangna). Kachikatha mina arar sarakhala da chitheimi kahai qualification saikoralis ngayokhavai masararakha, sakashap thada masarekpaimana. Chancham sada, Vareshi makhaning mi akhana Vareshi akhawui pam khuilaga otram ngathangai kaji, ali churchna mayarala? Kachangkhat khamashunga Vareshi makhaning mina Vareshiwui ming mangavaipai mana. chi takam eina kachangkhat arar makhaning mina arar akhawui ming mangavaipai mana. Chithada kasa chi Kathara tuli khayetna. Kala chithada kasa hi Khristana Awui Churchli kathada mungra khala da sakahai chili makhamayana.

3. *Ot kasali otpam onkhangasak.* Kakathuma sada church ashangvana Khristawui ningkachang chili mazatla nguichingda khalei akha chi khikhala-jila khamatha “ot kasali” churchwui lungli “otpam” akha onkhangasak hina. Chancham sada, churchwui lungli Prohowui lupa kala lan singkhamiwui ot kasa leiya. Chikatha mili lansingme da hoyo. Kha a hi churchwui kathanao maningmana. Ana thada churchwui ot akha sakhamina. Prohowui lupa kala lan singkhami kala haikhami hi khamatha otna. Kha chi churchwui lungli otpam akha thada khalei maningmana. Bibleli “lansingme” da churchwui lungli otpam maleimana. Kha marakkhali lansingme bing athumwui ot chi otpam akha ongasakngaiya. Hi Varewui tuili khayetna. Lije kasangkha singlaga churchwui khokharum atamli mibingli mathukkhavai yangsangmida khaleibing chi kathanao maningmana. Kha thada sakhangayi kala darka kasa ot chi kasana. Kha chancham sada mi china ana sada khalei ot chi churchwui lungli ana otpam akhawui pam khuida khaleina da machukhaosi kaja kala mingpho akha phoksangda pangshap khaleiya mi ngasahaosi kaja,

“ana ot kasali” “otpam” onghangasakna. Chi takam eina laa thanmidakha-leiyapala chithapapama. Ana laa thanmida khamatha ot saya. Kha akhalata churchwui kathana akha thada phaniga kala chithada khamatha ot chi makhaongasaka. Church memberbingna khokharumli kachichawui sakathei kala sakashap saya kaji ithumna 1st Corinthnao 14li kapa samphanga. Kha mi akhana khokharumli thankhamiwui sharuk khuiya kajiwui vang a churchwui kathanao ngasakahai maningmana. Ana ot akha otsak eina sakashokmana. Ana khuida khalei sharuk chi otna, otpam maningmana. Churchwui khokharumli kala churchwui otili Vareshi saikora sharuk khuisera. Kha chi katongkhali kathana masangasak mana. Mi saikorana samikashapwui lungli otramngathamida khalei chili langmeida athumna tongkhui kapai pangshap kala mashunli kaphaning tharan khangama-khangasao kala khonkazar hi rakashokna. Mi kachungkhana, athumna samikashap khamatha ot kasali langda khalatawui vang khangam khare pam tongkhuingaiya. Chikatha khangam khare pam ningkachanga mi chi Diotrephes kathana (3 John 9). Aruihonla churchwui lungli Diotrephes katha mi kachungkha zanga. Athum hi khalatawui tekhamatei mangli phakazat mibingna. Athum katha mibingna khangam-khare pam ngapaida Prohowui church makhaongasaka. Otili otpam sada ngacheikhangasak hi athum katha mina haophoka. Athumna khamatha ot sarashumhaisalapai kha chi pangshap khaleiya otpam akha ongasak khavai hotkhanawui vang makhaongasakhaira. Hikatha khamakhao otsak hi denomination churchbingwui lungli saklak kahai ot akha khangasa thada Prohowui churchwui lunglila chithaya. Chithada sada ithum Varewui tuina tamkachithehi chili makanda mazatpaimana.

4. *Churchwui commiteebing*. Member bingna otili otpam ongasakda khalei matailak kahai apong akha chiya commiteebingwui lungli lei. Committee kajiwui kakhalata “mi ashangvana” (a group of people) kharin akha leida ot akha sangarumkhavai chikatkahai/hamsangkahai bing chili kahona. Churchna mi kaikhali ot shinkhana tharan akhalata churchwui lungli pangshap khalei otpam akha samkaphang thada phaniga. Matailak eina committee bingwui chairman wui pongli yangakha hangda khalei chi khamshungna. Chikatha mili churchwui lungli kahaka pam ningchangkhavai makapha china suiya. Atam masangla commiteebingwui makhangchei chairmannada akhalata phaninghaipai, kala local churchwui lungli awui pam akha leikhavai hotnapai. Mayarnaobing kaikhali churchwui khorumkhavai shimwui kakai-katek yangsangmi khavai ot shinnapai. Athum khalata member kateibingwui tungli pangshap khalei otpam kasinga kathanabing thada maphaningranglakha eina tangda chi khamatha otna. Churchna mi kaikhali churchwui vang

pao hakashoka (preacher) akha phasangkhavai ot shinnapaiya, kha athumna khangam-khareipam ningchanghaoda athum khalata “paohakashoka phasang khavai committee” (preacher committee) da sakhuilaga churchwui lungli pangshap khalei otpam akha kasing thada phaninga. Hiwui kalashat hi haklaka kaja matailak eina athumwui ngachaiwui eina kachikatha akhana akhalatali committeewui akuiana da kaho tharan. Mi china ahangva chili mungkhavai hotnara kala akhalata churchwui lungli kathana akha thada sakhuira. Chithada sada churchwui lungli committee kasem hi maphamana kala athumna mi kaikhali chiwui manga eina pangshap kala khangamkhare pam khuikhavai saakha committee chi maleingasak khavai saphalungra (3 John 9). Naoda athum hi churchwui lungli leisaphalung kaji kala leiching kaji otpam akha onthuikahai kala athumwui akuiana kathana ngasathui kahai, hikathatha hi shokzarlaka. Athumna malung khanim eina churchwui darka kasa ot sakikaji mahutli khangamkhare pam leishimeihaowa. Athumna khamatha ot kasali pangshap khalei otpam akha thada sakhuihaowa. Chithada sada church committeebing hina ichacham kahai kala kathara tui athishurda sakahai Prohowui church ain makhaongasaka.

### **Khangahan**

1. 1st Timothy 3:2li “phalungra” kaji tui hiwui kakhalat khikhala?
2. “Phalungra” kaji tui hi arar akhana leikhangayiia qualification saikoralihangda khalei maningkhala?
3. Bibleli ararbingwui mahut sada athumwui pam kakhui mibingwui pongli kapa masamphangkhala?
4. Vareshi makhaning mi akhana vareshiwui pam khuipaila?
5. Otsak kaji hi khikhala?
6. Churchwui lansingme hi church kathana maningkhala?
7. Diotrephesna khiotli leishikhala?
8. 1st Corinthnao 14li zangda khalei memberbing churchwui lungli pangshap khalei otpam maleikhala?
9. Committeewui chairman hi churchwui kathana maningkhala?
10. \_\_\_\_\_kajiwui kakhalata “mi ahangvana” (a group of people) kharin akha leida ot akha sangarumkhavai \_\_\_\_\_ chili kahona.



**KATAM – 21**  
**CHURCH ORGANIZE SAKHAVAI MAPUNGMAPHARANG**  
**LAKHA CONGREGATION AYUR KAYAKHA LEIKHALA?**

**OUTLINE**

1. Kathara tui athishurda organize makasa.
2. Kathara tui athishurda maningla organize makasa.
3. Kathara tui athishurda maningla organize kasa.
4. Katharatui athishurda organize kasa.

**NGASANKHANGARUM**

1. *Kathara tui athishurda organize makasa.* Church ahangva saikora kathara tui athishurda kakashunga ararbing kala deacongbing zangda mapungphalak eina church organize sakhavai khokkha salak eina otsakngarum- phalungra. Kha chi zingcum, atam kasangkha zanglapai. Para hili athumna church organize sakhavai otmanga kathada khuimaman khala kajiwui athishurda local church kathada ayur ngatateida leikhala kajiwui pongli tamngarumngai. Para hili ithum term mati shichinra: “Kathara tui athishurda” kala “kathara tui athishurda makhaning,” “organize kasa” kala “organize makasa”. “Kathara tui athishurda” kajiwui kakhalata local congregationwui governmentwui maong (pattern) chi Biblewui athishurda khamashung chili kahona. “Kathara tui athishurda makhaning” kajiwui kakhalata Biblewui athishurda mamashungtha kaji, nguikahai chili kahona. “Organize kasa” kajiwui kakhalata church akhali ararbing kala deaconbing peida khalei chili kahona. “Organize makasa” kajiwui kakhalata church akhali ararbing kala deaconbing makhalei chili kahona. Church hi kathara tui athishurda organize makasala leipai. Chi kachikatha church khala jila matik kacha mi maleithada ararbing kala deaconbing kapangkahai makhalei churchli kahona. Kha church chi kathara tui athishurda manguimana khiwui vang khalajila arar kala deacon sakhavai matik kacha mi maleimada makapangtha kajina kala arar eina deaconbing peida maleilala church leipaiya. Hi Khristawui ningkachangna kaja church haokaphok atamli kala khare thotchanli church kachivali arar kala deaconbing maleisamana. Chi khiwui vang khalajila Prohowui lungli rarka khavai vareshi mayarnaobingwui vang atam khamina. Atam chitharan church governmentwui pongli Biblewui kharin chi khikhala kaji churchli tamkhui ngasaka. Chikatha church chili organize makasa church da theiya kaja church chili matik kacha kathana maleiranga. Naoda matik kacha kathana khalei chitharan organize sakida khalei chithada haokaphokliya mapungphalak

eina masamana. Church akhawui lungli arar kala deaconbing makhalei chili khangui maleimana church chi haophokda atam masangrangakha. Bibleli arar kala deaconbing khalei churchwui pongli kapa samphanga chithada athum katha kathana makhalei churchwui ponglila kapa samphanga. Matik makacha mili kathana kapangki kaji mahutli kathana makhaleina pham-eikharra. Kathara tui athishurda organize makasa kaji hi arar kala deacon sakhavai matik kacha mi maleirang kaji kala makapangrang kaji churchli kahona.

2. *Kathara tui athishurda maningla organize makasa.* Kathana sakhavai matik kacha mi leilala kathana sakhavai mi makapangsang kaji, chithada organize makasa church ashangvali kathara tui athishurda maningla organize makasa hoya. Chithada kasa chi nguiya kala chi kathara tuiwui thi makashurna. Khiwui vang nguiya jikhala jila kathanabing sakhavai katharatui athishurda matik kacha mi leidaleisalala athumli kathana sakhavai makapangsangmana. Chikatha church chi kathana sakhavai matik kacha mi semkhavai haophokda zingum atam kasangkha kahai churchna. Chili matik kacha mi leiya kha churchna athumli makapangsangmana. Chi katharatui athishurda mamashungmana. Sapaidaleilakha eina tangda churchwui lungli matik kacha mibing leihaiakha athumli kathakwui lungli kapangsanghaoki kajina. Matik kacha ararbing kala deaconbing khalei churchbingwui otmanga khuikashap thada kathana makhalei churchbingna makhuirarmana. Church kachivana ararbing kala deaconbing zangda mapung kapha organization leikhavai hotkhana hi khristawui kaphaning kala ningkachangna. “Katharatui athishurda maningla organize makasa church” kaji hi kachikatha churchli kahokhala jila kathana sakhavai matik kacha mibing leilala athumli kathana sakhavai makapangkasang chili kahona. Kathara tui athishurda maningla organize kasa. Katharatui athishurda maningla organize kasa church kaji hi kachikatha churchli kahokhala jila matik makacha kathanabing kapangsangkahai churchli kahona. Kathanabing kapangsang kahai church ngasahaoda organize kasa church da theiya, kha kapangsang kahai mibing chi matik kacha mibing makhaningwui vang katharatui athishurda maningla organize kasa kajina. Church kaikhava thaklak eina organize sangaiya. Athumna kathana sakhavai mapung mapharang kaji kala matik macharang kaji mibingli kathanabing sakhavai kapangsanga. Chithada kasa china athum khalatawui lungli pangkhangapa kala khonkazar khuirangasaka. Matik kacha mi maleiakha kathana makapangsanglala chi katharatui athishurda khangui maleimana. Kha matik makacha mibingli arar sakhavai kapangkasang hi katharatui athishurda mamashungmana. Kathana makapangkasangliva matik makacha mili

kathana sakhavai kapangsang kahai china zakshimeiya. Khiwui vang khala jila china churchwui lungli khamakhao kala khonkazar khuiramira. Katharatui athishurda maningla organize kasa church hi kachikatha church khala jila matik makacha mibingli kathana sakhavai kapangsang kahai churchli kahona.

3. *Katharatui athishurda maningla organize kasa.* Katharatui athishurda maningla organize kasa church kaji hi kachikatha churchli kahokhala jila matik makacha kathanabing kapangsangkahai churchli kahona. Kathanabing kapangsang kahai church ngasahaoda organize kasa church da theiya, kha kapangsang kahai mibing chi matik kacha mibing makhaningwui vang katharatui athishurda maningla organize kasa kajina. Church kaikhava thaklak eina organize sangaiya. Athumna kathana sakhavai mapung mapharang kaji kala matik macharang kaji mibingli kathanabing sakhavai kapangsanga. Chithada kasa china athum khalatawui lungli pangkhangapa kala khonkazar khuirangasaka. Matik kacha mi maleiakha kathana makapangsanglala chi katharatui athishurda khangui maleimana. Kha matik makacha mibingli arar sakhavai kapangkasang hi katharatui athishurda mamashungmana. Kathana makapangkasangliva matik makacha mili kathana sakhavai kapangsang kahai china zakshimeiya. Khiwui vang khala jila china churchwui lungli khamakhao kala khonkazar khuiramira. Katharatui athishurda maningla organize kasa church hi kachikatha church khala jila matik makacha mibingli kathana sakhavai kapangsang kahai churchli kahona.

4. *Katharatui athishurda organize kasa.* Katharatui athishurda organize kasa church kaji hi kachikatha churchli kahokhala jila matik kacha mibingli arar kala deaconbing sakhavai kapangsanghaida khalei churchli kahona. Kathana saki kaji mibingna kathana sakhavai katharatui athishurda matik macharanglakha eina tangda athumli kapangsangkida churchna mamayamana. Chikatha churchli organize sakahai churchna da theiya khiwui vang khala jila chili ararbing kala deaconbing leiya. Kala chi katharatui athishurda organize kasana kaja kathanabing chi katharatui athishurda mathalak eina matik chaya. Church kachiva katharatui athishurda matik kacha kala kakashunga kathana kapangsang kahai church ngasaser khavai lungsanda otmanga khuirano kala thukmeida Varetui tamranu. Kha mibing mapung mapharanglakha kala matik macharanglakha kapangsangkahavai makatotranu. Kachikatha mina ararbing kala deaconbing sarankhala kajiwui pongli 1 Timothy 3 kala Titus 1li kapihaidalei, lairik khani hiwui para bing hi thuklak eina tamkhangarum darka sai. Rakhanao para liva arar akhawui asak-avat kala kasakhava avava eina tamngarumra. Kathanabing kakapangli church kachivawui otman-

ga athishurda katharatui athishurda organize makasa, katharatui athishurda maningla organize makasa, katharatui athishurda maningla organize kasa, kala katharatui athishurda organize kasa kaji hi lei.

### **Khangahan**

1. Churchwui condition hi mashungda leiya kaji chithei khavai ithuma hithada hanga, kaja church hi \_\_\_\_\_.

2. Churchli kathanabing kapangsanghaiya kaji chithei khavai ithumna hithada hanga, kaja church chi \_\_\_\_\_.

3. Churchwui condition hi nguiya kaji chithei khavai ithumna hithada hanga, kaja church hi \_\_\_\_\_.

4. Churchli kathanabing makapangsanghai mana kaji chithei khavai ithumna hithada hanga, kaja church hi \_\_\_\_\_.

5. Bibleli organize kasa church kala organize makasa churchwui pongli kapa masamphang khala?

6. Kathana sakhavai matik kacha mi makhaleiwui vang kathana makapangsanghai kaji churchli \_\_\_\_\_ da hoi.

7. Kathana sakhavai matik kacha mi leiya kha athumli kathana sakhavai mapangsanghai kaji churchli \_\_\_\_\_ da hoi.

8. Kathana sakhavai matik makacha mili kathana sakhavai kapangsang kahi churchli \_\_\_\_\_ da hoi.

9. Kathana sakharan matik kacha mibingli kathana sakhavai kapangsanghai kahi churchli \_\_\_\_\_ da hoi.

10. Kachikatha mina kathana sarakhala kajiwui pongli kapikahai kathara lairikwui chapter khani chi khimamei khala? \_\_\_\_\_.

## **KATAM – 22**

### **ARARBINGWUI QUALIFICATION (I)**

### **OUTLINE**

1. Sui makaka.
2. Preiva akhamang kaje.
3. Mikringda khangashar.

4. Khalatta ngarinkatha.
5. Otsak khamatha.

## **NGASANKHANGARUM**

Ararbingwui qualificationbingwui pongli avava eina matamngarum ranglakha haokaphokli hithada kapikahai lei, “Kachikatha mina churchwui kathana sangaiakha, ana kapha oti ningkachangna” (1 Timothy 3:1). Prohowui churchwui kathana sakhangai mi kachiva wui ningli hithada sakhangaiwui ning leiphalungra kaja kathana akhawui ot hi khamatha otna. Otpam chiwui khangam-kharei kala pangshap chili phaninglaga kathana sakhangai mangasapai mana, kha, chi Proholi otram khangatha apong akhana da khui-laga sangairareo eina saki kajina. Kharitta otngarut khuikhavai arar kasana, ot kasa masamphang khavai kala mili ot kaso khavai arar kasa maningmana. Ararbingwui ot hiya atam, ning kala yang kazanga otna. Chiwui vang atam mida hotkhana darka salaka. Ararwui pam hi chiwui pangshap kala khangam-khareiwui vang ningkachang mangasapaimana. 1st Timothy 3:2na hanga, “Chieina churchwui kathana kasapa chiya sui makaka, preiva akhamang kaje, ngarakzak kahaiya, khalatta ngarinkatha, khaya kaka, khamimali ngahankatha, tamchitheikatha ngasaphalungra”. “ngasaphalungra” kaji tui hiwui kakhalata khalap kahai, makhalan kapai, darka saphalung kaji chili kahangna. Jishuna hanga, ‘okathuili paokazatbingna khalap kahai chi kazingramlila khalap kahaina’ da (Matthew 16:19). Chithada Ararbingwui qualification bing hi kazingram kala okathuili khalap kahaina. Chiwui vang eina athumli mikahai qualification avava chi darka saphalunga. Qualification katongkhali makashungkhararra mi china arar sakhavai matik machamana.

1. *Sui makaka*. “Sui makaka” kajiwui kakhalata mina yet khavai makhalei kajina. Sui makaka mili phenkhavai maleimana. Chiwui kakhalata a hi kakashunga morei makasa mina kaji maningmana (1 John 1:8). Kha moreiwui kasui saikorali yuishap khavai khalattawui kashap eina hotkhana chili kahona. Chikatha miva khalattawui khangui khalang kathei tharan mahuinganaoluila ningateiya, hangphata, kala chiwui vang seiha sai. Chiwui vang ali yetkhavai kala phenkhavai maleimana. Zacharias kala Elizabeth ani hi sui makaka ain khamayona mina (Luke 1:6). Churchna yangsangmida khalei kala ngachonmida khalei rameiva ngarabing sui makaka mi ngasaphalungra (1 Timothy 5:7). Ainwui khamashung-khangarong athishurda Paul hi khayon makhaleia kala sui makaka mina (Philippinao 3:6). Khristawui latkhara zimikshowui vang ngarankharik kahaiya mi avava ngasaser khavai Vareshi saikorali sui makaka mi ngasalu da kasoya (1 Thessalonicanao 5:23; 2 Peter 3:14). Kathara tuizabing hiwui manga eina ithumna theiya kaja sui makaka

mi akha ngasada okthuiyai kaji hi. Ararbing hi athumwui otsakli mina yetkhavai kala khayon phenkhavai makhaleia ngasaphalungra.

2. *Preiva akhamang kaje*. “Preiva akhamang kaje” kaji tui hina arar akhana sakhavai darka kasa apong khani chitheimiya; chiya, mi chi shim kapan-na mayarnao akha ngasaphalungra kala Preiva akhamang khaleia gahara akha ngasaphalungra. Yaronnao kala ngala khangashir (preiva akhali langda khalei) mina ararbingwui pam makhuipai mana. khangatei ot saikoralili ngayokhavai kasa thada hiwui ponglila church ahangva saikorawui vang ngayo khavai ngasaphalungra (1 Peter 5:3). Mayarnao kachiva kachichawui preiva leiphalungra chithada shanao kachivala kachichawui gahara leiphalungra (1 Corinthnao 7:2). Kachikatha mina apreivali maningakha agaharali panghailaga mi khangatei akhali aleihaiakha chi phokaphana (Romnao 7:1-3). Jishuna hanga kaja haokaphokwui eina hi Varewui ningkachangna kha mibingwui ning khamararwui vang Moseswui ain azingli khangchei leikhangsakna da (Matthew 19:3-9). Arar akha saki kaji mi hi preiva akhamang kaje ngasaphalungra.

3. *Mikringda khangashar*. Mikringda khangashar kajiwui kakhalata ngasharlak eina mayonkhami kala yangsangkhami chili kahona. Ngayali khamayona china mikringda ngasharya. Kalashikapai apong saikoralili awui ning mathuklak eina leiya. Kalashikapai apong khalei tharan Israelwui keinung kachivali khalei phakho khamayona bingna mibingli hangkhamathinwui pao chihoya kaja mahangkhamathinwui vang mibing kalashihaiakha athumwui ashee khamyonabingwui tungli tara (Ezekiel 3:17-19). Hebrewnao 13:17na hanga kaja ararbing athumwui otsak saikora Vareili chitheiki jihaoda athumna member kachivawui mangla mayonmiya kala yangsangmiya da. Vareshi kachiva mikringda ngasharphalungra kaja yangkashe chippee chi kazingkha thada nirlaga kachikathali shaikhavai zatung zatvada phazattalei (1 Peter 5:8). Yaonaobingli yangsangkhami kala mayonkhami hi ararbing saikorana athumwui otngarutna da theiphalungra, chithada sada atam kachida mikringda ngasharphalungra.

4. *Khalatta ngarinkatha*. Khalatta ngarinkatha kajiwui kakhalata ot saikoralili sakda kakhui, chang khalei (kalang kala suikata makhalei), ngarakzak kahai/tazak kahai kala ningphanin vakashung chili kahona. Makaphana pemkhai okathui hili Vareshi saikora khalatta khangarin mirin eina okthui phalungra (Titus 2:12). Paokapha li khamashunga tui kala khalatta khangarin (Tazak kahai) zanga. Vareshiwui mirin kayakha sakkhala kaji ithum machukphalungra (1 Peter 4:7; 5:8). Arar akha sada khalatta ngarinkatha mirinwui pongli mapairekphalungmara. Ana ot saikoralili sakda khuiphalungra, thangmeiphalungra

kala otsak kachivali ngarakzak kahai kala tazak kahai mi ngasaphalungra.

5. *Khaya kaka/acham-aram khamatha*. Kachikatha mi akhana arar sakhavai matik kacha mi akha ngasara chiakha a hi acham-aram khamatha kala tacham-taram kahai mi ngasaphalungra. Paokazat Paul akhalatta ngayokhavai akha sada Christianbingwui mangali acham-aram khamatha sachitheiya (1 Thessalonicanao 2:10; 2 Thessalonicanao 3:7). Mashitkasangabingli Khristawui vang yuikhui khavai athumwui mangali ningkathar kala khamatha mirin ringchithe phalungra (1 Peter 2:12). Arar akhawui mirin hi ali kathei mi saikorawui mangali ngayokhavai akha sada khamashung-khangaronga mirin kharing ngasaphalungra.

### **Khangahan**

1. “Phalungra” kajiwui kakhalat khikhala?
2. 1st Timothy 3:1na hanga, “kachithana kathana sangaiakha, ana \_\_\_\_\_ oti ningkachangna.
3. Matthew 16:19na hanga kaja paokazatbingwui tamkachitheina okathuilila kala kazingramlila \_\_\_\_\_ kahaina.
4. Sui makaka kajiwui kakhalata \_\_\_\_\_.
5. Sui makaka kaji hi morei makasa kashungchao kahai chili kahola?
6. “Preiva akhamang kaje” kaji hina \_\_\_\_\_ kala ngala \_\_\_\_\_ mili makhamayana.
7. Mikringda khangashar kaji hi \_\_\_\_\_.
8. Khalatta ngarinkatha kajiwui kakhalat tuiyar kathum hanglu.
9. Acham-aram khamatha kajiwui kakhalat tuiyar khani hanglu.
10. Ezekiel 3:17-19 li kachikatha miwui pongli kapihaidalei khala?

## **KATAM - 23**

### **ARARIBINGWUI QUALIFICATION (II)**

### **OUTLINE**

1. Khamimali ngahankatha.
2. Tamchitheikatha.
3. Makhamaripa.
4. Masakashe.
5. Lupali maleikashe/makakharam.
6. Ningzinghakharing.

## **NGASANKHANGARUM**

1. *Khamimali ngahankatha*. Kachikatha mina arar sarakhala kajiwui pongli chitheimi kahai qualification bing saikorawui pongli katam darka salaka. Ararbingwui pongli kapi kahai saikora avava eina mathalak eina theikhuiph-alungra. Kapi kahai asak-avat saikora hi Vareishi saikorawuili leikhangayiya acham-aram bingna. Mapungpha kahai Vareshi kachivawui asak-avatwui eina khangatei chia shim pankahai mibingli khangashik leida kateokha hangkahai chi manga. Qualification chungkhameiva Vareshi saikora kachichawuili leikhavai hotnaki kajina. Saikora chiwui ngachaili akha chiya khikhala jila khamimali ngahankatha kaji hina. Titus 1:8na hanga kaja ararbing khamishimali leikashiya mi ngasaphalungra da. Chiwui kakhalata khavat khangazan bingli shimzunkhangasak kala kachichashi shimli ngayinkhui khangasak chili kahona. Miza-mikhamang kala shimzun khangasak manga eina Vareshibingwui leishikathei kala acham khamatha kachitheina. Khamishimali leikashe kaji hi mi saikoralis chitheiki kajina, matailak eina Vareshibingli (Galatiano 6:10). Romnao 12:13na hanga katharabingwui ngachaili khavat-khangazanbingli nawui khalalei ngayarmilu kala khamishimali razangasaklu da. Hebrewnao 13:2na hanga, “Khamima ngahankathei eina kaikhana matheila kazingraoli zunkhuingasak haira” da. Hangda khalei hi Abrahamna kazingrao ngasakasa khamishimabingli awui shimli zunkhuingasaklaga otram ngathakhami atam chitharanwui chi kahangna (Haokaphok 18:1-8). 1st John 3:17na tamchitheida hanga, “Kachikatha mi akhana avanao akhawui khavat thatheilaga malumashanngaiakha, ana Vareli leishiya da kathada hangpaira khala?” da. 1st Peter 4:9na hanga, “Ning khamakhao maleila mathanthathup khamishimali ngahanlu” da.

2. *Tamchitheikatha*. Shebshi tuili “apt” kaji hili sakashap kala sangai-rareo kahai khanini hi zangkahaina. Arar akha hi Bible mathalak eina tamchitheikashapa mi akha ngasaphalungra. Hi kachiwui eina rakhalajila ngasharlak eina katam (study kasa), ningsanglak eina khangaran kasa, tamkhamiwui ot saching kaji, hikathawui eina kharana. Pao hakashoka bingla tamchitheikashap kala tamchitheikhangai ning leiphalungra (2 Timothy 2:19). Vareshirin hiya Tamkhamiwui dharmana. Jishuna hanga Yur saikoralis tamilu, mibingli rahikmilu kala athumli tamchitheilu da (Matthew 28:19, 20). Jishuna hanga, kaja Varena mibingli tamchitheida kala nganakhuingasakda Awuili rangasaka da (John 6:44,45). Mi khangateibinglila tamchitheishapki kaje shitsangkapaia mibingli tamchitheilu da Paulna Timothyli hanga (2 Timothy 2:2). Kharewui churchbing tamkachitheili kala Khristawui apong hakashokli mangasamlak mana (Otsak 5:42). Hebrew Vareshi bing oja saran kahaina kha athumli kachikatha akhana Varewui tuiwui pheisin kharei tamchitheikhavai darka sadaleifaya da



kapihaiya (Hebrewnao 5:12). Kathara tuibing hina churchwui lungli mathalak eina tamkachithei kala khamatha oja khalei darka saya kaje chitheimiya. Khamatha kala Varewui tui tamikashapa oja akha khangasa hiwui manga eina ararbing mi kateibingwui mangali ngayokhavai akha ngasaphalungra. A hi yaonaobingli phau kashapa ngasaphalungra (Otsak 20:28). Ana panglak eina tamkachithei manga eina khangui-khalang kala moreili yuikhavai ali churchwui lungli darka sara. A hi tamchithei kashapa kala tamkachithei wui ot sangai-rareo kahai mi ngasaphalungra.

3. *Makhamaripa*. Hiwui kakhalata arar akhana khamaripwui ot kala maripngasak kapai ot masapaimana kajina. Khi otnakhala ali mayuingasakpai mara da Paulna hanga (1 Corinthnao 6:12). Khamaripabing kazing wungramli mazangmara da ana hanga (1 Corinthnao 6:10). Kachamkhangai, ningkachot, wuk-kakhanang, nganangkhangazai, kapatui khamatui, angalang maleila khama kaza kala mik kahunga saikora hi khamaripabingwui leiya (Chansam 23:21, 29-35). Khalata khangathaya zamkhorna pharana khamakei thada kala pharayurna kapharip thada makeira kala pharipra. Maripkhangasaka chi chamkhorna. Khor hi Prohowui phakachizatli apong mashungrik eina shichinpai (Matthew 26:29). Ariwui vangla shichinpai (1 Timothy 5:23). Kha chi shikachin eina china marip ngasakdaleiakha chi moreina. Chithada ararbing churchna ngayokhavai akha sada khamaripa mi mangasaphalungmara.

4. *Masakashe*. Arar akha sada mi kateili kashaowa mi masaphalung mara. Kashao mazangla ana mibingli awui khamatha otsak chieina tamkhuingasakda ngacheingasakpai. Vareshi akhana kachikatha akhali mashaopailak mana. Jishuna khorum khavai shimwui sei kala yaonaobingli kharawui lijei eina shaoda kashamshokser haowa (John 2:15). Ava-ava ngarana naongarali lijei eina raka (Chansam 13:24). Kha ararbingva lijei shichinki kaji pamli khalatta ngayo khavai akha khangasawui pangshap chi shichinna. Phasarin eina tandi mida kharak otsak hikathatha hi sarkarna shikachinna (Romnao 13:3,4). Kha Khristawui wungram hiya raikhai eina mamungmana. Varewui tuiwui pangshapna raikhaili zanmeiya (Hebrewnao 4:12). Ithumli yangkashebingna kashao tharan lakhashongwui maila ngareimida yuikakhui china ngamangasaolaga yuikakhuili phameikhara (Matthew 5:39). Ararbing hi masakashiya mi sada Vareshibingwui ngayokhavai ngasaya.

5. *Lupali maleikashe/makhangamar*. Arar akha sada kakharam mi mangasaphalungmara. Khamakhao lan/lupa hi manglawui maningla kha okathui kala phasawui tongkazana. Kachikathana awui khalalei ot saikora hi awui mirinna da phaningakha chikatha mi chi khangamar mina (Luke 12:15). Ana

lan kachungkha kazipsanga kha Varewui miktali makashanga mi ngasai (Luke 12:21). Jishuna hanga kaja ithum Vare eina lanli otram mangatharumpaimana (Matthew 6:24). Khangamar mibing hi meomali khokharuma bingna (Colosianao 3:5). Athumli churchna ot masakrumpaimana kala khokharumla mangarumpai mana (1 Corinthnao 5:11). Vareshibing kashanga mi ngasakhavai mahotnamana. Athumwui hakmeithui kaji tongkaza chiya khikhalajila Vareli ngavapta kharina mirin hina. Kashakkaza kala shanvai chonvai hinala shapkahaina. Mikumoli shimankhangasaka kashang kala lanwui khalen kala kasui chili matazangkavai athum ngasharlak eina okthuiya. Athumna theiya kaja pheisali leikashi hi makapha saikaora kala mikumoli shitkasangwui eina thannguikhangasak kala wukakhanang sikafa kachungkha samphang khangasakwui angayungna da (1 Timothy 6:6-10). Vareshibingwui saman kazin-gramli lei (Matthew 5:12). Pheisali leikashiwui ning leikhangasaka kakharam kala khangamar athumna masamana. Ararbing hiya pheisali kala okathuiwui otli maleikashiya mi ngasada mibingna tamkhuikapaiya ngayokhavai akha ngasaphalungra. Chithada athum khamakhao lanli mangamarmana.

6. *Ningzinghakharing*. Arar hi malungkhanima kala ningzingharinghaiya. A hi tacham-taramhai kala mili leishikatha mina. Kharitta othun saikora malungkhavat maleilakla phunga. Ot ayayavali ningkakatat samphangaowa da masaluila ngasamkahi masamana. Awui ning yuiung-yuiva masamana kaja awui nganingtit kahai lei. Ningzinghakharing hi vareshi saikorawui leiphalungra (2 Peter 1:6). Shitkasang chang khayang hina ningzinghakharing/kakang shokngasaka (James 1:3). Kharitta othun kaphung hina Vareli shitkasang kala kachihan hakngasaka. Ararbingwui kakhang khaleiwui vang khangatei mibing kachotkachang samkaphang tharan khangshapa athumna katomishapa. Athum malung khanim kala tacham-taram kahaiwui vang kasui khara tharan memberbingna athumwui kasatkhami kala katomkhamili chihanna. Churchna kazipda ngasankhangrum tharan athumwui ngachaili ngaphat-ngayet mashok khavai ararbingna ngachonmiya. Athumna church hi mangathala nganingtit khavai ngachonmiya. Ningzinghakharing hi Vareshi kachivana darka kasa mathalak kahai mikumowui acham akhana. Chithada, ararbing hi ningzinghakharingli mibingwui vang ngayokhavai akha ngasai.

### **Khangahan**

1. Khamimali ngahankatha kajiwui kakhalat kasha eina kapilu.
2. Khamimali ngahankatha hi Vareshi \_\_\_\_\_ vangna, kha matailak eina khipalongwui vang khala?
3. “Mi kateili tamchitheikatha” kajiwui kakhalat kasha eina hanglu.

4. “Tamkachithei”wui pongli kapikahai kathara tuiza shini kapilu.
5. Zamkhor hi khamashung apong khanili shichinpai, chi khikhala hanglu.
6. Kashaowa kaji hi khikhala?
7. Kachikatha atamli kashao hi shichinkhala kaji apong khani hanglu.
8. Khamakhaowa lan kaji hi khikhala?
9. Khangamarwui pongli kapi kahai kathara tuiza shini hanglu.
10. Ningzinghakharing kaji hi khikhala?

**KATAM – 24**  
**ARARIBINGWUI QUALIFICATION (III)**  
**OUTLINE**

1. Makhararkazara.
2. Shimkhurli nganaokatheiya kala ngakuikashapa.
3. Ningtongda shitkasang kala kahang khangana naongara khaleiya mi ngasaphalungra.
4. Sadhardhara vareshi maningphalungmara.
5. Vareshi makhaningbingwui lunglila mingzat khalei mi ngasaphalungra.
6. Varewui lanse akha sada shat makaka mi ngasaphalungra.

**NGASANKHANGARUM**

1. *Makhararkazara*. 1st Timothy 3:3na hanga kaja arar akha sada makhararkazara mi ngasaphalungra da. Titus 3:7nala hanga kaja a malungmavatkazara mi saphalungra da. Awui lungvat khalatana khamda tuimatui otsak kachivali malungkhavat eina masamana. A hia chingrihaiya kala ana chingri kahai khuiraya. Chingrihai khavai kasabing sokhamina da Jishuna hanga (Matthew 5:9). Vareshi saikora mikachivali chingri eina okthuirumthei phalungra (Romnao 12:18). Athumli malungkhanim kala lukhamashan khamiya atungshongwui thangmet athumwuili leiya. Athumna khamashung-khangarongwui atheiwui atha chingri eina yaowa. Athumna chingrihai ngasaka (James 3:17,18). Ithumli hithada kasohai: “Ning kakha, ningkachot, malungkhavat, khonkazar, khamashat, kala yangkharing khangarok saikora chi horserhao-lu. Chiwui mahutliva Khristawui manga eina Varena nathumli pheokhami chithada, nathum akha eina akha pheomi ngarokta malung khangahui eina ningaishingaroklu” (Ephesianao 4:31,32). Ithumli hithada hangmiya, “Mi kachivana nganakakhuili thakranu, kha khamatui eina malungkhavatli ngaironhairanu kaji hi phaningunglu da (James 1:19). Mili ngaphat-ngayatda kasa

mi chi khonkazar ningkachang mina. Pakhangapa kala khangamakhangasao khuikhara china a kachikatha mi khala kaji thei. Arar hia chingrikahai kala malungkhanim wui ngayokhavai akha ngasakhavai kapangkasangna. Chithada, a hi mili ngaphat-ngayat kasa kala malungvatkazara mi mangasamana.

2. *Shimkhurli nganaokatheiya kala ngakuikashapa.* Arar hia kapha gahara kala kapha avava akhana. Awui khamatha acham-aram china awui shimkhurli Vareli khangavapa shimkhur sangasaka. A kachikatha mi khala kaji hi mi kateili langda awui shimkhurna theimeiya. Chithada sada, awui acham-aram khamathalapai kashilapai awui shimkhur manga eina theiya. 1 Timothy 3:5na hanga kaja kachikathana awui shimkhurli mathalak eina mangakuitheiakha ana kathada Varewui churchli ngakuirakhala da. Shimkhur kala church hi Vareshirinwui tamkachithei athishurda ngakuiphalungra. Mi akhawui acham kala awui sakashap hi awui shimkhur manga eina theipai. Kachikatha mi akha- na awui shimkhurli awui acham khamatha china mangacheingasakrarakha khalatana a hi churchwui arar sakida matik machamana kaji chitheimiya. Cornelius kaho mipa hi awui shimkhurwui mi saikora zangda Vareli khangacheeya mi akha ngasai (Otsak 10:2). Awui shimkhurwui mi saikora ali khayashiya kala awui khamatha otsak sakachithei chili shurda khamashung-khangarong sangailaka. Arar akha sada awui shimkhurli ngakuitheiphalungra, chithada sada rotmaratda khalei mi kateibingwui shimkhurli ana hangmachinshapra. Pangmon Elina awui naongarali mahangkhamachinwui vang ali tandi miya (1 Samuel 3:13). Chiwui vang eina mayarnaobing Varewui shimkhur kaja churchli ngakuikida matik kacha mi akhana kaji kachithei sada rilak eina khalattawui shimkhur ngakuitheiphalungra.

3. *Ningtongda shitkasang kala kahang khangana naongara khaleiya mi ngasaphalungra.* Hila atungli ngasangarum kahai chili ngashunda kharana. Arar akhawui naongarabing apong saikoralis hamkasang eina ngasoda kahang khangana naongara ngasaphalungra (1 Timothy 3:4). Awui naongarabing ning tongda shitkasanga, kapakhayong ot makasa kahang khangana naongara ngasaphalungra (Titus 1:6). Chithada sada mi akhana arar sakida matik chakhangasak kala matik machakhangasak kaji hi awui naongarabingwui tunglila lei. Ava-ava ngarabing naongarali athumna malungvatkapai apong eina marakla kha Prohowui hangkachithei kala kharak chieina rarka ngasaki kajina (Ephesiano 6:4). Avava akhana mi kateili kayakha mathada rakshap khala kaji hi ana awui naongarali rakkakhui china chitheiya. Ana lungvat kala khonshat khuirakapai apong eina marakla kha Khristawui leikashi eina rakta rarka ngasaki kajina. Churchwui arar akha sada kathana kasa hi avava akha sada shimkhurwui kathana kasa chieina chang yanga. Kalikhada

kachikatha mi akhawui naongarabing yaruili khonzarkhangasaka maphakakhui naongara ngasadaleiakha china khi chithei khalajila hamkasang eina ngasoda kahang khangana kathada shokngasakra khala kaji matheimana kaji chitheimiya. Chithada sada a churchwui kathana sakida matik machamana. Arar akha sada apong saikoralikahang khangana naongara leiphalungra.

4. *Sadhardhara vareshi maningphalungmara.* Arar akha hi Vareshi sadhardhar maningphalungmara. Kachikatha mili sadhardhar hokhala jila mature masarang kajiwui vang experience makhalei kala masathei kaji chili kahona. “Arar” kaji mingpho khalata hinala chitheimidalei kaja hi mapungpha kahai kala ot kachungkhali experience leikahai mili kahona kaji. Vareshi sadhardhar mi china churchwui arar masapai mana. Chi awui vang kalashi khavaina kaja khayaning nganinghaida chipeewui pangli tazanghaipai (1 Timothy 3:6). Chikatha mi chi kathana sakhavai mapung mapharanga. Zingkum kayakha Vareshi sahairasa kaji mi ngasara khala kaji horzak eina Bibleli kapikahai maleimana kha ana mapungphakahai mi akha sada awui asak-avat kathada leingayi khala kaji horzak eina kapi kahai lei. Kachikatha mi kaikhava atam kashakhawui lungli kakashunga mi ngasahaipai kala kaikhava mapungkapha mi ngasakida atam kasangkha khuipai. Nganuida khalei mi chi thangmet samphang khavai zingkum rarkasang kala ot sakathei darka sai. Chithada sada, ararabing nganuidaleifa kaji mi kala Vareshi sadhardhar mina masapaimana.

5. *Vareshi makhaningbingwui lunglila mizat khamatha khalei mi ngasaphalungra.* Arar akha sada mavareshibingwui ngachailila mingzat khamatha leiphalungra (1 Timothy 3:7). Awui mingzat khangateibingnala khayakashia ngasaphalungra. Ana otsakrumda khalei mibing kala awui ngasotnaobingna khayakashia mi ngasaphalungra. A hi tangkhamangli khalei mibingwui vang kahor ngasara (Matthew 5:14). Ana awui kahor mibingwui mangali horngasaka chithada kasa eina mibingna awui khamatha otsak theida Vareli masotmiya (Matthew 5:16). Mashitkasanga mibing eina tangdala awui kapha kasa mirin chili khayashiya ngasaphalungra. Mavareshibing atam kachida ithumli khayon phenkhavai apong phaya. Kha athumna kachikatha vareshi akhali phenkikaji mahutli khayashidaleiakha china khi chithei khalajila a khamatha mina kaji chitheiya. Churchwui ararabing chikatha mi ngasaki kajina. Awui khamatha otsak kala kapha kasa mirin kharing chiwui manga eina ana pandakhalei apam chiwui mibingna ali theira. Hili mingzat khamatha khalei da hoi.

6. *Varewui lanse akha sada shat makaka mi ngasaphalungra.* 1. Titus 1:7na hanga kaja yaokahaoma hiya Varewui lanse akha sada shat makaka mi saphalungra da. Aman kasak oti mayonmi khavai kapangkahai mi chili lanse da hoi. A hiya aman kasak oti yangsanghamiyana. Awui akhavapawui lan

saikora mayonkhami hi awui otngarutna. Chithada sada a atam kachida shitsangkapaiya mi kasa darka sai (1 Corinthnao 4:2). Ararbingwui pangli shinnakahai lan chiya aman kasaka member bingwui manglabing china (Hebrewnao 13:17). Naoda awui otmanga saikora Vareli chitheiki jihaoda mangla bingli mathalak eina yangmichingra. Athumli shinnakahai ot chiya okathuli aman sakmeikap kaji otna (Matthew 16:26). Awui otngarut haklakga. Chithada sada arar saki kaji mi chiya kharitta otngarut hi khuikhavai kathada shitsangkapaiya mi sapairakhala kaji theiphalungra. Miwui aman kasaka ot saikoralis a hi shitsangkapaiya matik kacha mi akha saphalungra. Hi awui otngarut akha sada nguikahai tharan akhalatawui tungli khayon phenra kaji theiphalungra. Chithada sada, arar hiya Varewui shitsangkapaiya lanse akha wui ot sakatheiya mi saphalungra.

### **Khangahan**

1. Malungvatkazar kaji hi khili kahokhala?
2. Khonkazar mina \_\_\_\_\_ leishi.
3. Mi akhawui asak-avat kala otsak mi kateili langda khipana theimeikhala?
4. \_\_\_\_\_ awui \_\_\_\_\_ saikora zangda Vareli ngacheeya.
5. Shitkasanga naongara bingwui pongli kapi kahai kathara tuiza kathum hanglu.
6. Vareshi sadhardhar hi \_\_\_\_\_
7. Vareshi sadhardhara bingna kachikatha morei sakapawui kalashat leikhala?
8. Mashitkasangabing kaji hi khipalongli kaho khala?
9. Lanse kaji hi khikhala?
10. Aman sakmeikap kaji lan chi khikhala?

### **KATAM – 25**

### **ARARBINGWUI QUALIFICATION (IV)**

### **OUTLINE**

1. Khalattawui ningkachangmang kasa mi mangasaphalungmara (manglangkaso).
2. Khamatha kala kaphna mili leikashiya.
3. Khamashunga
4. Kathara

5. Chang khalei (makahen)
6. Varewui tui singtit kaje.

## **NGASANKHANGARUM**

1. *Khalattawui ningkachangmang kasa mi mangasaphalungmara (malangkas)*. Arar akha sada khalattawui ningkachangmang masapai mana kala malangsopaimana (Titus 1:7). Akhalattawui vang mang phaninglaga mi kateibingwui tui manganakasang hikathatha hi masaphalungra mara. A hiya khalattawui ningkachang sakhangai leisalala hortahailaga yaruiwui phakhavai vang khamachuk mi ngasakikajina. Vareli makatheiya kala okathuiwui otli kakahaobing chiya langsongaiya kala khalattawui ningkachangmang sangaiya (2 Peter 2:10), kha arar akha sada machithaphalungmara. Ana kasasa saikora khonkazar kala langsotning eina masamana kha malungkhanim eina ngasoda khalattali mina phameiya da phaningda athumli masotmiya. Khalattawui vangmang maphaningla mi kateibingwui vangla phaningmiya (Philippinao 2:3, 4). Khalatali khamataiya kasa ana maningchangmana (3 John 9). Khalatawui vangmang kaphaning mi china churchwui lungli kakai-katek khuriraya kala Khalatawui ningkachang maningakha mi kateili makatomngaimana. Ana phaninga kaja church hupta ali khamataiya sada khuiphalongra da. Kha church mungda khaleiya ararbingva chikatha mi mangasaphalungmara. Athumna khalatawui ningkachang kala langsotning eina maningla kha malungkhanim kala ngayokhavai akha khangasa chiwui manga eina munga. Khalatawui vangmang kaphaning kathanali mi khipakha mashurngaimana. Jishuwui malung khanim kala Akhalatawui vang makhamachuk china Ali kahakka kathana ngasangasaka. Pangshap saikora Awuli leisalala akhalatawui ningkachang athishurda sakhavai apong maphamana. Yaokahoma akha sada ararbing Yaokahoma akhavana ngayokhavai sachithei kahai chili shurki kajina. Churchwui lungli malungkhanimli kala khangahuili langmeida darka sakhamei katei maleimana. Ararbingna khalatawui vang makhamachuk kala malungkhanim wui apong chitheimiya. Athum hiya khalatawui ningkachangmang maphamana.

2. *Khamatha kala kaphna mili leikashiya*. Churchwui ararbingva kapha kala khangarong ot saikorali leishi (Titus 1:8). Kala athumna makapha ot saikorali ningkachaiya (Romnao 12:9). Makapha ngasotnaona kapha mili shimangasaka (1 Corinthnao 15:33). Athumna kapha apam kala kapha ot saikorali leishi. Athum makaphawui eina tada thuihaowa (1 Thessalonicanao 5:21, 22), kala kapha chili singtitta. Vareli ngavapta kharing hi athumwui ringkaphana. Mi akhawui pongli theikhaira jiakha ana khiot kasali awui ringkapha leikhala

kaji yangra kaja china a kachikatha mi khala kaji theikhuingasaka. Ithumna mi akhawui acham-aram hi mi china kachikatha ngasotnao kala kachikatha kasakhava ningchangkhala kaji eina theiya. Arar akha sakida matik kacha mi chiya kapha mi saikorali leikashi kala kapha, khangaronga ot saikorali leikashi mi ngasaphalungra.

3. *Khamashunga*. Arar hiya mashun kala ning-wuklung kathara mi ngasaphalungra (Titus 1:8). Ana mibingli kasasa saikora atam kachida khamashung eina saya. Ana khipalikha yangkhei kahai masamana kala khayaning nganingda church member akhali langda khangatei akhali leishimei da masamana. Makhamashung sakhavai ali okathuiwui khamakhao ot eina kasui ana mamayamana. Atam kachida awui bichar kala decision kachiva khamashung kala ningkathar eina saya. Ana awui ningli khamatha masot samphang khangayi, khamashung, ningkahak, mashun, kathar, khamatha, kala khaya kaka hikatha hi shaptithaiya (Philippinao4:8). Kathana akha sada otram khangatha tharan ningmakathar ot sakhavai alila apong kachungkha eina kasui radaleira. Vareli makhangavap member kala yurjat kakhai mi, member makhaning ayarwui mibingna ali pangapangasak khavai kala yuiung-yuiva ngasak khavai apong phaya. Churchwui otngarutwui pongli rahaiakha ana shimkhur, chinaongara kala ngasotnaobingwui mai yangda athumwui michang sangaihaora. Khangarong kala ningkathar khikhala da ana theikida saknara kala chi sakida awui vang sakmeikhar haora. Kha ava memberbingna chihankapai kala shitsang kapai mi ngasaphalungki kajina. A hiya michang makhaila member saikorali horzakda sakhamiya arar akhana kaji saikorana katheiya mi ngasaki kajina. Chithada kasa chili khangarong kala ningkathar hoi.

4. *Kathara*. Arar hiya katharana (Titus 1:8). Awui mirin tharlakga, mamakhaomana, kala chikatchao kahai mirina. Awui atam kala yang ngateida shichinkhavai khaishok kahaina. Awui phasa ringchigat sada Vareli chigatta kala otram khangathali dharchigatta Ali ningyang ungasaka (Romnao 12:1). Ana akhalattali mamakhao ngasakmana kaja awuili Mangla Kathara lei (1 Corinthnao 3:16, 17). Ana kathana akha sada church chi kathar eina khayonkhamang, chukhara kala khavat maleilakla church khalattali Khristali chigat khavai ngaranna (Ephesianao 5:27). Ana kathara pang khangkada seiha samiya (1 Timothy 2:8). Ana thei kaja ali Varewui mi sada kathara sakhavai hokhui kahaina da (2 Timothy 1:9). A kathara mi akha sada kateibinglila kathara sakhavai thanmiya.

5. *Khalatta khangarin*. Churchwui Arar akha sada ot saikorali chang leiya, kala khalatta khangarin mi ngasai (Titus 1:8). Ana akhalattali rakka kala kahlen ot sakhavai ali akhalattana mamayamana. Pao kapha hiya



khamashung-khangarong, khalatta khangarin kala rakida khalei bicharwui paona (Otsak 24:25). Khangareo-khangahanli khayongana khalatta khangrin eina khangahanli zangkhavai khangaran kasa takameina ithum vareshibing saikorala chithaphalungra, kha shimankapai kuihonwui vang maningla kha mashimankapai kuihonwui vang (1 Corinthnao 9:25). Ithum khalatta discipline azingli leiphalungra kala ithumwui phasa chili hamsangphalungra maningakha mikatheili pao kapha hashokmihailga ithumpa kashiman ngasara (1 Corinthnao 9:27). Mangla katharana khalatta khangarin hi manglawui athei akha sada matheingasakka (Galatianao 5:23). Arar akha sada ana Varewui khangachon manga eina awui lungvat kala phasawui ningkachangli ngarintheiya. Ana akhalattali khalattawui ningkachang sakhui khavai apong mamimana. Yanglu, church kachivana ngayokhavai khalatta khangarina arar kayakha darka sadalei khala!

6. *Varewui tui singtit kaje*. Khangayatbingli machinmishap khavai kala athumli hangchitheishap khavai khamashunga shitkasangwui tui chi ararbingna singtit phalungra da Titus 1:9na tamchitheiya. Hi “mili tamchitheikashap mi ngasaki kajina” kajiwui pongli ngashunlaga tamchithe khamaron tuipong akhana. Arar akha sada a hi mashitkasangabinglila kala shitkasangabinglila tamchitheikashapa mi akha ngasaphalungra. A nguida tamkachithe theishap phalungra kala chi mamashungmana da mili chitheishap phalungra. Varewui tui kala manglawui machinkhami eina ngasoda khangayatabingli mashungmishap phalungra. Arar akhana chikatha mi sashap khavai a hi khamashunga tamkachithe mathalak eina tamkhui kahaiya mi ngasaphalungra (2 Timothy 1:13). Khangayatbingna makonglui ngasakshap khavai a hi khamasunga tamkachithe chili nganingtit kahai mi ngasaphalungra. A hi leikashi eina ngasoda kapinga kala pangshap khaleiya oja ngasaphalungra. “Varewui tui singtit kaje” kaji chi hili kahona.

Kachikatha mina churchwui arar sarakhala kajiwui pongli kapikahai athishurda tamkhangarum hina kakupna. Kha khanaowali, ararbingranu kala deaconbingranu rilak eina athumli chang yangda chukhara maleimana kaji theikhui kahaiwui thili kapangsangnaora kaji 1st Timothy 3:10wui eina ithumna theikhuiya. Chiwui kakhalata arar kala deacon sakida khalei mi chi awuili atungli tamngarum kahai acham-aram kala asak-avat saikora chi leiphalungra kajina. Arar sakida khalei awuili arar akhana leikhangayiya acham-aram kala otsak saikora leiya kaji hi church mipha saikorana kachungkhashi theida shakhi sakahai ngasaphalungra. Chiwui kakhalata matik kacha arar akha ngasakhavai hotkhana hi atam kazanga ot akhana kajina. Churchna shitsangkapaiya mi sakhavai atam sangda kazang darka sai. Atam

kashakhawui lungli mi akhana arar akhawuili leikhangayiya acham-aram kala asak-avat saikora hi maleirarmana. Kachithana atam kashakhawui lungli arar akha thada kashungshapakha chi sakharekna. Ana otsak eina sachitheiphalungra, chithada sada mi saikorana ali mayara. Kala ana sachitheida khalei kapha otsak saikora chi ningtharlak eina kala kachangkhat awui acham-aram ngasaki kajina. Mi kachiva arar sapai kha chi sakhavai hotkhana hi mapaimana. Arar akhana leikhangayi acham-aram kala asak-avat saikora hi chitheikhavai ayarmangli maningla kha alungshongla chikatha khamatha mi ngasaki kajina. Okathuili kathana kala otpam ayur ngatatei da khalei saikora ararbingwui kakashung thada kashung phalungra kaji maleimana, kha, chi khiwui vang khalajila athum ararbingwui thada khamataiya maningmana.

### **Khangahan**

1. Khalattawui ningkachangmang kasa kaji hi khili kaho khala, meikhailu.
2. Khalattawui ningkachangmang makasa kajiwui pongli kathara tuiza mati hanglu.
3. Arar akhana kachikatha otli leishi kala ningkachai khala?
4. Mi akhana kachikatha ngasotnao ngasokhala kaji china a kachikatha mi khala kaji \_\_\_\_\_.
5. Khamashung kajiwui kakhalat tuiyar khani hanglu.
6. Kathara kajiwui kakhalat tuiyar khani hanglu.
7. Kathara wui pongli kathara tuiza tharuk hanglu.
8. Khalatta khangarin kajiwui pongli meikhailu.
9. Arar hi \_\_\_\_\_ kala shikasanga bingli tamchithei kashappa mi ngasaphalungra.
10. Khipalongli khala rilak eina chang yangda chukhara maleimana da theikhuiki kaji bing chi?

## **KATAM – 26 DEACONBINGWUI QUALIFICATION KALA ATHUMWUI OTNGARUT OUTLINE**

1. Athumwui pam.
2. Athumwui otngarut.
3. Athumwui qualification.

### **NGASANKHANGARUM**

1. *Athumwui pam.* Kadhara Tuingashitwui churchwui alungli khalei

kathana ayur katei akha chiya khipalongkhalajila deaconbingna. Kachikatha mina churchwui arar sarakhala kajiwui pongli hangkahaiwui thili biblena deaconbingwui pongli hanga (1 Timothy 3:8-13). Tuiza tharali hithada hanga, “Rida athumli chang yangfalu, laga chukhara maleimana da theikhui kahaiwui thili deacon sanaoranu”. Chithada sada deaconbing hi Prohowui churchwui kathanabingna. Philippinao 1:11 Paulna Philippili khalei churchli chithi kakapi tharan hithada kapida hanga, “Philippili khalei churchwui bishopbing kala deaconbing zangda Khristali ngarumkahai Varewui mibing” da. Hina khi chitheimi khalajila deaconbingla churchwui kathana sada ararbingli (bishopbing) otram ngatharuma kaji chitheimiya. Kathara tuizabing hiwui manga eina theikhuiya kaja deaconbing hi churchwui alungli ararbingwui eina khangatei otpam akha kasinga kathanabingna da. Otsak 6:1-6li Jerusalemlu khalei church memberbingwui ngachaili khavat khalei mibingli yangsangmi khavai kala phau khavai mi kapangkasang chi ithumna thei. Athumwui otngarut chiya rameinaobing kala khavat khalei mibingli yangsangmi khavaina (Otsak 6:1). Paokazatbingna kachikatha akhali athumwui mahut sada kashakazali otram ngatha khavai darka sai (Otsak 6:2). Greek tuili “otram khangatha” kaji tuiyar hi eina “deacon” kajiwui kakhalat ngaraichaya. Hina chitheiya kaja khareli churchli kapangkasanga mi shini chi deacon sakhavai kapangkasangna da. Chithda sada, deaconbingwui otpam hi Prohowui churchwui lungli darka salak kahai kala leikhangayiya otpam akhana.

2. *Athumwui otngarut*. Deaconbingli “church mayonkhamebing” da mahomana. “Mayonkhamebing” kaji hi ararbingli kahona (1 Peter 5:1, 2). Deaconbingli ‘munglu’ da hangkahai maleimana, kha ararbingliya mathalak eina mungkhavai kasokahai leiya (1 Timothy 5:17). Deaconbingwui otngarut hi ararbingwui eina ngateihang haiya. Deacon kajiwui kakhalat hi otram khangatha kaji sahaoda athumli churchwui otram ngathamebingna da theipaiya. Athumwui ot hi mayonmi khavai kala yangsangmi khavai maningla kha ngachonmi khavaina. Khare sada kapangkasanga deaconbing hi paokazatbingli ngachonmi khavai kapangkasang chithada ajawui deaconbingla manglawui kathana sada khalei churchwui ararbingli ngachonmira. Churchwui otmanga kala khokharum hapkakhano maleila zatva khavai kasa hi athumwui otngarutna. Ararbingna mataikhamei ot kaja athum mangna sakashap ot sakhui khavai deaconbingna athumli ngachonmida ngasamkhuingasaka. Jerusalemlu khalei churchwui deacon khani pao hakashokabing thada anila pao kapha hashoka (Stephen eina Philip). Kha deacon kachivana chi saphalungra kajiva maningmana. Churchwui ararbingli khangachon hi deaconbingwui

otna, chithada kasa eina ararbingwui othun ngavengngasaka. Ararbingwui thada church kachidali deacon akhamang maleipaimana. Deacon akhana deacon kateibingli mataimeiya kaji maleimana. Athum saikora churchwui otram ngathamebingna kala ararbingwui ngachonme bingna.

3. *Athumwui qualification.* Churchwui akuia Jishu thada Prohowui churchwui kathanabing saikora ngayokhavai saphalungra. Chithada sada deacon saki kajipa chi yaruina ngayokhavai mi akha sapai khavai awuili deacon akhana leikhangayi qualification leiphalungra. Jerusalemwui deaconbingli khiwui vang kapangsang khalajila athum chiya ning kathar, mangla katharana kapem kala thangkhomei mibingna (Otsak 6:3). Athum shitkasang kala pangshapna pemtinghaiya (Otsak 6:5, 8). Athumwui ningkatharwui mingzat hi churchwui lungli kala ayarlila khamatha mizatna. Mangla Katharana pemting haiya kaji chi kathara mirinwui lungli manglawui athei khamathei china theingasaka. Athumwui thangkhomei hi khamatha otsak sakashok kala athumwui othi ngasharлак eina bichar kasa china. Shitkasang kala pangshapna pemkahai mibing ngasada athum Vareli kachihan eina ngasoda shitkasang kahakka lei. Chiwuiwang athumli shitkasang china pangshap khaleiya kala mibingna shakhui kapaiya sangasaka. Deaconbingwui qualificationbingwui pongli 1 Timothy 3:8-13li kupmeida kapihaidalei. Chili hithada kapihaidalei, chia, deaconbing ning mazingphalungra, kaja ot saikorali sakda khuiphalungra. Akhamang kaji khamashung tui matuiki kaji mahutli ngateida khamatui kala tui khani khamatui mi mangasapaimana. “Mamarippaimana kala “kakharamli akachang masapaimana” chiwui kakhalata ararbingwui pongli hangkahai thada makhamarip kala makathar lanli khangamar kajina. “Shitkasangwui kathuka tui chi athumna singtitphalungra” hiwui kakhalata khamatha kala kathar mirin ngarumda ithumwui ning-wuklung tharngasakhamiya paokaphawui tamkachitheili ngarum khangasak kajina. Ararbingli kasa thada deaconbinglila rida chang yanglaga chukhara maleimana kaji theira. Athumla ararbingwui thada preiva akhamang kaji kala shimkhurli, naongarali mathalak eina nganaokatheiya ngasaphalungra. athumwui preiva ngarala mina khayashi kapaia, maphenphapha kapaia, ngarakzak kahaia kala ot saikorali shitsang kapaiva ngasaphalungra. Ararbing kala deaconbingwui preivangara sada hithada kasa hina kapha kala ningtongda shitkasanga Vareshi shanaobingwui khamataia (importance) kachitheina. Athum mili khamashatabing mangasapaimana, kha gahara ngarali katomkhami sada athumwui saran khikhala kaji machukkazak laga ningtonglak eina saki kajina. Hangkahai chithada, kachikatha mi akhana khalatta ngayokhavai akha sada mibingli chitheishapakha a churchwui deacon sakhavai matik chaya.

Ararbing makhalei churchli deacon kapangsangpairala da ngahanpai. Chiwui ngahankaka chiya, “makapangsangpai mana” jira. Khiwui vang khalajila, maram hibingwui vangna, chia: (1) Bibleli chiwui pongli kapikahai maleimana, church kachivali atam kachida ararbing rida kapangsa (Otsak 14:23), kala Jerusalemli Paokazatbingna ararbing sada otram ngathadakhalai atamli maningakha apam kateiliya deaconbingwui pongli hangkachida ararbingwui ponglila ngarumda hangchinga (Philippinao 1:1; 1 Timothy 3:1-13). (2) Deaconbing hi ararbingli ngachonmi khavai kapangkasangna, chithada sada ararbingli makapangsanranglaka deaconbingli ngachonme sada kapang kasang hi masakapai otna. (3) Kalikhada matheithangkham-eiwui vang ararbing makhalei churchli rida deaconbing kapangsaakha, athumna ararbingwui pam khuida athumna mungkhavai hotnakapai apong lei, kala chi rashokapai otna kala chi kathara tuina makhamaya otna. Chiwui vang eina ararbing kapangkahai churchbing mangli deaconbingna otram ngathaya. Kha ararbingva deacon maleirangsalala otram ngathapai kaja athum hi deaconbingwui azingli otram ngatha khavai kapang kahai maning mana (Otsak 14:23).

### **Khangahan**

1. Churchli deaconbingwui otpam maleikhala?
2. Otsak 6li deaconbingli kapangkasangwui pongli mazangkhalala?
3. \_\_\_\_\_ hi Deaconbingwui otngarut maningmana, kha \_\_\_\_\_ hi athumwui otngarutna.
4. Church akhali deacon akhamang khaleiwui pongli kapa masamphang khala?
5. Bibleli kazang deacon khaniwui aming hanglu.
6. Ararbing kala Khristawui thada deaconbingla thanmishapa kaja athum \_\_\_\_\_.
7. Deacon sakharebing khiot mati eina pemtinghai khala?
8. Deaconwui preiva akhana leikhangayi qualification mati hanglu.
9. Ararbing makhalei churchli deaconbing makapangsangpai khala?
10. Deaconbingwui pongli kapikahai Bible tuiza kathum hanglu.

### **KATAM – 27**

#### **KATHADA OTPAM KHUIKI KAJIBINGLI**

#### **MAKAPANG MARA KHALA**

#### **OUTLINE**

1. Member sakhare.
2. Kashangkhare member.

3. Ararwui mahut kashinna.
4. Yaruiwui otram khangatha.
5. Evanglistwui ningkachang.
6. Ngayokhavai maningla apong katei saikora.

## **NGASANKHANGARUM**

1. *Member sakhare.* Kathanabingli kathada kapangra khala kajiwui pongli tharlak eina theipai khavai rilak eina athumli kathada makapangmara khala kajiwui pongli yangkhangarum darka sai. Chibing chia, Varewui maningla kha mikumowui apongna, kala chi Varewui ninkachang kala kaphaningli ngachei khangasak kala makhaokhangasakna. Chikatha apong akha chia khikhala jila member sakhareyali kathana sakhavai kapangkasang kaji hina, marakkhali athumli church haophokhamiya/haophokhamiyabing da hoya. Ramli pao hashokmeli khuikhara mi china akhalatta khamataiya sakhuida khalatta arar akha sakhavai matik chaya da phaninga. Kha ithumna bibleli memberbingwui ngachaili kachikatha mi akhali church haophokhamiya da mingpho khami hikathathawui pongli kapa masamphangmana. Churchwui member sakhare china mi akhali khamataiya masangasak mana. Manglawui sokhami manga eina church haokaphokli sharuk kakhui samkaphang china mi akhali arar kala deacon sakhavai mashun mamimana.

2. *Kashangkhare member.* Memberbingwui ngachaili lan kala shimpamlui-pam chungmeida khalei mili churchwui arar sakhavai kapangkasang hikathatha hi shokzarlaka. Ali khayakashi miakha ana churchli lan chungmeida ngachonmira da phaningdaleilapai. Kala mibingna awui pangshapli ngacheeya. Kha Biblenava kashangli makhamaya apong eina machinmiya (1 Timothy 6:17). Arar akhana lupali maleishipaimana (1 Timothy 3:3). Lan kala lupawui vang mi akhana arar akhawui pam khuikhavai apong maphapaimana (1 Peter 5:2). Okathuili phasarinwui kathana saya da china mi akhali manglawui kathana masangsakmana kaja china atam kachida hapkakhano leingasaka. Okathuili sina, lupa kala lan kachungkha khalei china Varewui miktali kashanga mi sakahai maningmana (Luke 12:21). Mi kachungkhana okathuiwui oti kashanga ngasalapai kha manglaliva athum hi kakhanang, sikafa, kachama, khangapeowa, kala khamahonga bingna (Phongkhami 3:17). Okathuiwui kashang china mi akhali arar kala deacon sakhavai makashungasak mana.

3. *Ararwui mahut kashina.* Mi kachungkhana khalattali ararbingwui mahut kashinna bing da hoya. Chiwui kakhalata athum hi ararbing maningla kha athumwui “mahut kashinna” sakhareka bingna. Kachikatha mi akhana

akhalattali arar hoda atam kasangkahaira salapai, kala chiwuiwang awui ningli ararbingli kakapang chitharan alila arar akha sada kapangsangra da phaninglapai. Kha “ararbingwui mahut kashinna bingna” Varewui apong chi mashongachei ngasakda makhaongasaka. Varewui ningkachangva qualification athishurda kakashunga mibingli kathana sakhavai kakapang china, kha ararbingwui mahut kashinabingna arar akha thada makashungrarla kha arar akhawui sokhami kala khaya samphang khavai hotnai. Chithada kasa hi mi akhana ningkhamiwui kahang manganala Vareshi sakharek eina ngaraichaya. Kachikatha Vareshi makhaning mi akhana khalattali vareshiwui mahut kashinana da hangsi kaja ali churchna khi sarakhala? Sakharekna da ali makhuisangmi mara. Chi takam eina ararbingwui mahut kashinnabingli-la makhuisangmi mara. Ararbingwui mahut kashinna bingli kapangkasang hi Varewui tuili ngarum kasangna (Phongkhami 22:18). Chi Khristawui pa-okapha mashongachei khangasakna (Galatiano 1:7,8). Kala chi Varewui ningkachang athishurda ararbing kala deaconbing kakapangwui apong khuishokhailaga makhamshunga akha khuikazangna.

4. *Yaruiwui otram khangathabing*. Marakkhali yaruirin/sarkarrinwui zatkhana churchwui kathana kakapangli shichina. Sarkarinwui zatkhana eina kathara tui athishurda zatkhana ngarumngasak khavai memberbingli suiya. Athumna vote kakhom thada michang khomzatta kala mibingwui khangachon phazatta. Church kaikhaliva athumwui kathanabingwui vang vote sangmida kapangsanga. Pheisa eina kasui kala sakhamachit kathatha hila shichinna. Kha church hiya hikathatha otsak sakhavai apam maning mana. Sarkarwui kathanabingli kakapangwui ara kala otsak eina manglawui kathanabingli kakapangwui ara kala otsak hi ngateingaroka. Arar akha sakhavai matik kacha mi china a khalatta chukhara makhalei mina da yarui chitheikhavai darka masamana. Kala yaruiwui mangali nganinglaga khalattawui sakashapwui pongli khamtuiwui darkala maleimana. A khalattana mahangsalala churchna a kathada ringdaleikhala kaji theihaora kala matik chaka machakhala kajila theira. Chili langmeida, ana mi kateili mangahanmana (compete masamana). Matik kacha mi kachivali kapangsanga, kachikatha akhali kapangsang kahaiwui vang katei akhali makapangsangthura kaji maleimana kaja hi khangahanwui ot maningmana. Ararbingli michang khomngaroklaga makapangmana (not by vote), kha mayakhangarok akhawui lungli kakapangna, chiya kathara tuili kapikahai athishurda matik kacha mi akha khangasa china. Yaruiwui minganing kakapang thada churchwui ararbingli kala deaconbingli kakapang hi Varewui ningkachang maningmana.

5. *Evangelistwui ningkachang*. Churchli otsakrumda khalei Evangelist-

li kasui rapai kaja awui ningkachang mibingli ararbing sada kapang khavai Kachikatha mi akha hi evangelistpawui vang kachungkhashida kapha sami kahai mi ngasasapai, kala chithada sada evangelistpanala ali kapha sami kahai saikora phaninglaga mipa chili kathana sada kapangsangkhavai ngachonmi phalungra da machukpai. Kala evangelistna kathana sakhavai awui ningkachang athishurda otsakrum kapai mili ningchangelapai. Ana noda awui kahang nganaki kaji mili arar sada kapangsang khavai mayalapai. Hangkahai apong saikora hieina kala apong katei kachungkha einala evangelistli kasui rapai. Ana chithada saakha Varena michang masapai mara da tamchithei kahai tamkachithei chiwui eina tathui kahaina (Otsak 10:34). A mimai khayanga mi ngasahaora. Michang kasawui vang a nguihaora. Mi akhali evangelistna ningchanghaowa da a churchwui kathana sakhavai matik chakahai maningmana.

6. *Ngayokhavai maningla apong katei saikora.* Churchwui arar kakapangli khangui kala ningmakathar apong saikora katam hili (lesson hili) mahangku-prar mara. Kha hithada hangpai, chia, Varena arar kakapangli ngayokhavai sachithei kahai Awui ningkachang athishurda makasa saikora chi khanguina. Ararbing kala deaconbingli mikahai qualificationbingwui athishurda maningla kathana kakapang saikora kathara tui athishurda khanguina. Mi akhana Vareshi akha kasawui vang awui acham-aram khamatha kala vareshirinli awui sakashap khalei chili ngaheolaga kakapang maningla khangatei apong eina kakapang chi khanguili pheisin salaga kathana kakapangna. Varena ngayokhavai sakahai chiwui manga eina kathana shokngasaka: mikumowui thangmetna chi ngacheingasak khavai masarano.

### **Khangahan**

1. Kha kala ram akhali church haophokhamiya mi chiwui khamataiyawui pongli Bibleli kapi kahai malei khala?
2. “Ararbingwui mahut kashinna” bingwui pongli Bibleli kapi kahai malei khala?
3. \_\_\_\_\_ miktali okathuiwui lanna kachikatha mi akhali mashangasakrarma.
4. Arar makhaning mi akhana arar akhawui mahut kashin thada mavareshi akhana Vareshi akhawui mahut shinpairala?
5. Yaruili otram khangatha kathana kakapangli kazanga otsak mati hanglu.
6. Churchwui kathana kakapangli khangahanwui (Competitionwui) otsak mazangkhalala?



7. Ithumwui Vare hi mimai khayanga Vare maningmana kajiwui pongli khi Bible tuizali kapihai khala?

8. Varewui ningkachang athishurda kathana kakapang chiya

---

9. Varena hithada saakha phara da samikahai chi ngacheikhanga-sakli makhamaya Kathara tuiza khani hanglu.

10. Churchwui kathana kapang khavai memberbingna vote masangkhalala?

## **KATAM – 28**

### **MANGLA KATHARANA CHURCHWUI ARAR KATHADA SEMKBALA OUTLINE**

1. Mathalak eina tamkachithei.
2. Sangairareo kahaiwui ningai khalei.
3. Chukharar maleimana kaji kathei.
4. Mibingli kakapang.
5. Ordain kasa/kapangkasang.
6. Churchna recognize sakhami.

### **NGASANKHANGARUM**

1. *Mathada tamkachithei*. Vareshirin hiya tamkachithei wui dharmana (John 6:45). Shitkasangabingli marahikranglagala kala rahik kahaiwui thilila tamchitheiya (Matthew 28:19,20). Mi akhali arar sakhavai matik kashungkhangasak kala ali arar sada kapangkasangli atam kasangkha khuida mathalak eina tamkachithei darka sai. Mangla katharana mayarnaobingli mayonme sangasaka (Otsak 20:28). Mangla katharawui raikhai kaja Biblewui manga eina Mangla katharana ararbing shokngasak/semma (Ephesianao 6:17). Churchli arar shokkhangasaka kathara tuiwui tamkachithei hi Mangla katharawui kasatkhami tuina. Kha hi Bible tamkachithei chitharan atam mangli shokkhangasakna. Chiwui vang eina arar shokkhangasaka Varewui tamkachithei hi local church kachivali katam darka saya. Church organizationwui pongli Biblena tamchithehi kahai chi kuplak eina bhapta phalungra. Member kachiva kathanabingwui pam kala otngarut khikhala kaji theiphalungra. Church mathalak eina organize sakhuikhavai memberbingli class khuikhami, avavali tamkachithei kala hakashok eina ngasoda tamkachithei hikathatha hi atam kachida saphalungra. Mathalak eina tamkachithei maleiakha mathalak eina organize masararmana. Kathara tui athishurda tamkhami hi

kathara tui athishurda organize sakhavaiwui pheikar kharena. Mathalak eina theishingkakhui hi mathalak eina organize sakhui khavaiwui shimpfungana kaja theishingkakhui maleila mathalak eina organize masararmana. Mangla katharana mi akhali arar sakhavai kasem hi kathara tui mathalak eina tamchitheida haophoka.

2. *Sangairareo kahai*. Pheikar kakhaniya chia khikhalajila, tamdakha-lei bingna tamkhui kahai athishurda otsak eina sakashok china. Varewui kaphaning chi sangairareo sakhavai kala sashap khavai athumwui lungli ot sada khaleiya a chi Varena (Philippinao 2:13). Memberbingli Varewui kaphaning khikhala kaji tamkachithei tharan athumwui sangairareo kahai chi otsak eina sashoka. Ararbingwui qualification bingwui list haokaphokli hi khareyali zanga chia, “Kachikatha mina churchwui kathana sangaiakha, ana kapha otli ningchanga” (1 Timothy 3:1). Mi akhana kakashung Vareshi akhawui acham-aram kala asak-avat tamkakhui tharan ana chithada ringkhavai hotnai. Ning tongda shitkasanga Vareshi akha sakhavai awui ningli sangairareo kahai rashungasaka, chithada anala mi kateili Khristali shurkhavai ngachonmishapa. Hithada Mangla katharana Vareshi akhawui acham-aram khamthawui athei matheingasaka (Galatiano 5:22,23). Kha mi akhawui wuklungli churchwui arar sakhangaiwui ning sangkhami chi Mangla Kathara mangna maningmana. Kha chipeenala chikatha ning sangmiya kha kharin khangatei akhawui vang sangmiya. Khangam-kharei, langso ning, kala pheisali phaningda ararbingwui pam khuingai khavai mikumowui wuklungli makapha china ning sangmiya. Chithada sada arar sakhangai ning-wuklung saikora chi phaser majimana. Kha kachikatha mi kaikhana Khristawui acham-aram khamatha thada ningkachangwui vang kala Mangla Katharawui athei ningkachangwui vang ararbingwui pam kaphana chiakha chikatha mibingli Mangla katharana ararbing sakhavai athumli apong thanmiya. Wuklungli kharin mashungda sangairareo kahai khalei hi arar akha sakhavai vang khamataiya pheikar akhana.

3. *Chukharar maleimana kaji kathei*. Churchwui kathanabingwuili chukhara maleimana kaji mi saikorana theiphalungra (1 Timothy 3:10). Hi Mangla Katharana churchwui arar kasemwui pheikar kakathumana. Mi akhawui theishingkakhui kala awui ningli sangairareo kahai khalei china ali kakashungga Vareshi sangasaka. Chithada awui kakashung kala sakashap chi member kateibingnala theimaman haowa. Mi akhana khalattali kala tamkachitheili ning khangashar tharan, awui kapha kasali manga khava chi mi saikorana theira (1 Timothy 4:15,16). Mangali hangkahai thada, hiwui otmanga kakhui hi atam zanglaka. Manglarinli rakasang hi atam zanglaka. Zingkum atam

kasangkha katam, seiha kasa, kala hakkasang hi darka sai. Vareshi kathana kala oja (tamkachitheiya) akha sakida matik kacha mi sakhavai experience kachungkha darka sai. Zingcum atambing hiwui lungli mi akhana awuili mi saikorana theikapai Vareshi akhawui khamatha asak-avat reisangasakma- manda khalatta chukhara maleimana kaji mibingli theingasaka. Chithada sada, a Vareshi akha kasawui ngayokhavai kala kathana akha sada member kateibingna awui magun theira. Chithada arar akhana leikhangayiya magun- bing awuili leimamanra kala mibingnala theimamanra. Kachikatha mi akha- na arar sakida matik chaya kala chukhara maleimana kaji hithada chitheiya.

4. *Mibingli kakapang (harkashok)*. Jerusalemli Paokazatbingna khare sada deaconbingli makapangrang lakha yarui ashangvali athumwui ngachaiwui eina mi kapangkhuilu da hanga (Otsak 6:3). Mangla Katharana arar kase- mli hina khamatiyali kakhui pheikarna. Arar sada kapangsang kapaiya ma- gun khalei mibingli yarui ashangva ngachaiwui eina harshokphalungra. Hi theikazaklu kaja hi church ashangvana khuiki kaji pheikarna. Church ka- tongkha, mathalak eina tamchithei kahaiwui thili athumwui ngachaiwui eina kakashunga mibing kaja kapikahai athishurda kathana sakhavai matik kacha mibingli phashoki kajina. Hithada memberbingna mi katei akhali machihan- la kha athum khalatta athumwui vang kathanabing kapangkhuipai (Otsak 6:5). Athumwui lungli athumna chukhara maleimana da theikahai mibing kala athumna shurkhangai mibingli kapangsanga. Hi matailak kahai pheikar akhana. Hithada kathana kakapangli pheikar kakhui saikora kathara tuiwui manga eina Mangla Katharana memberbingwui wuklungli chijamiya. Va- rewui manglana kasatkhami tui athishurda athumna kapangkhuia. Athum Varewui tuili samkaphang Varewui thangmet chili shurda khaleina (Colossi- anao 1:9). Varena athumli thangmet mikhavai athumna seiha sai (James 1:5). Athumwui ningkachang eina mavaila kha Varewui kaphaning eina vaikhavai seiha sai (Otsak 1:24). Matakak kahai, mina masakharar otsak eina khipali kapangra khala kaji machitheimimana kha Varewui tui manga eina Mang- la Katharana thanmiya. Kala yarui ashangva kazipwui mangali kapangkhui kahai athumwui aming pashokda kapisang haowa. Chithada kapangkhui ka- hai mibing saikoralis church katongana athumwui mik eina thei. Mi kapang- kakhui kaji chi hithada kasa chili kahangna.

5. *Ordain kasa*. Biblena hanga kaja ararbingli kapangsanga da (Titus 1:5; Otsak 14:23). Ordain kaji tui hiwui kakhalat hi denominational church- bingna mashongacheingasakta ngingasakhaowa. Athumwui vanga chiwui kakhalat hi clergy wui lungli pam khuikhavai mashun kala khamaya kha- mi (license) kathana. Kha Bibleli hikathathawui pongli kapikahai maleima-

na. Kadhara Tuingashitwui churchwui lungli ordain kasa kaji hiya yarui ashangvana athumwui ngachaiwui eina kathana sakhavai kapangshokhaida khalei kathanabingli otngarut akhawui vang kapangkasang kajina. Ararbingli makapangrang lakha Evangelist hi yarui ashangvawui mathun sada khama-tuiya mi akha sada kathana kapangkasang hi awui otngarutna. Kha chi awui ningkhan eina kala awui ningkachang athishurda makapangmana. Yarui ashangvana kapangkhuhi kahai athumli evangelistna phongshokkhamina. Yarui ashangvana athumwui ngachaiwui eina matik kacha mibing phashok kahaiwui thili athumli chang yangda chukhara leiya kala maleimana kaji theikhavai atam miya. Member kachivana minganin avavali Bibleli kapikahai ararbingwui qualification athishurda mathalak eina machuklaga mayakhami chi maningla kathana kathada kapangrakhala kaji apong khangatei akha maleiluimana. Minganin bingli yaruina mayami khavai khamachuk hi atam zanglapai kaja athumwui pongli kuplak eina yangki jihaoda. Kha naolak eina athumli mayamida kapangkhuhi kahaiwui thili evangelistna churchwui mangali phongser eina athumli kathana sakhavai kapangsanghaira kaji phongmira. Hithada kasa chili kathana ordain kasa hoi.

6. *Churchna recognize sakhami.* Ashangvana ararbingli mayada kapang-sang kahaiwui thili churchna kathana kadhar bingli recognize samiya kala khuisangmiya. Khareya deaconbingli paokazatbingwui mangali khuishoka kala athumna deaconbingwui vang pang khangkada seiha samiya. Mangla katharana matakkhak kahai ot kasawui atam sahaoda paokazatbingna pang khanglaga seiha sakhami manga eina athumwui tungli Mangla Katharawui lemnet tashungmiya (Otsak 8:18). Kha ajawui thotli paokazatbing kala matakkhak kahai ot kasa hkt. maleithuda pang khanglaga seiha sakhami china mangla katharawui lemnet masamphangasakrarmana. Kha Antiochli khalei churchna athumwui mayakhami kachithei sada kala katomichingra kajiwui tuingashit sada Barnabas eina Saulwui vang pang khangkada seiha samiya (Otsak 13:1-3). Chi takam eina aja ithumla kachikatha mi akhawui vang ngaraikacha maram chiwui vang pang khangkada seiha samipai. Kadhar eina kapangsangkahai kathanabingli hithada recognize sakhami china churchna athumli mayamiya kala hamsanga kaji kachitheina. Yaruina theikapai apong eina churchna kadhar eina kapangsangkahai ararbingli khuisangmida athumwui vang seiha samira, kala shitkasang eina hamkasanga athumli ngashitmira. Athumli recognize sakhamiwui ranyei hi ichacham eina singkara kha kakhalat leilak eina saki kajina. Lumshilao kala phanit khamayon thada nguida masaki kajina. Yarui zatkhang kala panglan minganao khavaiwui maramla maleimana. Kha chi church yarui ashangvana kathanabing-

li recognize sakhamiwui atam aman saklak kahai atam ngasaki kajina.

### **Khangahan**

1. Churchli Mangla katharana \_\_\_\_\_ manga eina tamchitheiya.
2. Vareshi akhali kathana sakhangaiwui ning sangkhami mi khaniwui aming hanglu. \_\_\_\_\_.
3. Churchna mi akhawui mapungkapha kala kakashung chang yangmaman da leilakha akhalatanala \_\_\_\_\_ maleimana kachi theingasak phalungra.
4. Kathana kakapangli khamatiya pheikar chiya khikhala jila church ashangva ngachaiwui eina kapi kahai athisurda mitik kacha mi \_\_\_\_\_ china.
5. Athumli khipana phaishokhala?
6. Kapangkakhui kajiwui pongli tuiyar kathum hanglu.
7. Evangelistwui manga eina khipalongna ararbingli kapangsang khala?
8. Ordain masaranglakha churchna minganinbingli \_\_\_\_\_ kala \_\_\_\_\_.
9. Aja mi akhali mangla katharawui lemmet samphangasak khavai awui tungli pang khanglaga seiha sakhami darka masakhala?
10. Phongser eina Church ashangvali chithei khavai apong kha leiya, chia, \_\_\_\_\_ kala \_\_\_\_\_.

### **KATAM – 29**

### **VARENA ARARBINGLI KACHISHIN OTNGARUTBING OUTLINE**

1. Yaonaobingwui vang ngayokhavai khangasa.
2. Yaobingli phauilu.
3. Yaobingli homlu.
4. Yangkhame.
5. Mathada khamung (yangkhame).
6. Mayonkhame

### **NGASANKHANGARUM**

Ararbingwui qualificationbingwui pongli tamngarum haoda ara ithum athumwui otngarutbingwui pongli tamngarumsa. Hiwui pongli Varena athumli otngarut shinkhana chili theira. Ararbingwui otngarut khikhala kaji

kathei manga eina ararbing kachikatha mi sangayikhala kaji mathameida theipaira.

1. *Yaonaobingwui vang ngayokhavai khangasa.* Ararbing mibingna ngayokhavai ngasaki kajina kajiwui pongli mangawui lessonbingli chitheihaisalala, latluishitda hili kupmeida meikhailuishita khaleina kaja hi khamashunga kala matailak kahai tuipong akha ngasaya. Ararbingwui otngarutbingwui ngachaili khalatta mibingwui vang ngayokhavai kasali langda mataikhamei maleimana. Ngayokhavai kasa hina shimpfunga sada athumwui qualification saikora hiwui tungli saka kahaina. Chiwui vang eina 1 Peter 5:3li Varena athumli hithada otngarut kachishinna, chia, “nathumli mikahai athumwui tungli akhava masaalu; kha yaobingna shakhui khavai acham sachitheilu”. Kathana akhana kashurabingwui tungli akhava kasa hi Varewui ningkachang maningmana. Awungabingna athumwui ningkachang athishurda sakhavai athumwui azingli khaleibingli tandi salapai kha chithada khamung china vareshibingwui vang Varewui kharin maungshungasakrar mana. Kathanabingna kathada thanra khala kala kashurabingna kathada shurakhala kajiwui pongli Varena sakahaili langda phakhamei kala kashungkhamei apong katei maleimana. Kaja Varena sakahai chi tandi maningla kha leikashena shimpfung salaka saka kahaina. Varena sakahai kathana chia kachikathakhalajila kashurabingna shakhui kapaiya kathanaobing kasa china. Chithada, ararbing rilak eina khalattawui tungli ngasharphalungra kala athumwui pangli horsangmi kahai yaonaobingwui tunglila ngasharphalungra (Otsak 20:28). Ararbing memberbingna shakhuikapaiya acham sachitheiphalungra chithada kasa eina kashurabingna athumli shurngaira. Ararbing churchwui tungli akhava masapaimana kha yaonaobingwui vang ngayokhavai ngasaki kajina.

2. *Yaobingli phauilu.* Kakhaniya otngarut chiya khikhalajila “nathumwui pangli horsangmi kahai yaobingli phauilu” kaji hina (1 Peter 5:2). Tamkachithehi hi ararbingwui hakmeithui kaji otngarut akhana. Varewui tui hi Vareshibingwui vang kashakkazana. China athumli manglali rarsangngasaka (Otsak 20:32). Vareshi sadhadharbing haksangkhavai kala rarsang khavai sein darka sai (1 Peter 2:2). Kha kateibingna khamashung-khangarong tuiwui zat khamara darka sai (Hebrewnao 5:12-14). Ararbing vareshi sadhadharbing kala rarkahaibingwui vang athumwui darka kasa athishurda manglawui kashakkaza phauithehi phalungra. Athum khalatta kathara tui tamchithehi phalungra kaja athum mibingli tamchithehi kashapa sakikajina (1 Timothy 3:2). Kala oja kateibingwui tamkachitheilila ngasharda yangphalungra katomkhami eina ngasoda. Churchli manglawui kashakaza phauikhamiwui otngarut hi

phasarinwui shimkhurli phasawui kashakaza phau khamili langda sakkham-ei otngarutna. Ararbingna otngarut mathada saakha church haksangra mangla eina, kha ararbingna mathada masaakha church ngazansangmamanda thihaora. Khokharum hila vareshi akhawui manglawui vanga kashakkazana. Ararbingna khokharum mathada masingka kharar tharan memberbing manglali kaza haora kala thihaora (1 Corinthnao 11:30). Chiwui vang eina Varena mathalak eina ngaran kahai manglawui kashakaza hi manglabingli phau khavai ararbingli otngarut hi kachishinna.

3. *Yaobingli homlu*. Yaobingli phauikhami mang maningla kha homkhavai kala mayonmi khavai Varena ararbingli otngarut chishinna. Athumna yaonaobing saikorawui tungli ngasharlak eina mayonmiki kajina (Otsak 20:28). Greek tui eina “Yaobingli phauilu” kaji tui hiwui kakhalata yaobingwui tungli yaokahoma akha thada kasa chili kahangna. yao kahom kajiwui kakhalata yaobingli malung khangahui eina ngasharda mayonkhami kajina. Biblewui atamli yaokahomabing yaobingli okthuiruma, athumwui eina yaobingli matathuihaingasakmana. Yaonao avavawui khangazan athumna theiya kala athumli ngaraichada leishimi. Ana yaobingli ngayashong mayonmiya kala ngashunshong shongfa khamathali thanmiya. Yaobingwui ngachaili akha shimanhaiakha ana samphang khavai phaya kala akha kazahaiakha kala khama sazahaiakha raimikhavai akhamali thao neomiya. Yaokahomana atam kachida yaonaobingwui mangali zatta thanmiya; ana khunukshong eina mahommana. Atam kachida a yaonaobingwui mangali zatta athumli hoda apong chitheimimamana. Yaobingna yaokahomawui akhon shai kala ali shurngailakga kaja athumna thei yaokahomana athumli leishi kala atam kachida athumwui vang phakhavai samiya kaje. Hi takam eina ararbingna Varewui yaonaobingli mayonmiki kajina. Athum akha eina akha theingarok phalungra kala leishingarok phalungra. Athumna yaonaobingli ngakmi-phalungra, thanmiphallungra kala phau phalungra. Mathuikahai yaonaoli phakhaira kala khangazanali mathalak eina yangmira. Khanuk zatki kaji mahutli ararbing atam kachida churchwui mangali rizatta apong chitheimira. Ararbingna sada khalei saikora yarui ashangvawui vang phakhavai sada khaleina kaji theida athumna mathanthathup shurngaiki kaji apong eina thanmira. Laa kapikasang 23 kapa tharan Varena Awui yaobingli kathada homkhala kaji ithumna thei kala Ana ararbinglila Awui yaonaobingli kayakha ngasharda kala leukashe eina yangsang ngasakngai khala kajila theiya. Chithada, yaonaobingli mayonmi khavai kala hommi khavai Varena ararbingwui pangli otngarut hi horsangmiya.

4. *Yangsangkhami*. 1st Peter 5:2li Mangla katharana ararbingli hithada

hanga, “Nathumwui pangli Varena horsangmi kahai yaobingli mathalak eina homlu, Varewui ningkachang athishurda yangmilu, tandi thada masala mathanthathup salu, amanwui vang maningla sangairareo ngathamilu”. Ning wuklung kathar eina kala kharin mashungda yaobingli yangsangmi khavai ararbingli Varena otngarut chishin kahai ithumna hili thei. Bishop kala Yangsangme kaji mingpho hina chitheiya kaja churchli yangsangkhami hi ararbingwui otngarut akhana kaji. Athumna churchwui vang phakhavai apong phaya. Churchwui otmanga kala kasakhava saikora athumna yangsangmiya. Yangsangkhami kajiwui kakhalata kajuipamwui eina yangtada saikora kathei kajina, chithada, manglarinli churchwui khavat saikora athumna thei kala yangsangmiya. Mangla Katharana ararbingli churchwui tungli yangsangme sangasaka (Otsak 20:28). Yangsangkhami hi tandi thada masala kha sangairareo eina sakikajina. Chia ararbingli athumna maningkachang chili tandi kasa maningla kha athumna mayada yasangme sakikajina. Kala athumwui thankhami chi kashurabingli tandi thada masapaimana kha kashurabingna mathanthathup eina shurkapai apong eina thanki kajina. Ararbingwui ningrin chi lupa, lan kala khangamkharewui vang maningla kha Varewui kahang khangana kala otram khangthali ngarankharik kahai ning-wuklung khalei, chikatha ngasakikajina. Yarui ashangva saikorali yasangme sada khaleibing athumwui otngarut ritlakga. Kha otngarut saikorawui ngachaili church yasangme bingwui otngarut ritmeithuiya. Churchwui kashok-kazang, kapha-kashi kala ot saikora Yaokahoma Akhavana ararbingwui tungli bichar sara. Athumwui otngarut saikora ngasharлак eina unghungasak phalungra kala ning-wuklung kathar kala kharin mashungda saphalungra. Churchli yasangkhamiwui otngarut kaji chi hili kahona.

5. *Mathada khamung (ngakuikhami/yangkham)*. Ashangvali mathada khamung/ngakuikhami hila ararbingwui otngarutna (1Timothy 5:17). Mungda khalei ararbingli tamkachithei eina pao hakashokli kachot phungda khaleibing dala theiya. Biblena ararbingwui qualification saikorawui pongli kahang tharan hithada hangkahai leiya, chiya, “Mi akhana awui shimkhurli manganaokhuitheiakha, Varewui churchli ana kathada ngakuitheirakhala?” (1 Timothy 3:5). Chithada sada, avava akhana awui shimkhurli yangsangkhame chithada ararbingna tamkachitheili kala yangsangkhamily churchwui vang kachotkachang phungkhami chi khamung kajiwui kakhalatna da theipai. Churchwui tungli khalatta akhava kasa chili khamung kaho maningmana (1Peter 5:3). Kha churchwui vang phakhavai kasa kala member bingwui manglarinwui khavat yangsangmida ngakuikhami chili khamung kahona. Mi kaikha hiwui pongli bhaptangui kahai lei. Athumna phananga kaja kha-



munga hiya azingli otram ngathada khaleibingli rao thada kakhuiya awunga kathana da. Churchwui ararbingna chithada saakha chi khamashung maningmana. Athumna church mungra da Biblena hanga, chiwui kakhalata churchwui otngarut saikorali mapairekhaila kha ngasharlak eina yangsangra kajina. Athumwui azingli khalei ot saikorali khamataiya mida ningsanglak eina yangmiphalongra. Athumwui otangarutbing chia saklakga kala ritlakga. Ararbingli horsangmi kahai otngarut saikora unghungasak kashapa bingli mataimeida khayashiranu kaja athumwui otngarut ritlakga (1 Timothy 5:17). Hithada Prohowui churchli mathada mungkhavai ararbingli otngarut hi horsangkhamina.

6. *Manglabingli Mayonkhame.* Ararbingwui kahang nganada athumli hamsangphalongra. Athumwui otsak Vareli chitheiki jihaoda khangasam maleila athumna nathumwui manglali yangmichingra. Nathumna kahang nganaakha athumna athumwui ot chi mathanthathup sara, chi maningakha athumna kakhanang eina sara, chi nathumwui vang khikha kankhana maleimana (Hebrew 13:17). Hili sakmataimeithui kaji chia khikhalajila athumna mayonmira kala athumna manglabingwui vang samikahai ot saikora Vareli chitheiki kaji china. Israelwui phakho khamayonabingna mathada mamayonla kala yangkashebing khara tharan mibingli ningashar khavai mahangmathinmiakha mibingwui ashee athumwui tungli tara, church kathanabingla Israelwui phakho khamayonabing kathana (Ezekiel 3:17-21). Khanaowa zimiksholi kathanabingna athumwui pangli horsangmi kahai manglabingwui vang sakahai ot saikora chitheiki kajili mataimeida kasak ot khi leikhala? Ararbingwui ot hiya mayonkhami mang maningla kha naodala athumna sakahai chi chitheiki da khaleina. Chiwui vang atam kachida mikringda khangashar darka sai (1 Peter 5:8). Chara talala tada mangasamla atam kachi- da member kachivali mayonkhami hi katharatuiwui kakasona (Otsak 20:31). Chithada, ararbingli mangla kachivali mayonmi khavai kala athumwui ot saikora Vareli chitheikhavai Varena athumli otngarut hi horsangmiya.

### **Khangahan**

1. Ararbingna ngayo khavai khangasawui pongli kathara tuiza khani hanglu.
2. Ararbingna yaobingli \_\_\_\_\_ eina phauiya.
3. Memberbingna darka kasa kashakaza ayur khani hanglu.
4. Yaonaobingli phauikhami kala tamkachithei hi yao kahom eina mangaraicha khala?
5. Sarkar kasinga akhavabingna ngalei khamung thada ararbingna

churchli mamungpairakhala?

6. Yangsangkhami kaji tui hi tuiyar khaniwui eina sakakhui tuina, tuiyar khani chi khikhala?

7. Arar akhana awui \_\_\_\_\_ li khamung thada ana churchli mungra.

8. Mayonkhame kajiwui pongli kathara tuiza mati hanglu.

9. Yaokahomana yaobingli kahom tharan a kali zatra khala? Manga maningakha khanuk?

10. Yangsangkhami kaji tui tuiyar katei akha hanglu.

### **KATAM – 30**

## **CHURCH ORGANIZATIONWUI LUNGLI KALAKASHI RASHOKRA KAJI THEIKAPAI MACHUTBING**

### **OUTLINE**

1. Church saikorawui tungli khalei organization.
2. Church saikorawui lungli khalei organization.
3. Ayarwui mina Churchwui lungli kathana kasa .
4. Ningkhan eina kapanna churchbingwui lungli khangachei khuikharra.

### **NGASANKHANGARUM**

1. *Church saikorawui tungli khalei organization.* Chikatha machutbingli kalakashi rashokra da chitheikhami, kala hangmathinkhamiwui machutbingna da theiya, kala Varewui kaphaning kala Awui ningkachang ngacheingasak mamandalei kaji hi machutbing china chitheimiya. Machutbing saikorawui ngachaili akha chia khikhalajila church saikorawui tungli khalei organization hina. Hikatha organization hi denominational churches kachungkhawui lung- li leidakhalei ithumna thei. Local churchli hakkhamei church katongkha khangarumwui organization leiya. Church katongkhawui tungli kapangkhai pangshap khaleiya akhavabing lei. Hakkhamei organization china local church saikorawui vang athumna khi sara kala khi masamara kaji decision khuimiya. Organization china athumwui vang evangelist kapangsangmiya kala athumwui kasakhava saikora organization china chijakhami athishurda sangasaka. Biblena hikatha organizationli mashun kala pangshap mikahai maleimana kaji Khristawui church saikorana thei. Kha hikatha, organizationwui lungli khangachei khara hi marakkhali Varewui mibingwui lungli- la rashoka. Chancham sada, member kachungkhana Bible training college hi mission organization akha thada phaniga kala mi kachara achinabingli (white brethren) athumwui vang evangelist kapangsang ngasakta tolopla

athumli mingasakngai. Churchwui lungli khonkazar kala kasakka ot leikahai tharan Americawui achingarabingli ngasangaruma. Kha Bible school bing churchwui tungli pangshap maleimana. Kachara Varewui pao hakashok-bingna (white missionary) church saikorawui vang decision khuimikhavai pangshap maleimana kala mashun maleimana. Local church kachivali ningkhan mapungphalak eina leiphalongra. Church saikorawui tungli organization katei akha malei paimana kala ayarwui mina church akhawui lungli pangshap masingpai mana. Kachikatha organization akhana churchbingwui tungli pangshap singdaleiakha chi kalashikapai kala nguikai kapaiwui machutna.

2. *Church saikorawui lungli khalei organization.* Khristawui church memberbing kachungkacha denominational churchbingwui eina rakazang sahadada, rida athumna sakasa chithada athum khalatta organize sakhavai hotnai. Chithada sakhavai kala church saikora ngarumngasak khavai “Gospel meeting” da kazip rungkhavai sai. Yarui kazip chili ngarum khavai local church kachivawui eina mi chihovaya. Athumwui ngachaiwui eina Yaruiwo, Kapime, kala Lan singme da kathana kapangsanga. Church kachivawui eina pheisa ngashaikhuida lan kaziphaiya. “Eastern Ngwa Gospel Meeting” da athum khalatta phoksangda denominational churchbingwui thada association sashok kapai apong lei. Hikatha organizationbing eina denomination bingwui volunteer-type districts wui ngateikhangarok maleimana. Denominational churchbingwui thada Gospel meeting china khamatha ot kachungkha salapai kha chithahaowa da kathara tui athishurda mashunghaowa kaji maningmana. Bibleli organized gospel meeting maleimana. Hikathatha hi denomination bingwui eina haokaphokna. Memberbing denomination bingwui zatkhanawui eina khara ngasapai kha denominationbing memberbingwui eina khara maningmana. Haokaphokliva khangachei kala ngateikhangarok hi teolaksalapai kha china athumli nguida katawali thanthuihaowa. Gospel meeting saki kaji mahutli ichichawui local churchli lectureship wui rangyei singkapai. Chithada sada, khareli meeting kasawui khamatha saikora kazipkhuilaga, moreiwui otsak saikora chihohaoki kajina. Achinangarabing hithada vareshiwui ngarumsak kala tamkachithei leichingra kala arui eina tangda gospel meeting zatnada khalei local church kachivali ichichawui congregationli meetingwui mahutli lectureship rungkhavai katomira. Kha athumwui kathanabing, lan singme bing kala association saikoralala hortaphalongra. Local churchbingna khi sara kala khi masamarakhala kajiwui pongli ngazek khavai business meeting kasa hikathatha hi athumna masaluimara. Church kachivali shangasai kala khashina kakhui hikathatha masaluimara. Kapha

khamashung saikora leichingra kha zakashi kala makapha saikora chihohaora. Ot saikora chang tamyanglu, kapha chi singtitlu, makapha katonga chi chihochaohaolu da Biblena ithumli kasoi (1 Thessalonicanao 5:21,22). Gospel meeting bing chang tamkhayang tharan, chiwui makapha ithumna theira kala chi ithumna mamayamara, kala makapha saikorawui eina ithum tathuiphalungra. Kha kalikhada chili kapha zangakha chi ithumna congregational lectureship kharungli shichinpai kala chiwui sharuk kakhui mi kachivana kapha chi singtitra. Churchbingwui ngachaili kachikatha organization kaja organized gospel meeting bing hikathatha khalei hi Varewui tuiwui eina ngapakthui haokikajiwui kalashat kala moreiwui machutna.

3. *Ayarwui mina Church akhawui lungli kathana kasa.* Ayarwui mina Church akhawui lungli kathana kasa. Churchwui lungli ayarwui eina kathana kapangkasang hila khamashunga church organizationwui vang kalashikapai machut akhana. Hikatha kathanabing hi atungli hangkahai thada church bingwui tungli organizationbing khalei chikathana. Maningakha, athum hiya khangatei local churchwui kathanabing kala memberbing ngasapai. Kalikhada, kateowa kala khangazana Local church akhawui khongnaili khangatei hakhamei local church akha leisaakha, hakhameiya china teokhameipawui tungli mungkhavai hotnai. Rarkhamei Local churchna phaninglapai kaja chiwui kathanaobing hi khongnaili khalei khangalui local churchbingwui tunglila kathana sakikajina da. Kha chi mamashungmana. 1st Peter 5:2na ararbingli kasatmida hanga, athumwui pangli horsangmi kahai kaja athumwui ngachaili khalei yaonaobingli homlu da. Church akhawui ararbing hi khangatei churchwui kashok-kazang yangsangmikhavai maningmana, kha athum khalattawui churchwui kashok kazang yangmi khavaina. Otsak 20:28nala ararbingli hanga kaja athum khalatta kala athumwui pangli Mangla Katharana horsangmi kahai yaonaobingwui tungli ngasharlu da. Mangla Katharana athumli Ephesusli khalei churchli yangsangmi khavai arar sakhangasakna (Otsak 20:17). Hithada hanghaowa da athum church kateibingwui pongli ning masangmipaimana, mangachonmipaimana kala makatompai mana kaji maningmana. Athum saikora ngaraikacha Khristawui phasa akhawui akai avava sada katomingarokda ngachonmingarokpai (Ephesianao 4:16). Kha chi athumwui kathana akhana kajiwui ningai eina masala kha Khristawui lungli achinangarana kajiwui ningai eina sakikajina. Athumna khalattawui local church mangli munga kala church kachiva kachichawui kashok-kazang yangsanga. Church akhawui lungli ayarwui mina kathana kasa hi Varena awui ningkachang athishurda church kathada panrakhala da sami kahai chili ngacheikhangasakwui machut akhana.

4. *Ningkhan eina kapanna churchbingwui tungli khangachei khuikhara.* Local church kachiva ningkhan eina kapan kala khalatta khamung kaji hi Varewui kaphaning kala ningkachangna. Local church kachiva Khristawui azingli ningkhan lei. Church hi khangatei church akha eina ngarumda kala churchbingwui tungli khaleiya organization zangda organize masamana. Kala chi church katei akhawui kathanabingwui azingli hamsangda khalei maningmana. Church kachiva khalattawui ningkhan eina decision khuiya. Kachicha churchwui otmanga, kashok-kazang, kathana kakapang, lan khangashai, khokharum kala mathuikahai achinali mashungkhami/kharak hikathatha saikora hi khalattana saya. Hi Varewui ningkachangna kala chi Biblewui apongna. Hithada kasa maningla katei saikora chi Varewui pangshap kala Awui kharin chi sakakhaina. Biblewui ot Biblewui athishurda sara kala Varewui ot saikora Varewui kaphaning athishurda sara. Varewui ningkachang kala Varewui kaphaning china phameithuiya.

### **Khangahan**

1. Nguihaira da chitheimida khalei machutbingli \_\_\_\_\_ da theiya.
2. Church kachungkhana athumwui tungli kachikatha organization ningchangkhala?
3. Mi kachara achinabing local churchbingwui tungli pangshap maleikhala?
4. \_\_\_\_\_ wui eina rakazang china memberbingli khangui organization ningchang ngasaka.
5. Gospel meeting kasawui makapha kathum hanglu.
6. Kathara tuina khamaya athishurda Gospel meetingwui mahutli khi sapai khala?
7. Church akhawui kathanabingna khangatei church akhawui tungli mungpairala?
8. Ararbing athumwui \_\_\_\_\_ khalei yaobingli yangsanga.
9. Mangla Katharana ararbingli church kayakhawui tungli kathana sangasak khala?
10. Katharatuiwui churchbingwui pongli meikhaikhami tuiyar khani hanglu.

## **KALASHATWUI MACHUTBING**

1. Churchbingwui tungli decision khuimikashapwui pangshap khalei organization. :

CENTRAL	MISSION	AUTHORITY
I	I	I
Church	Church	Church

2. Congregation bingwui ngachaili oraganize kasa (kapha ot sakhavai lapai), kha china maram sada chiwui eina officers, treasury, kala district-grouping hikathatha bing hi rashoka.

Church	Church	Church
I	I	I
Delegates___	Officers___	Treasury___
	District___	Giving

3. Churchna maningakha chiwui kathanabingna maningakha memberbingna khangatei church akhawui tungli pangshap singkhavai khangaran saphoka.

### KATHANABING

Khamalinga Church	
I	I
Khangazana church	Nganuidakhalei church

4. Varena awui ningkachang athishurda hithada saakha phara da church kachivali samikahai kaja church khalattana decision kakhui, churchwui kashok-kazang khalat yangkasang, kala khalattawui ot khalattana kasa hikathatha hi ngacheikhangasak:

Church	Church	Church
I	I	I
Work	Decisions	Affairs

**KATAM – 31**  
**KHARE SADA CHURCH GOVERNMENT HI KATHADA NGUI-  
HAO KHALA**

**OUTLINE**

1. Naoda shitkasangwui eina thuihaoki kajibingwui pongli Biblena hangmaranna.
2. Church thotchanwui eina theikakhui.
3. Ningtongda mashitkasanga tungli khalei khonshat bing.

**NGASANKHANGARUM**

1. *Biblena naoda shitkasangwui eina thuihaoki kajibingwui pongli hangmaranna.* Khare para hina hanga, church kaikhangarok hi rilak eina church organizationwui eina haokaphokwui vang chiwui pongli katam darka salakka da. Arui Katam (lesson) hina churchwui lungli makathar, khamakhao ot saikora hi kathada razangkhalakaji chitheimira. Khareyali, Biblena ngakaikashi kala tatungkahai bingwui atam rara da hangmaran kahai chi ithumna thei. Sakashi ramfabing razangda yaobingli sashiman khavai sara da paokazat Paulna Ephesuswui church ararbingli hangmathina. Hi kashura kachungkha thanthui kahai mikhanama ojabingwui pongli kahangna (Otsak 20:29, 30). Hi minama ojabingna church makhaongasakda sashiman khavai sara kajiwui pongli marankahai maran tuina. Paulna mikhanama maranbing nathumwui ngachaiwui eina shokra da kahang chi matailak kahaina. Chiwui kakhalatta kaikhangarok hi church alungwui eina shokra kala ararbing/ kathanabingwui eina shokra kajina. 1st Timothy 4:1-4 lila mi kaikha shitkasangwui eina thuihaora da hangmathinmiya. Mikhanama ojabingna maram sada church kongluihaora da athumwui pongli hangluishit dalei. Corinthli khalei churchwui lungli mamaya khangarok kala kaikhangarok haophok kahai chi 1st Corinthnao 1:10-13 li ithumna kapa samphang dalei. Memberbingwui lungli kakai rakashok hi khiwui vang khalajila athumna Khrista mangli mashurla kha athumwui kathanabingli shurthui kahaiwui vangna. Churchwui lungli kakai kala ning makathar rakashok hi churchwui kathanabingwui tungli khaleina. Ngakaikashi kala kongkhalui atam rakahaiwui thili makapha-makhaya moreiwui mi chi shokra da 2nd Thessalonicanao 2:3, 4 li latluida hangmathinmiya. Vareshimli khalatta varena da mibingwui mangali kakapama chi ana. Hithada shitkasang naothahailaga thuikahai hi makapha-makhaya Vareli makathaei kathanabingna shokhangasakna, athum kaikha churchwui lungli khaleibingna kala kaikhana ayarwuina. Churchwui lungli kathanawui pam thardalei

lakha eina tangda church makongluimana. Kha ararbing eina ojabingna Varewui tuiwui eina kala Awui ningkachang eina sakahai organizationwui eina thuihaithang makapha chi rakazangna. Churchwui lungli kakai-katek kashok hi kathanabingwui pang zangra kaji Biblena hangmaranhairasai. Ithumna thei kaja aja churchwui lungli akha eina akha mamayangarokla kaingarokda khalei kala nguida tamchitheida khalei hi marantui unγκashungna da.

2. *Churchwui thotchanwui eina theikakhui.* Asiali khalei church shiniwui pongli chitheikhami eina ngasoda Biblewui lairik kakapi kupsanga (Phongkhami 1, 2, 3). Rida maran kahai tui athishurda church shini chiwui ngachaili kaikha shitkasang horhailaga thuihaowa. Kha ithumna churchwui pongli tamngarumaman kaji eina mi kaikha shitkasangwui eina thuihaora da hangkhamathin tui Bible kapikup kahaiwui thilila unγκhungmaman kaji theiya. Biblena hanga, chipeena Vareshibingwui khamashung kala kathar eina Khristali kachigat ning chi makhaongasakta church shimangasak khavai saya da (2 Corinthnao 11:3). Hi kachangkhat Prohowui church organization lunglila rashoka. Varena ichacham eina hi phara da samikahai chi mikumowui vang mashapmana. Athumna lupa kala khangam-khareili kakahaowui vang Biblena phakhavai sakahai chili ngarumsanga kala chi ngacheingasaka. Mathang-mathang ngairon eina church organization zakshisang kahai ithumna kathei athishurda churchwui thotchanwui eina ithumna theikakhui chia khikhalajila (1) khare sada khangachei kachungkha khara chiwui lungli church government khangachei hila zanga. Kathanabingna Varewui apong naotha kahaiwui vang khangui khalang paisor eina churchwui lungli razangshap haowa. (2) Thuikahai athum kachungkhawui ningrin zakkashi maningmana. Shiman ngasakra da athumla maphaningmana. Athumna phaningga kaja shiyan-chikan ngacheikhangasak hi phakhavaina da. Kha athumna mi- kumowui apong eina Varewui apong ngathahaowa. (3) Haokaphokli khangachei kala ngateikhangarok matheirarmana kaja haokaphokli teolak eina haophokka. Hi khamashungna kaja Varewui ningkachang chiwui eina mikumona ngairon eina thuumamana, kha khanaowali katawali thuihaowa. (4) Kateowa ngavei shokhami eina mi kachungkha chiwui eina kashok thada, akhashida apong nguiphokhaikha chili mi kashungkha shurphalunga. (5) Naomeida kaikashokbing khalatta mashungkhui khavai rida kaishok kahaibingli pheisin salaga ngaphat-ngayetta. Athumna hanga kateibingna akha kasawui vang athumna chili langmeida sara da. (6) Kahaka khangachei hi kathakwui lungli maramana, kha kateowa khangachei chi ngarumsangmama ngairon eina haksangmamana. Sakkhashili kahakka yonkahai tharan theipailakka kha kateokhamang khangui chia yangkheihaowa kala atam



kasangkha matheirarmana. (7) Arar akha sada athum saikora pangshap kala mashun ngaraichada khalei hi kaikhawui vang ningyang maungmana. Chiwui vang eina athumna “keinungli khalei ararbing” da kapangsanga kala naoda “ararbingwui akhava” dala kapanga. (8) Local church akhamangwui tungli khamung china athumwui vang mashapmana. Chiwui vang athumna church saikora ngarumngasaka kala khangaruma church saikora ngaraikacha ararbingwui khamung azingli leingasaka. (9) Church kahakbingna ka-teobing kala ngazankhamei churchbingwui tungli mungaiya. (10) Kathem thangkamei bing churchwui lungli atam kachida athumwui kaphaning eina vaingaiya. (11) Kathanaobing ichacham kahai memberbingwui eina khaya ningkachangwui vang churchwui lungli “clergy” kala “laity” khaiphokhawa. Hikatha tui hi Kathara Tuili makazang tuina. (12) Kathara tuibing hi saklak kahai kaja bhaptashilak kahai tuina da khuiya, chiwui vang Kathara Tui meikhaimi khavai Catechism kapishoka. Kha masangla Catechism eina Biblewui pangshap kala mashun ngaraichada onthuihaowa. (13) Memberbingna khi shitsangra kala khi mashitsangmara khala kajiwui pongli machukngarum khavai kala ngasangarum khavai ararbingna meeting saya. Meeting chili athumna phara da machuk kahai kala decision khuikahai chi churchwui riyana kala shiyan-chikan sada shichinna. (14) Churchwui sarkar eina ngaleiwui sarkar ngarumhaowa, chithada sada churchna awui manglawui pam chihohailaga ngalei khamungwui pangshap sathuihaowa. Chiwui thili ngaleiwui sarkarwui khamakhao kachungkha churchwui lungli razanghaowa. Hi chipeena khamashunga church organization sashiman khavai kasali shikachin apongbingna. Mibingna khamashunga apongwui eina thuihaorada Bibleli maran kahai tui unshungda khalei ithumna theidalei. China maram sada ajarashungda denomitionnal churchbingli apong kachungkha eina ngingasak da khalei ithumna theida khalei hina.

3. *Ningdongda mashitkasanga yaokahombingwui tungli khalei khonshat bing.* Ara ithumna tamngarum da khalei tui pongbing hi ithumwui vang kanadaleiakha, aruihonwui churchwui kathanabing hangkhamthin tui hi khuisang phalungra. Kala ridawui churchwui kathanabingna sakasa ngaraikacha khangui-khalang ot aja athumna masaphalungmara. Ningdongda mashitkasanga yaokahomabingli khonshikahai tui Kachama Tuingashitli kapikahai nganalu, “Iwui yaohomphungwui yaonaobingli kashamkakhayanga kala sakakhayanga yaokahomabing kakhanang ngasaranu” (Jeremiah 23:1,2). Ningdongda shitkasanga, kapinga kathanabingna churchwui lungli sakakhayang kala ngaphayang kahai maleingasak mana kha khangazana, mashitkasanga kathanabingna chithada sakida mararmana. Varena Awui mibingli thanda kha-

lei kathanabingwui vang kharitta otngarut miya kala Ana ningtongda shitkasanga ararbingwui vang tekhamtei sokhamila miya. Yaobingli matha-lak eina yangsangkhambingli 1 Peter 5:4na hithada tuingashit saya, chia, “Chieina Yaokahoma akhava khara tharan mashimankapai tekhamatei kuihon chi athumna samphangra”. Kapha kala khamashunga ararbingna ithumwui manglawui Yaokahoma akhava kala Bishopwui eina kayakha tekhamatei saman samphangkida leikhala (1 Peter 2:25). Saman chi mashimankapai tekhamateiwui kuihonna.

### **Khangahan**

1. Naoda mashitkasangbing thuihaora kajiwui pongli maran kahai kathara tuiza mati hanglu.

2. \_\_\_\_\_ nguikahai tharan churchli kakai rashoka.

3. Chipeena Vareshibingli athumwui khamashung kala kathar eina \_\_\_\_\_ chi makhaongasakta church shimangasaka.

4. \_\_\_\_\_ lungli church government khangachei hila zanga.

5. Churchwui eina nguida thuikahai hi church \_\_\_\_\_ wui eina haokaphokna.

6. Thuikahai athum kachungkhawui \_\_\_\_\_ zakashi maningmana. Shiman ngasakra da athumla maphaningmana.

7. “Clergy eina “Laity” kaji tuiyar khani hi Biblewui tui maningkhala?”

8. \_\_\_\_\_ wui shiyanchikan eina \_\_\_\_\_ wui shiyanchikan ngarumhaowa.

9. Ningtongda mashitkasanga yaokahoma bingli khonkashiwui pongli kapikahai Kachama Tuingashitwui kathara tuiza chi khikhala?

10. Ningtongda shitkasanga ararbingli tekhamatei saman mira da tuingashit kasa kathara tuiza chi khikhala?

### **KATAM – 32**

#### **BUSINESS MEETING KATHADA THANRA KHALA NGASANKHANGARUM**

“Kathara tui athishurda sakahai churchwui organization” kajiwui pongli tamkhangarum hi Katam (lesson) hina kakupna. Kha kupchao maji-ranglakha business meeting kasawui pongli hangchitheira. Hikatha meeting hi khamatha apong kachungkha eina sapai. Kasatkhami tui saikora hi meeting kasa tharan phaningunghalungki kaji kala shichinphalungki kaji khamataiyabingna. Chia (1) Ot saikora achei-arei theilak eina kala ayat unglak

eina (kharei-khanao yanglaga) saphalungra (1 Corinthnao 14:40). Hi mathalak eina khamachuk darka sai. Meeting mararanglakha mangali rida ngarankharikhai phalungra. Kharei-khanao leida mathalak eina thankhami hi kathara tui hiwui ningkachangna. Akhana matuidaleilakha khangatei akhana kasaikha pamki kajina, chithada akha eina akha khayakashi mingarokra. (2) Khayakashi eina ngasoda akhana akhali atam mingarokra kala khalattali mi kateibingna phameiya da phaning ngaroki kajina (Philippinao 2:3). Chithada kasa eina yarui kazipwui lungli khonkazar, ngaphat-ngayet kala ngakaishi khangarok maleimara. Yarui ashangvawui lungli katomi khangarok leikhavai kachichawui kaphaning eina vaira majipaimana. (3) Mi khipakha khalattali khamataiya masakhui ngasaklu (3 John 9). Mi khipakha yaruina awui tui nganakhavai kala ali khamataiya sada khuikhavai apong maphapai mana. Langsot ning, khalattawui vang mang kaphaning kala mili machapkhami hikathahabing hortaphalungra. Mi saikora khangahuiwui sari ngavaiphahungra kaja Varena Langkasobingli ngasunga, kha khangahuiali lumashanmi (1 Peter 5:5). (4) Mi kachiva mi kateili kala churchli otram ngatha khavai apong pharano. Jishuna hanga, Awui miktali mi saikorawui raonao kasa china hakmeithuiya da (Matthew 20:27). Hi Ana Awui sakhangatha bingwui pheiphomida chitheimiya (John 13:12-15). Mi kachiva business meetingli mi kateibingli otram ngathakhangaiwui (rao sakhangaiwui) ningai eina vazang phalungra. Churchwui vang kanaki kaji ot saikorawui vang mi kachivana sangairareo eina saphalungra. (5) Meeting kachiva ning-wuklung kathar eina seiha salaga haophokra kala seiha eina ngasoda kupsangphalungra. Hikatha matailak kahai decision kakhui atam hitharan Varewui thangmet kala Awui ngasokhami darka salaka. Kachikathana thangkhomei vathaida chiwui vang poakha mira da Varena ngashithaiya (James 1:5). Nathumwui seiha kakhalat makhalei tuicho sorngasaida kakhor, aremawui seiha mangasa phalungmara, kha khusangmi kapai khamashung kala shitkasangwui seiha ngasaki kajina (James 5:16). (6) Arar kachivali yaruiwowui pam ngatakda kuingasaki kajina (kalikhada arar maleirangsaakha church chiwui mayarnaobing kachivana yaruiwowui pam ngatakda kuingasaki kajina) kaja chithada kasa eina athumwui ningli khalatta yaruiwo sachingra da maphaningmara. China mi kachivali kathanwui experience leingasaka kala china athumwui ngachaili khonkazar kala yuikashi maleingasak mana. Chithada kasa chi meeting kasali kakhang leikhavai kala khangatei mi akhali kapha eina kakatom tui hangsangthei khavai katam kala experience khamatha akhana. Otpam chi mapaimana. Decision kakhui yaruiwo china kateibingli mashun kala pangshap leimeiya kaji maningmana, kha meeting hi horzak-tazak eina kala ng-

arakzak eina sakhavai kasa hi awui otna. (7) Meeting sakachida mi akhana meetingli khangazek saikora horzak eina kapita phalungra, ali kapeme da theiya. Hiwui ot hi ngatakda khuipai. Ana mi kateili mataimeiya kala pangshap leimei kahai maningmana. Ana meetingli khi ngazek khala chi kakapina. A churchwui kathana maning mana kala churchwui lungli awui otpamla malei mana. Meeting khangachang tharan ana kapikahai saikora yaruiwui mangali patara kala yarui saikorawui khamaya khuira. Rakhanao meeting kasali meeting mahaophokrang lakha chi paluishitra. Athumna ngazekkahai kala decision khuikahaiwui pongli naoda kachikathana khangahan tharan chitheikhavai kapi kahai saikora mathalak eina kaziphaiphalungra. Meetingwui recordli makankhana tui makapisangpai mana. Meetingwui vang mathalak eina machukhaiphalungra kala meetingwui lungli makankhana tui khamatui kala ngaphat-ngayat khangarok hikathatha hi maleingasakphalungmara. Sakaka maleila makankhana tui matuingarok da meetingli atam zangkhangasak hi aremana kala naoda china ithumli shimangasak khavai apong ngasara. (8) Chan khangazekli mi kachivawui khon nganaphalungra. Mi akha maningakha mi khani-kathum mangna atam khuishon machipaimana. Mi kachivali khalattawui ningkachang ningkhan eina phongshok khavai atam miphalungra. (9) Meeting hi thuikahai atamli nguikahaiwui pongli maningla kha naodawui vang phakhavai khamchuk kala changazek ngasaki kajina. Ning suitakapai meeting mangasapai mana kha kakatom leilak kahai meeting ngasaki kajina. Business meeting hina mi kachivawui wuklungli ot sangairareo kahai leingasakki kajina. Member kachivali Prohowui otli marekta sakhangasak kaji hi business meeting sakachidawui kharin ngasakikajina (1 Corinthnao 15:58). (10) Meetingli vote mazatnapai mana. Kha memberbingwui lungli kaphaning kala kharin mangaraicha ranglakha eina tangda ngasanngarumki kajina (1 Corinthnao 1:10). Meetingwui channgazekli ning mangarum kapai tuipong zanghaiakha decision makuila rakhanao meetingli achina ngarabingna ningkha sada ngachekhui khavai haisahaoki kajina (Otsak 4:32). Achinangarabing kaphaning ngaraida, ningkha kala khokkha sada athumwui lungli ngaraikacha leikashe leiakha mayakhangarok khuirapai (Philippinao 2:2). Achinangarabingwui lungli khalei khonkazar china yangkashebingli athum khalattawui lungli manashipamngasaka (Laa 80:6). Vareshi saikora chinaongarana chiwui vang athumwui lungli ngateikhanga-rok saikora yuikhuishapa chithada athumwui lungli khonkazar maleimana (Haokaphok 13:8). Mayakhangarokwui lungli athum zatngaruma (Amos3:3). Khalatta ngayarkazamkahai shimkhur manganingrarmana (Matthew 12:25). Chinaongarawui alungli kakai katek yaokasang mili Varena ningkachaiya

(Chansam 6:16, 19). Mi saikora, Khristawui lungli chinaongarasera, ngaraikacha Khristawui phasakai saikora kachangkhat eina ot sakngarumpai kala ot sakngarumphalungra (1 Corinthnao 12:12, 25). (11) Prohowui ot kasali member kachivali athumna sashapki kaji ot miserlu. Otngarut chi teolak salapai kha member akhawui vang awui mangla rarsangkhavai kanaya. (12) Atam kachida meeting mahaophokranglakha ithumna ning mikikaji ot chia khikhalajila manglarinwui Vareshim, kaja church sakaka hina. Member kh- ipakha phasawui ot kaja khorum khavai shim kala chikatha khangatei otwui vang henmeida ning masangpaimana. Changazek kachiva kala otsak kachiva manglawui shim kaja church sakakhavai ningsang phalungra. Denomination churchbingna phasarinwui shim kaja khorum khavai shim kahakka sakhavai ningsanga kha Varewui ningkachangva manglawui shim sakaka hina. Chiwui thili apam kacha yangda khorum khavai shim saya. (13) Meeting kachivawui tuikui chiya ot sakhavai khamachuk kala machuk kahai chi otsak eina sakashok kaji hina. Ngarankharik kahai makhalei church chi konglui khavai ngarankahaina.

## **TUIKUP**

Church organizationwui pongli ngasankhangarum hieina tangkahaina. Hili langmeidala tammihaipai. Varena churchwui vang machukkahaiwui pongli Bibleli kuplak eina zangdalei. Kha lairik hinala kapabingli (readers) Biblena tuipong hiwui pongli tamchithei kahai saikora mathahaila taman khavai katomira da shitsanga. Kala hithadala chihanna kaja tamkahai lessonbing hina lairik hi kapa mi kachivawui ningli Kadhara Tuingashitwui christianity mapungphalak eina restore sakhangaiwui ning sangmidaleira da. Khristawui ningkachang athishurda saakha kala ot saikorali Khristali akhava sangasakakha Kadhara tuingshitwui christianityli kachangkhat hanungpaiya. Kathara tui athishurda kasa church organization rida restore masaakha Prohowui church restore masapaimana. Kha aja kalikhada Kadhara Tuingashitwui churchwui ichacham kahai government kala leadership khuishokluisi kaja ajawui thotli khamashunga church khuirakida vatkharfara. Church hia ningli machuk kahai kala yekkahai athishurda mathalak eina sakakahai shim kathana. Jishuna ngashit kahai athishurda Ana Awui church saya (Matthew 16:18). Kha church chi mikhanama ojabingna kaingasak haowa (Otsak 20:18-30). Aja ithum Varena machuk kahai kala yekkahai ngaraikacha chi (Kadhara Tuingashit) khuiluishitta horzak eina shura chithada kasa eina ngaraikacha manglawui shim chi sakaluishitra. Prohowui ningkachang athishurda church organization restore kasa hi Manglawui shim sakaluishit khavai khamataiya otngarut akhana. Biblewui athishurda Vare hi haophokkhamiyana kala

kasemana/sakakhamiyana (builder). Kha mikumowui apong eina saakha mikumowui church shokra. Biblena hithada hangmathina, “Prohona shim chi masamiakha, shim kasabing chiwui ngalang aremana” (Laa 127:1). Kha ithum Vareshi akha sada, kharinga lunggui sada, manglawui hangphut chigat khavai manglawui shim sakasa (1 Peter 2:5).